

Ì ɔ' Jesús ttekölpa tsá e'pa tö e' pakè Hechos

Yëkkuö i' dör yëkkuö skà kit Lucas tö Teófilo a e', i' ta ide böt. Itsá kite ie' a e' dör ì ɔ' Skëkëpa Jesús tö e' pakè. Ie' mine'ka ká jaì a e' ukuöki ta ì kí ɔ' ie' tö ká i' ki ittekölpa tsá e'pa wa Wiköl Batse'r batamik, e' pakè Lucas tö yëkkuö i' ki.

Kam Jesús mi'kane ká jaì a e' yöki ie' tö ittekölpa tsá e'pa patké ttè i' wa: Mik Wiköl Batse'r de a' ki, etá ie' tö diché meraë a' a ye' ttè pakoie. A' miraë ipakök s'tso' kos Jerusalén e'pa a. Nies ipakeraë a' tö s'tso' Judea ká malepa a ena Samaria ena ká wa'ñe dò wé íyök erkerö ee. E' tso' kitule yëkkuö i' ki 1.8 ee. E' ukuöki ta ì ɔ' Skëköl tö Pedro wa Jerusalén ena Judea ká malepa ena Samaria e' ttè tso' kitule yëkkuö i' ki.

E' ukuöki ta Pablo tö Jesús tté buaë paka' ká taië wakpa a e' tté kit Lucas tö yëkkuö i' ki. Yëkkuö i' wa Lucas tö se' a ikkachè tö Jesús dör sulitane tsatkökwak.

Lucas bak s'kapeyökwakie. Iekkè ta ká kos wé Pablo dë'rö ee Lucas mir ie' ta. E' kueki Lucas tö isu' iwák wöbla wa tö wes Skëköl kaneblë' Pablo wa. E' tté tso' kitule yëkkuö i' ki.

Skëköl tö iWiköl patkeraë

¹⁻² A këkë Teófilo, ì ɔ' Jesús tö ena ì wa s'wöbla ɔ'itö kuaë dò mik imineká ká jaì a, e' kos paka' ye' tö be' a yëkkuö tsá kityö e' ki. Kam ie' mi'kane ká jaì a, e' yöki ì kiane ie' ki tö ittekölpa tsá shukitbakitö, e'pa tö iwë, e' uk ie'pa kéitö Wiköl Batse'r wa. ³ Ie' kötewá shkenekane, e' ukuöki ta ie' wák e' kkayëne taië ie'pa a döka ká dabom tkëyök (40)

ekkë. Es ie' tö ie'pa a ikkaché tö mokî ie' tso'ne ttsë'ka. Ñies ie' tö ì blúie Skëköl tso' e' tté paké ie'pa a. ⁴ Ká et ta ie' tso' ittekölpa tsá e'pa ta, ta ichéitö iarak:

—A' kè kàne e' yöktsa Jerusalén. Ye' Yé kablë' iWiköl patkök a' a yë' ye' tö a' a, e' panú dò mik ide eta. ⁵ Juan tö s'wösuk di' a, erë ká kè tkòpa taië ta Skëköl tö a' ierawa iWiköl Batse'r a.

Jesús mineka ká jai a

⁶ Mik Jesús ttekölpa tsá ñi dapa'wéka ie' ta, eta e'pa tö ie' a ichaké:

—A Skëkëpa, ¿i' ta be' tö se' wakpa tkekekane se' Israel aleripa, e' wökirpaie?*

⁷ Ie' tö iiüté:

—E' kèwö kè mène a' a jchenoie. E' kèwö tso' ye' Yé wa klöuletke. ⁸ Erë mik Wiköl Batse'r de a' ki, eta ie' tö diché meraë a' a ye' tté pakoie. A' miraë ipakök s'tso' kos Jerusalén e'pa a. Ñies ipakeraë a' tö s'tso' Judea ká malepa a ena Samaria ena ká wa'ñe dò wé íyök erkerö ee e'pa a.

⁹ Mik ie' tö e' ché one, eta ibutséka mía ká jai a ie'pa wörki ta ichowa mò shua kè wër ta'ia. ¹⁰ Ie'pa tso' ká sauk ká jai a krereë tö wes imichoka, e' dalewa bet wëpa böl datsi' saruruë de iëter ie'pa o'mik. ¹¹ E'pa tö iché iarak:

—A Galilea wakpa ¿iók a' iëteria ká sauk ká jai a? Jesús bak a' shua e' mítser Skëköl wa. Wes a' tö isuë tö imía ká jai a, e' suë idörane ká i' ki.

Matías atë Judas skéie

¹² Eta Jesús ttekölpa tsá e'pa tso' Olivo kébata a, ie'pa biteane Jerusalén. E' ñalé dör wekkë ulat kawö mène

* 1:6 Israel aleripa e' wökirpaie: Jesús ttekölpa tso'ia ibikeitsök tö ie' e' tkökëka Israel aleripa blúie ie'pa ká ki ta ie'pa tkekekä ie' kayupaie.

judiowak a shkoie eno diwö a ekkë.† 13 Mik ie'pa dene Jerusalén ta ie'pa tkaka u etkuö ki wé ikapökerak ee. Ee itso'rak Pedro, Juan, Santiago, Andrés, Felipe, Tomás, Bartolomé, Mateo, Santiago Alfeo alà, Simón Celote, ñies Judas Santiago alà. 14 Ie'pa ulitane ñi dapa'uke kekraë ttök S'yé ta. Alakölpa welepa ena María, Jesús mi, ena Jesús elpa, e'pa tso'ñak ie'pa ta ttök S'yé ta.

15 Jesús mik erblökwakpa e' dapa'uke e'pa döka cien eyök ki dabom böyök ekkë ulatök (120). E' kèwö ska' ta Pedro e' kèka ie'pa wörki ta ichéitö: 16 “A yamipa, ima Judas yé' Wiköl Batse'r tö se' blú bak David e' wa, e' wà tka wes itso' kitule Skököl yëkkuö ki es. Judas wa pè' mine Jesús klö'ukwa. 17 Ta ie' bak Jesús kléie wes se' es, ie' bak kanëblök Jesús ta wes se' es. 18 (Ie' tö ì sulu wamblé', e' ské wa ie' tö ká tué et. E' ukuöki ta ie' anebitu wöwakköt ñawi tskinewa ta ñattse yërulune. 19 Mik Jerusalén wakpa tö ttè e' ttsé, eta ká e' kiè mékarakitö iwákpa ttè wa Hacéldama e' wà kiane ché S'pé Ké). 20 Es itso' kitule Skököl yëkkuö kiè Salmo e' ki e' tö iché i' es:

‘As ie' u weir

ñies as kè yi seria e' a.’‡

Ñies ichéitö:

‘Q'ka múka iskéie ie' kanè méat e' kanéukne.’ ”§

Es itso' kitule Skököl yëkkuö ki.

21 “Wëpa tso' íe e'pa manetwa se' ta kekraë Jesús bakia se' shua eta. 22 Mik Juan tö Jesús wösuk e' kos ta ie'pa tso'ñak se' ta dö mik Jesús minea ká jaì a eta. Se' kawöta wëpa ekkëpa shushtök eköl se' kíie as itö Jesús shkenekane, e' tté pakò se' ta.”

† 1:12 shkoie eno diwö a ekkë: E' dör kilómetro etk ulatök. ‡ 1:20 Salmo 69.25 § 1:20 Salmo 109.8

²³ Es ie'pa tö wëpa shushtë böł. Eköl kiè Josè, e' kiè Justo ñies. E' kkabata dör Barsabás. Iëköl kiè Matías. ²⁴ Eta ie'pa tö ikié S'yé a i' es: “A Skëköl, be' wä sulitane er suule buaë. E' kuëki ikkachó sa' a wéne shushtë be' tö ²⁵ as iat Jesús ttekölpa tsá e' kíie Judas skéie. Judas e' wamblé sulu, e' kuëki ie' tö kanè e' méat ta imía weinuk wé ikawöta weinuk ee.”

²⁶ Eta ie'pa iné isuöie tö wëpa böł shushtëtke ie'pa tö e' wéne kiè dömittsa. Eta Matías kiè dettsa. Es ie' atë Jesús ttekölpa tsá e' kíie imalepa döka dabom eyök ki eköl (11) e'pa ta.

2

Wiköl Batse'r de Jesús mik erblökwakpa ki

¹ Mik Pentecostés këwö* de, eta Jesús mik erblökwakpa kos tso' dapaule ek tsiní ème. ² E' bet ta ká jaì a ì blane taië wës siwa' darërëë es, e' blane u shü kos a wé ie'pa tso' ee. ³ Eta ie'pa tö isué tö idebitü taië ku'ie bö' wörkua suë, e' ane ie'pa ulitane ki et et. ⁴ Eta ie'pa a Wiköl Batse'r iënewa ta eköl eköl ttémi ká bánet wakpa ttò wa kuä'ki kuä'ki wës Wiköl Batse'r tö ie'pa ké ttök es.

⁵ E' këwö ska' ta judiowak tö Skëköl dalöieta' datse ká ulitane ki, esepa tso' taië Jerusalén. ⁶ Mik ie'pa tö Jesús mik erblökwakpa aláneka taië e' ttsé, eta ie'pa e' dapa'wëkä ikí ttsök bua'ie. Ie'pa tö ittse eköl eköl iwákpa ttò wa kuä'ki kuä'ki es. E' kuëki ie'pa tkinewa taië. ⁷ Ie'pa wökranewa ta ichérakitö ñi a:

* 2:1 Pentecostés këwö: Pentecostés wà kiane chè Ká Dabom Skeyök këwö. Judiowak tö Ie'pa Yépa Yërulune Egipto e' këwö tkö'wé one, e' ki ká de dabom skeyök, eta kawö skà tkö'weke ie'pa tö e' kiekerakitö Pentecostés. Ñies e' këwö kiërakitö Iyiwö Shtök Këwö. Kawö e' dör wëstela choie Skëköl a iyiwö kite e' ki. Éxodo 23.16 saú.

—¿A'ka ie'pa kè dör Galilea wakpa tso' ttök? ⁸ ¿Wes se' ulitane tso' ittsök tö ie'pa ttöke se' ulitane ttò kua'ki kua'ki wa? ⁹ Íe se' shua se' tso' datse Partia, Media, Elam, Mesopotamia, Judea, Capadocia, Ponto, Asia, ¹⁰ Frigia, Panfilía, Egipto ena ká tso' Libia atē tsinet Cirene kke. Ñies pè' datse Roma serke íe esepa tso' íe. ¹¹ Se' welepa dör judiowak chökle. Welepa kè dör es, esepa e' yò'bak judiowakie. Ñies se' tso' íe datse Creta ena Arabia. Erè ì kōs kaneō' Skèköl tö buaè e' chök ie'pa tso' e' ane buaè se' éna se' wákpa ttò kua'ki kua'ki e' wa.

¹² E' kueki ie'pa ulitane wökrarulune taië ikittsök. Ie'pa wōa ká chowa. Ie'pa ñi chakérak:

—Íyi ikkè, ¿ima e' wà kiane chè?

¹³ Erè welepa tö Jesús mik erblökwakpa wayué sulu ta ichérakitō:

—Ie'pa tteke blo' tö.

Pedro tö ttè paké

¹⁴ Etā Pedro e' duéka shkë'ka Jesús ttekölpa tsá malepa dōka dabom eyök ki eköl (11), e'pa ta. Ie' tö iché sulitane a aneule: “A yamipa judiowak, ñies a' ulitane serke Jerusalén. Íyi ikkè e' wà pakekeyö a' a. Ye' ttò ttsó buaè a' tö. ¹⁵ Sa' kè tteku' blo' tö wes a' tö ibikeitsè es. Erpa diwö de sulitu (9) bla'mi, diwö ikkè kè yi e' ttōta'ka blo' wa. ¹⁶ Erè ì tköke sa' ta, e' dör wes Skèköl tteköl kiè Joel, e' tö iyè'atbak es. Ie' tö iyè'at i' es:

¹⁷ ‘Skèköl tö ichè tö mik ká i' erkewatke, etā ye' tö ye' Wiköl patkeraë sulitane ki.

E' kueki a' ala'r, wēpa ena alakōlpa, ekkēpa kōs ttōraë wes ye' ttekōlpa es.

A duladulapa a ilè kkayërdaë kabsueie ie'pa kè ku' kapök-wa e' dalewa.

Ñies a' kēkēpa a ilè kkayërdaë kabsuè a.

18 Ñies e' k^éwö ska' t_a ye' Wiköl patkeraëyö
ye' kanè mésopa k_i, w^épa ena alakölp_a.
Es ie'pa tö ye' ttè pakerane imalepa a.

19 Ká jai a ye' tö íyi taië suluë kkacheraë, kè suule a' w_a ese.
Ká i' k_i ñies íyi kkacheraëyö a_s a' isaù:
s'p^é sueraë a' tö, bö' sueraë a' tö, shkle taië sueraë a' tö
ñies.

20 Diwö ttserdawa. Si'wö iardawa batsë w_{es} s'p^é es.
E' k_{os} tköraë k_{am} Skököl k^éwö d^ò e' yök_i.
Kawö e' dör buaë shute, e' olo t_a' taië.

21 E' k^éwö ska' t_a yi k_{os} tö e' tsatkè kié Skököl a,
esepa ulitane tsatkërdaë.' "†
Es Joel tö iyë'at.

22 "A Israel aleripa, ye' ttò ttsó. A' w_a ijcher tö mik Jesús
Nazaret wak sene' ká i' k_i, et_a ì kè or yi a ese wéitö taië se'
shu_a Skököl batamik kkayënoie. Es Skököl tö se' a ikkaché
tö ie' tö ipatké'. 23 Erë Jesús menettsa a' a kló'w^èw_a w_{es}
Skököl tö isuleté'atbak kuaë es, ñies w_{es} ie' k_i ikiane es.
A' tö w^épa sulusipa ké ie' ttökwa w^öt^éulew_a krus mik.

24 Ie' weine siarë ie' köt^éw_a, erë Skököl tö ie' shkeo'kane.
Duew_a kè a ie' wöklöne yës. 25 E' kuëki ká iaiaë blu' David
ut Skököl t_a ima Jesús ttömi e' yé'itö i' es:

'Ye' w_a ijcher tö kekraë be' tso' ye' t_a.
Be' tso' ye' t_a ye' ulà bua'kka ye' kimuk,
e' kuëki kè ì a ye' orpa w_{es}.

26-27 E' kuëki ye' ttsë'r buaë,
ye' ttsò kaneë.
Be' kè tö ye' mepaät pö a,
e' kuëki ye' enuraë iwà panuk bèrë.
Ye' dör be' kanè méso batse'r e',

† 2:21 Joel 2.28-32

e' kuək̄i be' kè tò imepaat as ye' nurwā.

²⁸ Be' tò sene michoë ñalé e' kkeyë' ye' a.

Ye' tso' be' wörki, e' kuək̄i be' tò ye' ttsë'weraë buaë. †

Es David tò iyë'at.

²⁹ “A yamipa, ye' tò icheke a' a yësyësë. Se' blú kékë David bak ká iaiäë, e' du'wabak ta inú wötënewā. Ie' pö tso'ia dö ikkë ta ië. ³⁰ Erë David bak Skëköl ttekölie. E' kuək̄i ie' wā ijcher tò Skëköl kablë' ie' a iwák ttò wa ttè i' wa: ‘Ye' tò be' aleri tkerakā eköl blu'ie wes be' es.’ ³¹ E' jcher David wā, e' kuək̄i ie' tò Cristo shkenekane e' yë'. Ie' tò iyë' tò inú kè atuk pö a, kè inurpawā. ³² Es iwā tka. Skëköl tò Jesús shkeo'kane, e' sué sa' ulitane tò sa' wákpa wöbla wa. ³³ Skëköl tò ie' tsémikā ta itkékaitö iulà bua'kka dalöieräta taië. Ie' Yé tò iWiköl mé ie' a wes ikablë' imuk es. E' ukuök̄i ta ie' tò iWiköl Batse'r patké sa' ki. E' sué a' tò, e' ttsé a' tò enia. ³⁴ Erë David kè mine'ka ká jaì a wes Jesús es. Ie' wák tò iyë'at:

‘Skëköl tò ichè ye' Këköl a:

Be' e' tkóka ye' ulà bua'kka,

³⁵ e' dalewa ye' tò be' bolökpa merarö be' klò dikia.'§

Es David tò iyë'.

³⁶ “A Israel aleripa ulitane. Ijchenú buaë a' wā tò ye' tso' Jesús chök. E' kötwa a' tò wötëulewā krus mik, erë e' wák tkéka Skëköl tò se' wökirie ñies se' blúie.”

³⁷ Mik ie'pa tò ttè e' ttsé, etā ie'pa erianekā taië. Ie'pa tò Pedro ena imalepa a ichaké:

—A yamipa, ¿wes sa' e' ùmi?

³⁸ Ie' tò iiuté:

—A' er mane'ú Skëköl a ta a' e' wöskuóö eköl eköl Jesucristo ttò wa as a' nuì olo'yar a' ki. A' tò iwé es, e' ta Skëköl tò iWiköl Batse'r meraë a' a. ³⁹ Kablè e' dör a' a

† 2:28 Salmo 16.8-11 § 2:35 Salmo 110.1

ena a' aleripa ulitane a ena sulitane serke ká kamië, esepa a ñies. Kablè e' dör wépa kos kieke Kékè dör Se' Kéköl e' tö esepa a.

⁴⁰ Es ttè e' wa ena ttè skà taië wa Pedro tö iché iarak darërëë, ipatté taië ta ichéitö iarak:

—A' e' tsatkó ì tköraë pè' sulusipa ta e' yöki.

⁴¹ Es wépa tö ì ché Pedro tö, e' klö'wé, e'pa wöskuérakitö. E' diwö Skékëpa Jesús icha erule e' kí iëne taië döka mil mañayök ulatök (3000). ⁴² Eta ie'pa e' ché ttè wa Jesús ttekölpa tsá e'pa tö s'wöbla'weke, e' ttsök kekraë er bua' wa. Ñies ie'pa e' ché ñi kimuk ì tso' ie'pa wa e' wa. Ñies kekraë ie'pa e' dapa'uke pan ñuk Jesús kötewa e' kèwö tkö'woie. Ñies ie'pa e' ché ttök S'yé ta.

Wes Jesús mik erblökwakpa tsá e'pa ser

⁴³ Eta ì kè or yi a ese weke taië Jesús ttekölpa tsá e'pa tö Skéköl batamik. E' tö pè' ulitane wökrawé taië. ⁴⁴ Wépa erblé Jesús mik e'pa kos serke wes wák eköl è es. Ì tso' ie'pa wa ese kakkemkerakitö ñi a. ⁴⁵ Es iyi tso' ie'pa wa, ká ö ilè skà, ese watueke ie'pa tö ta iskè blatekerakitö imalepa kimè kiane esepa a. ⁴⁶ Diwö bit ta ie'pa ulitane e' dapa'ukerak Skéköl wé a. Ñies u a u a ie'pa chköke ñita er bua' wa ttsë'rdak buaë. Jesús kötewa e' kèwö tkö'weke pan ñè wa ñita. ⁴⁷ Skéköl kikekekä ie'pa tö. Sulitane wa ie'pa wër buaë. Ká bit ekkè Skéköl tö s'tsatkeke taië, e' kueki ie'pa kí daparke taië.

3

Pedro tö s'kraulewa eköl e' bua'wéne

¹ Ká et tsáli diwö de mañat ta Pedro ena Juan míyal ttök Skéköl ta iwé a. Diwö e' dör ttoie ie' ta. ² Eta eë wëm tkër eköl kune' klö kraulewa. E' datse iyamipa wa itkeser kekraë Skéköl wé wékkö kiè Wékkö Buaala e' a as inuköl

kak kiòitò sulitane dökewā eē esepa a. ³ Mik ie' tō Pedro ena Juan dökewatke e' sué, etā inuköl kak kiéitō ie'pa a. ⁴ Etā ie'pa tō ie' suéwā krereë iwö kī tā Pedro tō iché ia:

—Sa' saú.

⁵ Etā ie' tō ie'pa sué tā ibikeitséitō tō ilè kakmekeitō ye' a. ⁶ Erë Pedro tō iché ia:

—Kè ye' wā inuköl tā'. Kè ye' wā oro tā'. Erë ì tso' ye' wā e' mekeyö be' a. Jesucristo Nazaret wak e' ttò wa, be' e' kókā tā be' shkó.

⁷ Etā Pedro tō iklö'wéwā iulà bua'kka tā ibatséka. E' wöshā tā iklö a idiché iëne ⁸ tā ituneka e' duékaie tā ishkémi wī'kè io'kè. E' ukuöki tā imíwā Skéköl wé a Pedro ena Juan tā iwák klò wa. Ie' turkeka, es Skéköl kīkekaramiitō. ⁹ Etā pè' tso' kos e'pa tō isué tō ishkōrami tā Skéköl kīkekaramiitō. ¹⁰ Ie'pa tō ie' suéwā tō ie' dör wëm e' tköke inuköl kak kiök Skéköl wé wékkö kiè Wékkö Buaala e' a e'. E' tō ie'pa tkiwéwā taië. Ie'pa wökranewā iweblök.

Pedro tō s'patté Skéköl wé a

¹¹ Skéköl wé e' ùle kiè Salomón ùle, eē wëm buanene e' tso'ia Pedro ena Juan paklö'uk. E' dalewa pè' kos datse tūneule wé ie'pa tso' eē tā ie'pa tkinewā taië isaük. ¹² Mik e' sué Pedro tō, etā ie' tō ie'pa a iché: “A Israel aleripa jì kueki a' tkirke? jì kueki a' tso' sa' saük krereë wësua sa' wák tō wëm i' bua'wéne shköwéne sa' wák diché wa ö sa' serke yësyësé Skéköl a e' kueki?” ¹³ Erë Skéköl dör Abraham, Isaac, Jacob ena se' yépa malepa bak ká iaiaë, e'pa Kéköl, e' tō ie' kanè méso kiè Jesús, e' kīkéka íyi ulitane tsata, e' dör yi me'ttsa ttèwā a' tō e'. Ie' waté'ttsa a' tō Pilato wörki eré e' tō ibikeitsbak iökshka. ¹⁴ Jesús dör batse'r ena yësyësé warma a' tō iki' tō e' yóttsa. Erë e' skéie a' tō pè' suluë e' yöktsa ka'. ¹⁵ Es sene mukwak

e' kötwa a' tö, erë ishkeo'kane Skëköl tö. E' kos su' sa' tö sa' wöbla wa. ¹⁶ Wëm i' kraulewa e' suule a' wa buaë. Ie' diché iënene sa' erblöke Jesús mik e' wa. Jesús mik erblè, e' tö wëm i' bua'wëne buaë a' wörki.

¹⁷ “A yamipa, ye' wa ijcher tö mik a' ena a' wökirpa tö Jesús kötwa, eta a' kè wa ijcher moki tö ì wamblök a' tso'. ¹⁸ Erë ì yë'atbak Skëköl tö ittekölpa ulitane kkò wa tö wé pairine'bitu idi' wa s'blúie e' kawöta ttëwa es, e' wawé Skëköl tö es. ¹⁹ E' kueki ì sulu watóttsa. A' er mane'ú Skëköl a' as a' nuì olo'yòitö a' ki. ²⁰ Eta es ie' tö a' er pablaraë ta Jesús pairi'bituitö idi' wa s'blúie e' patkeraneitö se' a. ²¹ Erë i' ta ie' kawöta senuk ká jai a' dò mik Skëköl tö ì kos yuëne buaë wes kenet es eta. Es Skëköl tö iyë'bak ká iaiaë ittekölpa batse'r e'pa wa. ²² Moisés tö Jesús yë' se' yépa bak ká iaiaë, e'pa a' i' es: ‘A' shua Skëköl tö itteköl keraka eköl wes ye' es. E' ttò kos dalöiö a' tö. ²³ Wépa kè wa ie' ttò dalöiëne, esepa ulitane skerattsa se' wakpa yöki bänet, ie'pa erdawa seraa.’* Es Moisés tö iyë'at.

²⁴ “Es ñies Samuel ena Skëköl ttekölpa malepa dë'bitu ie' itöki, e'pa kos tö ì tköke kawö ikkè ta, e' yë'atbak. ²⁵ ì uk Skëköl kablè' ká iaiaë ittekölpa wa, e' wà döraë se' ulà a. Ñies ttè me'atbakitö se' yépa bak ká iaiaë e'pa a, e' wà döraë se' ulà a. Ie' tö iyë'atbak Abraham a' i' es: ‘Be' aleripa batamik ye' er buaë chöraë ká ulitane wakpa a.’ ²⁶ E' kueki mik ie' tö ilà Jesús shke'wékane, eta ipatkéitö se' a kewe se' a er buaë choie as se' ser sulu ese olo'yösö eköl eköl.”

4

Pedro ena Juan e' tsatké judiowak wökirpa wörki

* 3:23 Deuteronomio 18.15,18-19

¹ Etā Pedro ena Juan tso'ia s'pattök, e' shua sacerdotepa biteshka Skëköl wé shkëkipa wökir tã ena saduceowakpa tã. ² Pedro ena Juan tso' s'wöbla'uk tö Jesús kötewã e' shkenekane. E' wa iwà kkachéitö tö s'duowã e'pa shkerdakane. E' tö sacerdotepa ena ie'pa malepa uluwéka taië. ³ Ie'pa tö Pedro ena Juan klö'wéwã. Ká detke tsálij, e' kueki iméarakitö s'wöto wé a dò bule es. ⁴ Erë wépa tso' Pedro ttò ttsök, e'pa shua taië ie'pa tö Jesús tté buaë klö'wé. Es Jesús mik erblökwakpa wépa è esepa deka mil skeyök e' ulatök (5000).

⁵ Bule es tã judiowak wökirpa ena ikueblupa ena s'wöbla'uk ttè dalöiëno wa wakpa e' dapa'wéka Jerusalén. ⁶ Nies sacerdote kibi kiè Anás e' tso'. Nies Caifás, Juan, Alejandro ena imalepa dör sacerdote kibi e' ditséwö e'pa kos tso'. ⁷ Ie'pa tö Pedro ena Juan tsuk patké tã iduésarak ie'pa wörki tã iwà chakéraitö:

—¿Yi diché wa, yi ttò wa wëm klö kraulewã e' bua'wéne a' tö?

⁸ Etā Pedro a Wiköl Batse'r iënewã taië tã iitütéitö:

—A s'wökirpa, a s'kueblupa. ⁹ Sa' tö s'kirirke e' kime' er bua' wa, e' chaké a' tö sa' a. A' ki ikiane jchenuk tö wes ibuanene. ¹⁰ I'ñe tã sa' tö ichè a' wörki, nies Israel aleripa ulitane e'pa wörki tö wëm i' buanene sulitane wörki Jesucristo Nazaret wak e' ttò wa. E' wák kötwa a' tö krus mik erë Skëköl tö ishkeokane. ¹¹ Skëköl yëkkuö ki itso' kitule: “Ák waté'ttsã u yuökwakpa tö, e' yönene ák bua'buaie.”* Ák e' dör Jesucristo chè. ¹² Ie' dör S'tsatkökwak. Skëköl kè wã yi skà patkéule ká i' ki s'tsatkoie. E' kueki Jesucristo eköl è wa s'tsatkërmi.

¹³ Mik iwökirpa tö isué tö Pedro ena Juan dör skle siarla, kè wöblaule yëkkuö wa erë ittöke buaë kè suane,

* 4:11 Salmo 118.22

eta ie'pa tkinewa. Ie'pa éna ianewa tö ie'pa bak shkök Jesús ta ittökatapaie. ¹⁴ Wëm buanene e' dur Pedro ena Juan ta, e' kueki ie'pa kè a iyënuuk tö e' dör kache. ¹⁵ Eta ipatkémirakitö u'rki ta ie'pa ate ileritsök. ¹⁶ Ie'pa iché ñi a:

—¿Wes sö wëpa i' wëmi? Kos Jerusalén wakpa wa ijcher tö i kè or yi a ese wé ie'pa tö etk. E' kè yënuuk se' a tö e' dör kache. ¹⁷ Erë ipauñusö as i'tami Jesús tté i' kè paköia ie'pa tö yi a, es kè itté bunukka ká wa'ñe.

¹⁸ Eta ikiéraitö ta iché iarak:

—Kè a' kawö ta'ia Jesús tté pakök yi a. Ñies a' kè kawö ta'ia yi wöbla'uk tté e' wa.

¹⁹ Erë Pedro ena Juan tö iütérak:

—A' wákpa tö ibikeitsó tö Skököl wöa yi ttö dalöie dör buaë sa' a, a' ttö ö ie' ttö. ²⁰ Erë i' su' sa' tö ena i' ttsé' sa' tö, e' pakeraë sa' tö kekraë sulitane a.

²¹ Eta iwökirpa tö ie'pa kí pauñé darërëe ta iémirakitö. Wëm kraulewa buanene e' kueki pé' kos tso' Skököl kikökka. E' kueki iwökirpa kè ulà dë'wa Pedro ena Juan we'ikök. ²² Wëm buanene Skököl diché wa e' kí duas tso' dabom tkëyök (40) kíta.

Jesús mik erblökwakpa tö ikié Skököl a

²³ Eta Pedro ena Juan émirakitö ta imiyal wé imalepa tso' ee. I' kos yé' sacerdotepa wökirpa ena judiowak kueblupa e'pa tö e' pakéraitö imalepa a seraa. ²⁴ Mik e' ttsé ie'pa tö, eta ie'pa ulitane kköché ñita Skököl a i' es: “A Skököl, ká jai ena ká i' ena dayë ena i' kos tso' iki, e' yö' be' tö. ²⁵ Ká iaiaë be' tö sa' kékëpa David dör be' kanè méso, e' ka' ttök Wiköl Batse'r wa. Ie' tö iyé' i' es:

‘¿Iók ká malepa wakpa uluneka taië troka taië Skököl ki? ¿Iók ie'pa ileritseke ñippök ie' ta? Kè e' wamblënuuk ie'pa a.

²⁶ Ká wökirpa ena blu'pa e'pa ulitane ñippakka ie' ta. Ie'pa ileritseke ñippök ie' ta ena wé pairi'bituitö idi' wa s'blúie e' ta.†
Es David tö iyë'.

²⁷ “Ttè e' dör mokië. Iwà sué sa' tö tö s'wökirpa kiè Herodes ena Poncio Pilato, e'pa ñi dapa'wéka ká i' a Israel aleripa ta ena pè' kè dör Israel aleripa esepa ta ñita Jesús we'ikök. Ie' dör be' kanè méso batse'r pairi'bitü be' tö idi' wa s'blúie e'. ²⁸ Es ì kos wé ie'pa tö ie' ta e' wé ie'pa tö wes be' tö isuletë'atbak es. ²⁹ A Skëköl, e' kueki ie'pa tso' sa' pauñuk darërëë, e' ttsó. Sa' dör be' kanè mésopa e'pa a diché kí mú Jesús tté pakoie kè suane. ³⁰ Be' diché kkachó. S'kirirke bua'úne, ì kè or yi a ese ú iwà kkachoe, ñies íyi ese ú taië Jesús dör be' kanè méso batse'r e' ttò wa.”

³¹ Mik ie'pa tö ikié one, eta wé ie'pa tso' e' ké wötine. Eta ie'pa ulitane a Wiköl Batse'r iënewa ta ie'pa tö Skëköl tté paké kè suane.

Jesús mik erblökwakpa ñi kime

³² Jesús mik erblökwakpa dör taië. Ie'pa kabikeitsöke ñikkëë, ulitane er ttsë'r ñittsëë. Kè yi tö icheku' tö ie'pa íyi e' dör ie'pa è icha, e' skéie e' dör ie'pa icha ñikkëë. ³³ Jesús ttekölpa tsá e'pa tö Jesús shkenekane, e' tté kí pakeke diché taië wa. Skëköl tö ie'pa kos kimeke taië. ³⁴⁻³⁵ Yi wa ká tso' ö ilè skà tso'rak iwá, ese watuekerakitö ta iské mekerakitö Jesús ttekölpa tsá e'pa a blatè wépa dör siarë esepa a wes e'pa kiane kime eköl eköl es. E' kueki kè yi weirku' siarë ie'pa shüa. ³⁶ Ie'pa shüa wëm tso' eköl dör Leví aleri datse ká kiè Chipre, e' kiè José. Jesús ttekölpa tsá tö ikiè méka Bernabé (e' kiane yëno s'pablökwak). ³⁷ Wëm

† 4:26 Salmo 2.1-2

e' wā kā tso'. E' watuétitö tã iské méitö Jesús ttekölpa tsá a as ie'pa tö s'siarëpa kimù iwa.

5

Ì sulu wamblé Ananías ena Safira e'pa tö e' pakè

¹ Erë wëm bak eköl kiè Ananías, e' tayë kiè Safira. E'pa tö kā watuéttsa. ² Etã wëm e' tö iká ské tsá yétttsa iwákpa a tã iëyök méitö Jesús ttekölpa tsá a wes kā ské seraã es. E' jcher ilaköl wã seraã. ³ Etã Pedro tö iché ie' a:

—A Ananías, ¿iók be' e' mettsã Satanás a kitö'wè tã be' kèitö kachök Wiköl Batse'r a? Ká watuébö e' ské kak tséatbö. ⁴ Kam be' tö iwataüttsã etã be' icha idir. Tã be' tö iwatuéttsã, etã iské dör be' icha. ¿iók be' ibikeitsé wamblé es? Be' kè kayëne s'ditsö a. Be' kaché Skököl a.

⁵ Mik e' ttsé Ananías tö etã ianewa duowaie. Etã ie'pa kos wã ijchenewa, e'pa suane taië. ⁶ Etã duladulapa welepa debitu tã inú patrëwarakitö tsémi blëwã.

⁷ Hora tka mañat e' ulatök, etã Ananías tayë dewã Pedro ska'. Wes iwëm de e' kè jcher ie' wã. ⁸ Tã Pedro tö ie' a ichaké:

—Ichó ña. ¿Mokì a' tö kā watuë kos a' tö iché ekkè?

Safira tö iüté:

—Tó, ekkè je'.

⁹ Pedro tö iché ia: ¿iók a' tö kawö mé ñi a Skököl Wiköl wötsiriuk? Wépa wã be' wëm nu mí blëwã, se e' wakpa doyalne tã írö ie'pa wã be' nu michoë blëwã ñies.

¹⁰ E' bet tã Safira anewa tã iduowa Pedro klò ska'. Mik duladulapa dewã tã Safira nu tër tã ie'pa wã inú mítser blëwã iwëm o'mik. ¹¹ Etã Skökëpa Jesús icha erule ulitane ena sulitane wã ijchenewa, e'pa suanerak taië.

Ì kè or yi a ese wé taië Jesús ttekölpa tsá tö

¹² Jesús ttekölpa tsá e'pa tö ì kè or yi a, ese weke taië pè' shua iwà kkachoië. Jesús mik erblökwakpa ulitane e' dapa'uke Salomón ùle a. ¹³ Pè' èltèpa tö ie'pa dalöieta' erè kè diché dè'ka e' tiukwa ie'pa shua. ¹⁴ Erè wépa erblé Jesús mik, wépa ena alakölpa, esepa kí iërkerak taië kekraë. ¹⁵ Pè' tö s'kirirke tsémirak katà shuélur ñala kkömik as Pedro tkò ta ilo mú ar esepa wele ki as ibuarne. ¹⁶ Nies ká tso' kos Jerusalén pamik, e' wakpa de taië s'kirirke wëttsë. Nies wimblupa sulusi s'tteke esepa wëttsë. Eta e'pa ulitane buanene seraä.

Jesús ttekölpa tsá wötënewa s'wöto wé a

¹⁷ Eta sacerdote kibi ena iklépa kiè saduceowakpa, e'pa ukyëneká taië Jesús ttekölpa tsá e'pa ki. ¹⁸ E' kueki iklö'wéwarakitö wötéwa s'wöto wé a. ¹⁹ Erè nañewe ta Skéköl biyöchökwak eköl tö s'wöto wékkö ppée ta iyéttsarak ta iché ia: ²⁰ “A' yúne Skéköl wé a. Ee a' e' duóka sene pa'ali Jesús ta, e' tté pakök sulitane a.” ²¹ Bule es bla'mi ta idewarak Skéköl wé a ta ie' kékarak s'wöbla'uk wes ie'pa a iyëne es.

Eta sacerdote kibi ena iklépa tö Israel aleripa wökirpa ulitane kiéttsa e' dapa'ukka ie'pa ta. Eta Jesús ttekölpa tsá e'pa tsuk patkérakitö. ²² Erè mik ishkékpa demirak s'wöto wé a, eta kè iwa ikunerak. Ta idebiturak ibiyó mukne ²³ ta ichéraitö:

—Sa' tö s'wöto wékkö kué wötëule buaë. Nies shkékpa tso'rak iwékkö kk'ö'nuk. Erè mik sa' tö iwékkö ppée, eta kè sa' wa yi kune ee.

²⁴ Mik Skéköl wé shkékpa wökir ena sacerdote wökir kibipa, e'pa tö ttè e' ttsé eta ie'pa éna ká chowa ta iñi chakérak: “¿Wes iwà döttsami?” ²⁵ E' ukuökí ta bet eköl de ibiyó muk ta iché iarak:

—Wēpa wötē'wā a' tō s'wōto wé a, e'pa tso'ne Skēkōl wé a s'wōbla'uk.

²⁶ Etā shkēkīpa wōkir mīā iyulōk ishkēkīpa tā. Iklō'wēwarak erē ie'pa suane dō' pē' tō s'tè ák wa, e' kuekī ie'pa kē wā iweineīā. ²⁷ Mik ideminerak etā itsémirakitō judiowak wōkirpa wōrkī. Etā sacerdote kibi tō iché ie'pa a:

²⁸ —Sa' tō a' a iyē' etkēme tō wēm e' tté kē pakar yēs. Etā jì wamblé a' tō? A' tō Jerusalén wakpa ulitane wōbla'wēke ttè e' wa. Ñies a' tso' ichök tō wēm e' kötēwā, e' nuī tkēnewā sa' mik.

²⁹ Erē Pedro ena Jesús ttekōlpa tsá malepa tō iūtérak:

—Sa' kawōtā Skēkōl ttò dalōiök s'ditsō ttò tsāta. ³⁰ A' tō Jesús ttōkwā ka' wötēulewā krus mik. Erē se' wakpa bak iaīā e' Kēkōl e' wák tō Jesús shkeō'kane. ³¹ Skēkōl tō ibatsékami e' ska' tkéser iulà bua'kka s'wōkirie ena s'tsātkōkwakie as Israel aleripa er mane'ū tā ie'pa kī ie'pa nuī olo'yarmi. ³² Íyī ikkē kōs su' sa' tō e' pakök sa' tso' a' a. Ñies Wikōl Batse'r mēne wēpa tō Skēkōl ttò dalōieke esepa a, e' tso' a' a ipakök.

³³ Mik ie'pa tō e' ttsé etā ie'pa uluneka tajē Jesús ttekōlpa tsá e'pa kī. Ie'pa éna ittakulur. ³⁴ Erē ie'pa shuā wēm tso' ekōl e' dōr fariseowak kiè Gamaliel. Ie' dōr s'wōbla'uk ttè dalōiēno wa wakpa ese ekōl. Sulitane tō ie' dalōieke tajē. Ie' e' duéka tā iché: “Jesús klépa yólur kañika ekuölö.” Etā ie'pa tō iyélur.

³⁵ E' ukuōkī tā ichéitō imalepa a:

—A yamīpa Israel alerīpa. A' isaū bua'ie tō ì wēke a' tō wēpa wikkēpa tā. ³⁶ A' éna ianú tō barbane wēm kiè Teudas e' e' ka'ka ichök tō e' dōr wēm tajē ese. Wēpa dōka cien tkēyök (400) e'pa e' yué ie' klépaie. Ie' du'wā kōtulewā tā iklépa pone'mi wì a dià a. Es ilone'. ³⁷ E' ukuōkī tā mik s'wōkirpa s'kiè shtök patkē', e' kēwō ska' tā

wēm skà eköl kiè Judas Galilea wak e' e' ka'ka. Pè' welepa e' yué ie' klépaie. Erè ñies ie' kötewā tā iklépa pone'mi sēraā wī a dià a tā ee ilone'. ³⁸ E' kueki ye' tō ichè a' a tō wēpa wī múat bèrè. Kè ì sulu wamblar ie'pa tā. Ì aleritseke ie'pa tō ena ì wēke ie'pa tō e' dör ttè ësè, e' tā bet tā kè ita'ia. ³⁹ Erè Skèköl ttè idir, e' tā kè a' e' alòpaka iki. A' isaú buaè dö' a' tso' ñippök Skèköl tā.

Ie'pa tō Gamaliel ttò iuté. ⁴⁰ Ie'pa tō Jesús ttekölpa tsá e'pa tsuk patkéne tā ippök patkérakitö tā iché iarak: “Kè a' a kawö ta'ia Jesús tté pakök.” E' ukuöki tā iémirakitö. ⁴¹ Es Jesús ttekölpa tsá e'pa e' yélur judiowak wökirpa wé a. Skèköl tō ie'pa mé weinuk Jesús tté kueki, e' tō ie'pa ttsé'wé buaë. ⁴² Es kekraë ká bit ekkè Skèköl wé a ñies u a u a ie'pa tō s'wöbla'wēke s'patteke Jesús dör wé pairine'bitu idi' wa s'blúie e' tté buaë wa.

6

Wēpa kul shushtérakitö Jesús ttekölpa tsá kimoie

¹ E' kēwö ska' tā Jesús ttökātapa kí daparke taië e'pa dör judiowak. Ie'pa welepa ttöke griegoie, esepa tō imalepa ttöke iwakpaie e'pa cheke suluë. Ie'pa tō icheke:

—Mik chkè blatërke kekraë, etā sa' tayēpa schó, esepa kè a imène kos imalepa ttöke judioie esepa a imène ekkè.

² E' kueki Jesús ttekölpa tsá dabom eyök kí bül (12), e'pa tō Jesús ttökātapa ulitane kié e' dapa'uk tā ichéitörak:

—A yamipa, kè idör buaë sa' a s'wöbla'wēke sa' tō Skèköl ttè wa e' kané mukat íyi watioie e' è kueki. ³ E' kueki a' shuā wēpa yuló kul as kanè e' ù ie'pa tō. Wēpa sūule sulitane wā tō ie'pa a Wiköl Batse'r tso' taië ena ikabikeitsö buaë, esepa shushtó tā sa' tō ie'pa mekeka kanè ñe' uk. ⁴ Etā sa' e' ché kekraë ttök Skèköl tā ena s'wöbla'uk ie' ttè wa.

⁵ E' wër buaë ie'pa ulitane wa. Ie'pa tö Esteban shushtë. E' erblé buaë Skëköl mik ñies ie' a Wiköl Batse'r tso' taië. Ñies Felipe, Prócoro, Nicanor, Timón, Pármenas ena Nicolás e'pa shushtë ie'pa tö. Nicolás dör Antioquía wak, e' e' yö'bak judiowakie. ⁶ Eta itsémirakitö wé Jesús ttekölpa tsá e'pa tso' ee. Eta ie'pa ulà méka wëpa ñekkëpa k_i ta ie'pa tö ikié S'yé a tö ikimú.

⁷ Es Skëköl ttè k_i pakanemi taië. Ñies Jesús ttökatapa k_i daparke taië Jerusalén. Ñies judiowak sacerdotepa taië tö ttè mik se' erblöke e' wà klö'wé.

Esteban klönewa

⁸ Eta Skëköl er buaë ché Esteban a taië ta diché méitö ia taië. E' wa ì kè or yi a ese wekeitö taië pë' shua iwà kkachöie tö Jesús tté dör mok_i. ⁹ Erë wëpa welepa tö Esteban chémi suluë. Ie'pa welepa dör judiowak ñi dapa'wo wé kiè Kanè Mésopa Auleshka Esepa Wé e' wakpa. (Ie'pa bak klöulewa kanëblök erë iyërulunëbak.) Ñies judiowak welepa tso' datse Cirene, Alejandría, Cilicia ena Asia, e'pa kos wöñarke Esteban k_i. ¹⁰ Erë Wiköl Batse'r tö Esteban a ttè mé ttoie buaë, e' kuek_i ie'pa kè a e' alirka ie' k_i. ¹¹ E' kuek_i ie'pa tö wëpa welepa patué kachök: “Sa' ittse tö Esteban tso' Moisés ena Skëköl chök suluë.” ¹² E' wa ie'pa tö pë' uluwéka taië Esteban k_i. Ñies judiowak kueblupa ena s'wöbla'uk ttè dalöiëno wa wakpa uluwékarakitö Esteban k_i. E' kuek_i ie'pa de Esteban ska' ta iklö'wëwarakitö tsémirakitö judiowak wökirpa ska'. ¹³ Ñies wëpa yulérakitö kachöie, e'pa tö iché:

—Këkraë wëm w_i tö Skëköl wé dör batse'r i' ena Moisés ttè dalöiëno e' cheke suluë. ¹⁴ Ñies sa' tö ie' ttsé ichök tö Jesús Nazaret wak e' tö Skëköl wé tskerawa ena sene me'at Moisés tö se' a e' mane'wekettsaitö.

¹⁵ Etā judiowak wökirpa kōs tulur ee, e'pa tō isué tō Esteban wō wër dalölöë wēs Skëköl biyöchökwak wō wër es.

7

Esteban e' tsatké

¹ Sacerdote kibi, e' tō Esteban a ichaké:

—Ì kī be' kkatërke ¿e' dör moki?

² Ie' iüté: “A yamipa, a yépa, ye' ttò ttsó. Mik se' kékëpa Abraham bak iaiaë Mesopotamia, kam imi' senuk Harán, etā ee se' Këköl olo tã' taië, e' e' k kayë' ie' a. ³ Etā ichéitö ia: ‘Be' ká ena be' yamipa, e' múat tã be' yúshka senuk, ká kkachekeyö be' a ee.’ ⁴ Es Abraham e' yé'ttsa Caldea atë Mesopotamia ee, tã imía senuk Harán. Iyé blënewa e' ukuöki tã Skëköl tō ie' patké' senuk íe, wé se' serke i' ñe tã ee. ⁵ Kuaë Skëköl kè wã ká i' mène ie' a yës, elkela wë'ia è kè ie' a imène. Eré e' kèwö ska' tã ie' kè ala'r tã', erë Skëköl kablë' ie' a ttè i' wa: ‘Ká i' meraëyö be' aleripa a be' blënewa e' ukuöki ta.’ ⁶ Ñies Skëköl tō iché ie' a: ‘Be' aleripa serdaë ká kua'kī kī wēs ká kua'kī wakpa es. Ee ie'pa klördawã kanè mésoie kè patuëta' ese. Iweirdarak siarë dökã duas cien tkëyök (400).’ ⁷ Erë Skëköl tō iché ia: ‘Ká wé wakpa tō ie'pa we'ikera, esepa ské we'ikerayö siarë. E' ukuöki tã ie'pa e' yörattsa ká e' a as ye' dalöiörakitö ká i' kī.’ ⁸ Etā Skëköl tō iché ia: ‘A' ala'r wëpa kurke kōs esepa tottola kkuölitla tóó tsir. E' ú kekraë iwà kkachoie tō ye' tō ttè me' be' a.’ E' kuekī mik ie' alà kiè Isaac kī ká de pàköl, etã itóttola kkuölitla téeitö tsir. Es ñies Isaac tō iwé ilà Jacob* tã. E' sù Jacob tō iwé ila'rla dabom eyök kī böl (12), e'pa tã. Ie'pa dör se' dör Israel aleripa ditséwöpa dabom eyök kī böl e' yépa tsá.

* 7:8 Jacob: E' kiè ñies Israel.

⁹ “Erë se' yépa tsá, e'pa ukyëne iël tsirla kiè José e' ta. E' kueki ie'pa tò iwato'ttsa ta yi tò itué e' wa imítser Egipto. Erë Skëköl tso' ie' ta. ¹⁰ Ie' tò itsatké kekraë kos iweirke e' shua. Nies kabikeitsè buaë méitö ia. Nies ie' tò Faraón ké isaük er bua' wa (Egipto wakpa tò iblúpa kos kiè Faraón). E' kueki Faraón tò ie' tkéka Egipto iyi kos e' wökirie nies ie' wák u wökirie.

¹¹ “E' ukuöki ta ketba aneká Egipto ena Canaán, e' kos a. E' wakpa weine siarë. Se' yépa tsá kè wa ì kune ñanoie katanoie. ¹² Erë mik Jacob wa ijchenewa tò iyiwö tso' Egipto, eta ie' tò ila'r dör se' yépa tsá, e'pa patkëmi iyiwö tauk ee, e' dör ie'pa tsá dë'rö. ¹³ Mik ie'pa skà dë'rö eta José tò ie'pa a iché: 'ye' dör a' ël.' Es Faraón wa ijchenewa tò yi ditséwö José dör. ¹⁴ E' ukuöki ta ie' tò iyé Jacob ena iyamipa kos tsuk patké as idöbitu Egipto. E'pa döka dabom kuryök ki skel (75). ¹⁵ Es Jacob minea senuk Egipto. Eë iblënewa. Eë ie' ala'r dör se' yépa tsá, e'pa blërulune nies. ¹⁶ Ie'pa nu minene Siquem wötëwa iwakpa pö a. Ká e' wato' Hamor ala'r tò Abraham a pöie.

¹⁷ “Erë Skëköl kablë' Abraham a ttë i' wa: 'Be' aleripa yerattsane ye' tò Egipto.' Mik e' kéwö dökewatke, eta se' yépa kí alöne taië. ¹⁸ E' kéwö ska' ta Egipto blú ské tkëneká, e' kè wa José pakè jcher. ¹⁹ Blu' e' tò se' yépa kitö'wé we'iké siarë. Ie' tò ie'pa ké kësik wa ila'rla wëpa kune erpa esepa kos watöktsa as iduölur. ²⁰ E' kéwö ska' ta Moisés kune', e' dör buaala shutë. Iyé ena imi tò ikkö'né u a döka sí mañat. ²¹ E' ukuöki ta ie'pa kawöta iwatöktsa as iduöwa erë Egipto blú alà busi tò ikuéwa tsémi u a tala'wë wës iwák alà es. ²² Es Moisés yöne taië iyi jcher Egipto wakpa wa, kos e' wa. Ittò è ki ittënëwa, nies ì wekeitö e' è ki iwënëwa tò ie' dör wëm taië ese.

²³ “Mik ie' ki duas de dabom tkëyök, (40) eta ibikeitséitö:

‘Ye' mía ye' yamipa dör Israel aleripa e' weblök.’ ²⁴ Etá ie' isué tö egiptowak eköl tso' Israel aleri eköl we'ikök. E' kueki ie' mishka itsatkök ta egiptowak ttéwaitö iskéie. ²⁵ Ie' ibikeitsé tö iyamipa Israel aleripa éna iarimi tö Skököl tö ie' patké ie' pa tsatkök. Erë kè iwà ane ie' pa éna. ²⁶ Bule es ta ie' tö Israel aleripa kué böl ñippök. Ie' ki ikiane tö ie' pa mú er buarne ñi ki, e' kueki ichéitö iarak: ‘A' dör ñi yamipa. ¿Iók a' ñi we'ikò?’ ²⁷ Etá eköl tö iyami we'ikeke, e' tö Moisés patkéumi ta ichéitö ia: ‘¿Yi tö be' tkéka sa' wökirie sa' shulökwakie?’ ²⁸ ¿Be' éna ye' ttakwa wes chki be' tö egiptowak kötwá es?’ ²⁹ E' ttséwa Moisés tö ta itkashkar ká bánet kiè Madián ee. Ee isené wes ká kuá'ki wak es. Ee ila'rla kéka böl.

³⁰ “Ee ie' sené dè duas dabom tkëyök (40). Ká et ta Skököl biyöchökwak eköl e' kkaché ie' a Sinaí kébata a tsinet ká sir poë wé kè yi serku' ese ska'. Ie' e' kkaché ia kal tsir wönarke bö'ie e' shua. ³¹ Moisés wökranewa iweblök. Erë mik ie' e' skéwa isauk bua'iewa ta Skököl ttò ttséitö, e' tö iché ia: ³² ‘Ye' dör be' yépa bak iaiaë kiè Abraham, Isaac ena Jacob e' pa Kököl.’ Etá Moisés painéka taië suane kueki. Ie' kè diché dè'kaia isauk. ³³ Etá Skököl tö iché ia: ‘Wé be' dur, e' ké dör batse'r, e' kueki be' klökkuö yóttsa. ³⁴ Moki ye' isué tö wépa dör ye' icha tso' Egipto e' pa weirke. Ie' pa kköchöke e' ttséyö. E' kueki ye' dè'ttsa ie' pa tsatkök. E' kueki ittso': Ye' tö be' patkerami Egipto.’

³⁵ “Israel aleripa tö iyé' Moisés a: ‘¿Yi tö be' tkéka sa' wökirie sa' shulökwakie?’ Eré ie' pa tö ie' waté'ttsa, erë Skököl tö patké' ie' pa wökirie ena ie' pa tsatkökwakie. E' bak mik Skököl biyöchökwak e' kkayé'wa ie' a kal tsitsirla shua etá. ³⁶ Es Moisés tö se' yépa yé'ttsa Egipto a. Egipto ena dayë kiè Dayë Mat ee ie' tö ì kè or yi a ese wé taië. Nies

e' wéitö duas dabom tkëyök ekkë ká sir poë wé kè yi serku' ee. ³⁷ Ie' wák tö iché ie'pa a: 'Skëköl tö itteköl keraká eköl a' shuá wës ye' es.' ³⁸ Mik Israel aleripa tso'rak echkaie ká sir poë wé kè yi serku' ee, etá Moisés tso' ie'pa shuá. Ñies Skëköl biyöchökwak tté ie' ta Sinaí kébata a. Skëköl tté tö sene meke siá e' yëne ie' a ee, e' pakéne ie' tö se' a.

³⁹ "Erë se' yépa kè wá ie' tté dalöiëne'. Ie'pa tö ie' tté waté'ttsa. Ie'pa shkakne Egipto. ⁴⁰ E' kueki ie'pa tö iché Aarón a: 'Moisés tö se' yé'ttsa Egipto a. Kè sa' wá ijcher ì tka ie' ta. E' kueki íyi diököl yuó se' a böt mañat dalöie skëkölíe as e' mi' se' wëttsuk.' ⁴¹ Es ie'pa tö baka pupula diököl yué dalöie. Ta iyiwak jchérakitö mè baka diököl a idalöioie. Ie'pa tö e' kèwö tkö'wé taié, baka diököl yuérakitö iwákpa ulà wa, e' dalöioie. ⁴² E' kueki Skëköl e' skéttsá ie'pa yöki. Ie' tö ie'pa méat as bëkwö dalöiorakitö ie' skéie. Es Skëköl ttekölpa tö ikit iyëkküö ki. Ie'pa tö ichè:

'A Israel aleripa,

mik a' sene' ká sir poë wé kè yi serku' ee duas dabom tkëyök (40) ekkë,

etá a' tö iyiwak jchë' erë e' kè dör ye' dalöioie.

⁴³ Wé dalöieke pë' tö skëkölíe kiè Moloc, e' diököl wéla dami a' wá.

Ñies wé dalöieke pë' tö skëkölíe kiè Refán e' diököl bëkwöie, e' dami a' wá.

E' kos diököl yué a' wákpa tö, esepa dami a' wá dalöie.

E' kueki ye' tö a' patkeraë kamië weinuk siarë Babilonia wí'kie.'†

Es ikiteat.

⁴⁴ "Es mik se' yépa bak senuk ká sir poë wé kè yi serku' ee, etá ie'pa wá datsi'küö dami e' shükuekear Skëköl wéie.

† 7:43 Amós 5.25-27

E' a ie' bak e' kkachök ie'pa a. U e' yöne wes ie' tö Moisés ka' iyuök es, wes ie' tö ikkayë' ia es. ⁴⁵ E' ukuök_i ta u e' méat se' yépa bak e'pa tö ileripa a. Mik ie'pa demi Josué ta pé' kuá'ki wakpa ká klö'ukwá, etá u e' mirwarak iwá. Skéköl tö pé' kuá'ki wakpa uyéttsá ie'pa yöki. E' ukuök_i ká taië ta David tkëneká blu'ie. E' kèwö ska' ta u yöne iaiaë datsi'kuö wa, e' tso'ia. ⁴⁶ David wër buaë Skéköl wa ta ie' a David tö kawö kié ie' dalöio wé yuoie Israel aleripa a. ⁴⁷ Erë David alà kiè Salomón, e' tö Skéköl wé e' yué. ⁴⁸ Erë Skéköl dör íyi ulitane tsata e' kè ser u yué s' ditsö tö ese a. Es itteköl eköl tö iyë'at, e' tö ichè:

⁴⁹⁻⁵⁰ 'Skéköl tö ichè:

Ká jai e' dör ye' e' tkoie.

ká i' dör ye' klò tkoser.

Ye' wák tö íyi qos yö',

e' kueki ¿wes a' tö u yuèmi ye' a?

¿Wes a' tö ká mèmi ye' a enoie?†

Es ikiteat.

⁵¹ “Erë a' kè tö Skéköl dalöieta'. A' er darërë. A' kukuöña darërë. Këkraë Wiköl Batse'r wöklö'wè a' tö. A' dör wes a' yépa bak ká iaiaë es. ⁵² Ie'pa tö Skéköl ttekölpa qos we'ik. Es ñies ittekölpa bak ichök tö yi dör Yësyësë Chökle e' datse, e'pa kötulur ie'pa tö. I'ñe ta yi dör Yësyësë Chökle ñe' detke, erë iwatuéttsá a' tö ttèwá. ⁵³ A' ulá a' Skéköl ttè dalöiëno dè' ibiyöchökwakpa wa. Erë a' kè tö idalöiè.”

Esteban ttéwá ie'pa tö

⁵⁴ Mik iwökirpa tö ì pakè Esteban tö e' ttsé, etá ie'pa uluneká ik_i taië. Ie'pa kà wötéwá ulune è kueki. ⁵⁵ Erë Esteban ki Wiköl Batse'r kí de taië ta iwö kéka ká jai a ta

† 7:49-50 Isaías 66.1-2

Skëköl olo taië e' suéitö. Ñies ie' tö Jesús sué dur Skëköl ulà bua'kka. ⁵⁶ Ie' tö iché:

—¡Isaú! Ye' tso' isauk tö ká jaì wékkö àr áie. Ñies Jesús dör S'ditsö Alà e' sauk ye' tso' tö idur Skëköl ulà bua'kka.

⁵⁷ Erë ie'pa e' kukuõña wötéwà as kè iwattsër. Età ianekarak taië tã imishkarak seraà Esteban ki. ⁵⁸ Tã iyéttсарakitö Jerusalén a mítser u'rkí ee, tã ie'pa tö ie' témi ák wa ittowaie. Esteban kkatökwakpa tso' itök, e'pa datsi' me'itörak duladula kiè Saulo e' a blè.

⁵⁹ Ie'pa tso' Esteban tök ák wa, e' dalewa ie' tö ikié Skëköl a i' es: “A Skëképa Jesús, ye' wiköl tsúmi be' ska.”
⁶⁰ E' ukuökí tã ie' e' tkéwà kuchë kí tã ianekà taië: “A Skëképa, ì sulu wamblök itso'rak, e' nuí olo'yó ie'pa ki.”

Mik e' chéitö tã iduowà.

8

¹ Esteban ttéwà ie'pa tö e' tö Saulo ttsé'wé buaë.

Saulo tö Jesús mik erblökwakpa we'ikémitke

E' diwö shà tã Skëképa Jesús icha erule tso' Jerusalén e'pa we'ikémitke pè' tö. Ie'pa kôs tkayalmi dò Judea ena Samaria. Erë Jesús ttekölpa tsá e'pa kè mineyal. ² Wëpa welepa tö Skëköl dalöieke taië, esepa tö Esteban nu bléwà tã ie' ieitsérakitö taië. ³ Erë Saulo tö Skëképa Jesús icha erule e'pa we'ikémi siarë. Ie' mirwà u a u a ie'pa yöktsa kuulemi patkèmi wötèwà s'wöto wé a wëpa ena alakölpa ñies.

Jesús tté pakane Samaria wakpa a

⁴ Erë wëpa bakyalmi Jerusalén, e'pa tö Jesús tté buaë pakémir ká wa'ñe wé imirwarak ee. ⁵ Es Felipe mía Samaria. Eë ie' tö wé pairine'bitü idi' wa s'blúie e' tté pakémi ká e' wakpa a. ⁶ Mik ie'pa tö ie' ttöke e' ttsé ñies ì kè or yi a ese wekeitö, e' suérakitö etã ie'pa tö ittò kïttseke bua'iewà. ⁷ Es pè' a wimblupa sulusi tso', esepa

bua'wéneitö tajë. Wimblupa sulusi yërulune arkekarak tajë. Es ñies s'kraulewā tajë ena s'bachiulewā tajë, esepa buanene buaë. ⁸ E' kueki ká e' wakpa kos ttsë'ne buaë.

⁹ Eta ká e' a wëm tso' eköl kiè Simón. Ie' kanëblë'mi iaiäë wës awá es. E' wa ie' tö Samaria wakpa kitë' tajë. Es ie' e' kkeö tö ie' dör imalepa tsata. ¹⁰ Ká e' wakpa ulitane, siarëpa ñies inuköl blúpa, e'pa tö ie' ttò klöo' buaë. Ie'pa tö iyë': “Skëköl kiè Diché Tajë, e' e' yué Simónie.”

¹¹ Bànet ie' tö ie'pa kitë'bitu ikanè wa. E' kueki ie'pa tö ie' ttò iütë' buaë. ¹² Erë mik Felipe tö ì blúie Skëköl tso' e' tté buaë paké ñies Jesucristo tté buaë paké, eta ie'pa tö iklö'wé ta ie' wöskuélor wëpa ena alakölpa. ¹³ Ñies Simón wák erblé Jesús mik ta iwöskué. Ie' michoë Felipe ta kekraë. Es ie' isué tö ì kè or yi a ese weke Felipe tö tajë, e' tö ie' tkiwéwa.

¹⁴ Mik Jesús ttekölpa tsá tso' Jerusalén, e'pa wa ijchenewā tö Samaria wakpa tö Skëköl ttè klö'wé, eta ie'pa tö Pedro ena Juan patkëmi eë. ¹⁵ Mik idimirak, eta ikiérakitö S'yé a Samaria wakpa tö iklö'wé, e'pa ki as Wiköl Batse'r dö ie'pa ki. ¹⁶ Kam Wiköl Batse'r döbitu ie'pa ulitane ki. Ie'pa wösuule Skëképa Jesús ttò wa, e' è o' ie'pa tö. ¹⁷ E' kueki Pedro ena Juan ulà méka ie'pa ki ta Wiköl Batse'r de ie'pa ki.

¹⁸ Simón tö isué tö mik Jesús ttekölpa tsá ulà méka ie'pa ki eta Wiköl Batse'r debitu iki. E' kueki ie' tö inuköl watké Pedro ena Juan a, ¹⁹ ta ie' tö iché iarak:

—A' wa diché tso' se, e' mú ye' a as yi ki ye' ulà mèka ta ese ki Wiköl Batse'r döbitu wës a' tö iweke es.

²⁰ Pedro tö iütë':

—Be' tö ibikeitsè tö ì kakmè Skëköl tö e' tormi inuköl wa, e' kueki be' inuköl weinú kekraë be' wák ta. ²¹ Be' er kè dör yësyësë Skëköl wöa, e' kueki diché i' kè menuk be'

a. ²² Be' er mane'ú ì sulu wamblekebö i', e' yöki. Skököl a ikió as ì bikeitsébö suluë isalema e' nuí olo'yèmiitö be' ki. ²³ Ye' tö isué tö be' er dör suluë kësik ème. E' wä be' wák kōs tso' klöulewa.

²⁴ Simón tö iüté:

—Skököl a ikió as ì kōs ché a' tö e' kè tkò ye' ta.

²⁵ Eta ì o' Skököl tö ie'pa ta e' ttè paké Pedro ena Juan tö. Ñies s'pattérakitö Skökëpa Jesús tté wa. E' ukuöki ta ie'pa míyalne Jerusalén. Ta ñala wa Samaria shua ká tso' taië, e' wakpa a ie'pa tö Jesús tté buaë pakerami wēs imirdak es.

Felipe tö Etiopía wák eköl wöbla'wé

²⁶ E' ukuöki ta Skököl biyöchökwak eköl tö iché Felipe a: “Be' yúshka dayë ñak kke Jerusalén ñalé wa dö Gaza.” Ñala e' tkökemi ká sir poë wé kè yi serku' e' kke. ²⁷ Eta Felipe mía ta ñala e' ki wëm kuítö eköl, e' dör Etiopía wak. Ie' dör iká wökirpa e' eköl. Ie' dör alaköl tso' Etiopía blúie, e' inuköl blök wökir. Ie' dare Jerusalén Skököl dalöiök. ²⁸ Ie' mirwane ikaska' karreta ki, e' a itkër yëkkuö kit Skököl tteköl kiè Isaías tö, e' sauk.

²⁹ Eta Wiköl Batse'r tö iché Felipe a: “Be' yú, be' e' skówa karreta se o'mik.” ³⁰ Mik Felipe e' skéwa karreta o'mik, eta ie' tö ittsé tö Etiopía wak tö Skököl yëkkuö kit Isaías tö, e' aritserami. Felipe tö ie' a ichaké:

—Yëkkuö se aritseke be' tö ¿e' wà ane be' éna?

³¹ Ie' tö iüté:

—Kè yi ku' ye' wöbla'uk ta ¿wēs ye' a iwà armi?

Ie' tö Felipe kié e' tkökka ie' o'mik. ³² Ie' tö iaritserami wé ichéitö:

“Ie' dör wēs obeja urula tsèmi ttèwa es.

Wēs obeja pupula kè arta' mik iköyök tërke eta, es ñies kè ie' wä ì yène.

³³ Ie'pa tö ijaëwé siarë ta ikichatéttsarakitö,

erë ì k_i ikichatënettsa e' kè dör moki.
 Ie' ttéwarakitö as kè iseria ká i' k_i,
 e' kuek_i kè ie' alà ate.”*

³⁴ Etiopía wak tö Felipe a ichaké:

—Be' we'ikèyö, ichó ña, ¿yi cheke Skëköl tteköl Isaías tö
 ttè i' wa? ¿Ie' wák e' chöke ö o'ka chekeitö?

³⁵ Eta ttè aritsétkeitö, e' wa Felipe tö ie' a Jesús tté buaë
 pakémi. ³⁶⁻³⁷ Es ittöramirak ñala wa ta ee di' kuérakitö.
 Eta Etiopía wak tö iché Felipe a:

—Íe di' tso'. ¿ì kuek_i be' kè tö ye' wöskuè?†

³⁸ Eta Etiopía wak tö iché karreta ñakökwak a tö karreta
 wöklö'úwa. Ta ie'pa e' éwa ta imíyal bölä di' a. Ee Felipe
 tö Etiopía wak wöskué. ³⁹ Mik ie' yélune di' a eta Skëköl
 Wiköl tö Felipe batsékami bet ká bánet a, Etiopía wak kè
 wa isuneia yës, erë imía ttsë'ne buaë kaneë. ⁴⁰ Eta Felipe
 tö isué tö ie' demi dur ká kiè Azoto ee. Eta ie' mía Jesús tté
 buaë pakök ká tso' ñala k_i ese wakpa a dömi Cesarea.

9

Saulo er mane'wé Jesús a

¹⁻² E' dalewa Saulo tso'ia Skëképa ttökatapa pauñuk
 ttëwa. E' kuek_i ie' mía sacerdote kibi ska' yëkkuö
 kiök shkowaie judiowak ñi dapa'wo wé tso' Damasco ee.
 Yëkkuö e' k_i kawö mène ia s'tso' ttè kiè Jesús dör Ñala
 Pa'alí e' dikia esepa yulök klö'wowa tsëmi Jerusalén, kè
 tkine tö alakölpa ö wëpa idir. ³ Erë mik Saulo dökemitke
 tsinet Damasco e' bet ibiteshka ká jaì a bö'wöie e' olo bune

* 8:33 Isaías 53.7-8 † 8:36-37 Yëkkuö kitule ká iaiaë keweie imalepa yöki
 esepa kè wa 8.37 kiteka. Ttè e' tö iché: Felipe tö ie' a iché: —Be' tö ttè i' klö'wé
 mokjë e' ta be' wösurmi. Eta wëm tö iüté: —Ye' tö iklö'wé tö Jesucristo dör
 Skëköl Alà e'.

taië ipamik. ⁴Ta ie' anere iski. Eta ttò ttséitö tö iché ia: “A Saulo, a Saulo, ¿iök be' tö ye' we'ikeke?”

⁵Saulo tö ie' a ichaké: “A Skëképa, ¿be' dör yi?” Eta iiuténeitö: “Ye' dör Jesús we'ikeke be' tö e'. ⁶Erë be' e' kókā. Be' yú Damasco. Eë be' a iyërmi tö ì uk be' ké.”

⁷Eta Saulo wapiepa tkirulune taië. Ie'pa tö yile ttò ttsé, erë kè ie'pa wa yi sune. ⁸E' ukuökī ta Saulo e' kēka ta iwöbla shuppée, erë kè iwawër. E' kueki itsémirakitö ulà iërule dö Damasco. ⁹Eë ie' sené ká mañat kè wöbla wawëne, kè wa ì ñane, kè wa ì yane yës.

¹⁰Jesús ttökata eköl kiè Ananías serke Damasco e' a Skëképa Jesús e' kkachéwa kabsueie ta iché ia: “¡A Ananías!” Ie' iiuté: “A Skëképa Jesús, ichó ña.”

¹¹Skëképa tö iché ia: “Be' yú ñala kiè Yësyësë e' ki dö Judas u a. Eë wëm tso' kiè Saulo datse Tarso, e' yuló. Ie' tso' ttök S'yé ta. ¹²Ie' tö isué kabsueie tö wëm kiè Ananías dewa ie' ska' iulà méka iki as iwöbla wawërne, e' dör be'.”

¹³Ie' iiuté: “A Skëképa Jesús, erë ye' a iyëule taië ie'pa wa tö wëm e' tö be' icha batse'r tso' Jerusalén e'pa we'ikeke siarë. ¹⁴I'ñe ta e' de íe. Sacerdotepa wökirpa tö kawö mé ie' a as wépa tö be' a e' tsatkè kié esepa kos klö'uluritö.”

¹⁵Erë Skëképa Jesús tö iché ia: “Be' yú. Ye' tö wëm e' shukitbak as ie' tö ye' tté pakò pë' kè dör Israel aleripa esepa a ena iblúpa a ñies Israel aleripa a. ¹⁶Ye' wák tö ikkacheraë ie' a tö ie' kawöta weinuk ye' tté kueki.”

¹⁷Eta Ananías demi Saulo ska' ta iulà méka iki ta iché ia:

—A yami Saulo, Skëképa Jesús e' kkayë'wa be' a ñala ki be' dé'bitü e' wa, e' tö ye' patké as be' wöbla wawërne ñies as Wiköl Batse'r iërwa be' a.

¹⁸ E' bet tã ì tso' Saulo wöbla mik nima kkuö sù, e' darolone tã iwöbla wawënene. Etã ie' e' kéka tã imía tã ie' e' wöskuée. ¹⁹ E' ukuöki tã ichkéne tã idiché iënene. Etã ie' e' tséat Jesús ttökatapa welepa tso' Damasco e'pa tã ká elke ulatök.

Saulo tö Jesús tté paké Damasco

²⁰ E' ukuöki tã bet Saulo tö Jesús tté pakémi judiowak a ie'pa ñi dapa'wo wé kos a. Ie'pa a ichekeitö tö Jesús dör Skéköl Alà chökle. ²¹ Wépa kos tö ie' ttò ttsé, e'pa wökrarulone ittök tã iñi chakérak:

—¿Ie' wí kè dör wépa tö e' tsatké kié Jesús a tso' Jerusalén esepa we'ik siarë? ¿Kè ie' wébi wí dë'bitu ie'pa esepa tso' íe e'pa klö'ukwa wömèttsa sacerdotepa wökirpa ulà a?

²² Erë Saulo tö Jesús tté pakéwaie kítã kítã, kè suane. Ie' tö ikkaché judiowak serke Damasco e'pa a tö moki Jesús dör wé pairine'bitu idi' wa s'blúie e'. Ttè e' wa ie'pa siwá'blöwélur ie' tö.

Saulo tkashkar judiowak yöki

²³ Ká taië ukuöki tã judiowak tté ñita Saulo ttowa. ²⁴ Erë e' jchenewa ie' wa. Ñië nañeë ie'pa tso' ipanuk ttéwa ká wékkö dökettsa ese ska'. ²⁵ Erë nañewe iklépa tö ie' iéka kkó blublu a tã iíemi ká tso' kköiëule shkit kakkëë e' mik enaena. Es ie' tkashkar.

Saulo dene Jerusalén

²⁶ Mik ie' demi Jerusalén, etã ie' dapa'wak Jesús ttökatapa tã. Erë ie'pa kè wa iklöone tö moki ie' erblé Jesús mik. Ie'pa suane iyöki. ²⁷ Erë Bernabé wa ie' mítser kkachè Jesús ttekölpa tsá e'pa a. Bernabé tö ipaké ie'pa a tö Saulo tö Skéképa Jesús su' ñalã kí tã eë itté ie' tã. Nies ichéitö tö Saulo kapakétke Damasco Jesús ttò wa kè suane. ²⁸ Es

Saulo e' tséat Jerusalén dami Jesús ttekölpa tsá e'pa ta. Kekraë ie' tö Skëkëpa Jesús tté pakeke kè suane. ²⁹ Nies ie' tö itté pakeke judiowak ttöke griegoie esepa a. Erë ie'pa ñi iutéka taië ie' ta. E' kueki ie'pa tö ima'wé ttèwà. ³⁰ Mik e' jchenewà iyamipa wà, età ie'pa wà imítser Cesarea, ee ta ipatkémi dò Tarso.

³¹ E' ukuökj ta Skëkëpa Jesús icha erule erule kos tso' Judea ena Galilea ena Samaria e'pa atene bèrë, kè yi tö ie'pa we'ikèia. Ie'pa yörke buaë Skëköl ttè dikia. Nies ie'pa tö Skëköl dalöieke taië. Wiköl Batse'r tö ie'pa kimeke as ikí iërdak taië kekraë.

Eneas buanene

³² Pedro shköke ká wa'ñe ie'pa kos pakök wé ie'pa tso' ese ska'. Età ide ñies ká kiè Lida s'batse'rpa serke ee e'pa pakök. ³³ Età ee wëm eköl kuéitö kiè Eneas e' kraulewà me'r kà kī e' kī duas de pàköl (8). ³⁴ Pedro tö iché ia:

—Jesucristo tö be' bua'wéne. Be' e' kóka ta be' kà pashuó.

E' bet ta ie' e' kéka. ³⁵ E' ukuökj ta pè' tso' Lida ena Sarón, e'pa ulitane tö ie' sué. E' kueki ie'pa er mane'wé Skëkëpa Jesús a.

Dorcas shkenekane

³⁶ E' kéwö ska' ta ká kiè Jope ee alaköl serke eköl dör Jesús ttökata, e' kiè Tabitá (griegoie ikiè e' dör Dorcas*). Kekraë ie' bak ì buaë uk ena s'siarëpa kimuk. ³⁷ Ká e' ulatök ta ie' kirinewà ta iduowa. Inú pasunetke ta iméka úshu kákke ese a. ³⁸ Jope atë Lida o'mik wé Pedro tso' ee. Jesús ttökatapa serke Jope, e'pa wà ijcher tö ie' tso' Lida, e' kueki ie'pa tö wëpa patké böi ichök ie' a: “Be' shkó bet Jope.”

* 9:36 Dorcas: S'kiè e' wà kiane chè sulj.

³⁹ Es ie' mǎ ie'pa ta. Mik idemirak, eta ie' tsémi u shua wé Dorcas nu me'r ee. Alakölpa schó† kos iuke taië. E'pa iënewa ie' pamik. Eta ie'pa tö paio ena datsi' yö' Dorcas tö mik ibak ttsë'ka eta, e' kkaché Pedro a. ⁴⁰ Eta Pedro tö ie'pa ké e' yökulur ta ie' e' tkéwa kuchë ki ta itté S'yé ta. E' ukuökí ta ie' tö inú sué ta iché:

—A Tabitá, be' e' kóka.

Eta ie' wöbla shuppée. Mik Pedro suéitö eta ie' e' tkéser. ⁴¹ Pedro tö iklö'wéwa iulà a duéka. E' ukuökí ta ie' tö alakölpa schó ena s'batse'r malepa kié ta Tabitá kkachéitö ie'pa a ttsë'ka. ⁴² E' jchenewa Jope wakpa kos wa ta ie'pa taië erblé Skékëpa Jesús mik. ⁴³ Ta Pedro e' tséat taië Jope wëm kié Simón e' ska'. Wëm e' dör iyiwak kkuölit kanéukwak.

10

Pedro tö Jesús tté buä paké Cornelio a

¹ Ká kié Cesarea ee wëm serke eköl kié Cornelio, e' dör Roma ñippökwakpa eruleë kié Italiano e' capitán. ² Ie' kè dör judiowak erë ie' dör wëm yösyësë Skéköl wöa. Ie' ena iyamipa ekka, e'pa tö Skéköl dalöieke taië. Ñies ie' tö inuköl kakmeke taië judiowak kimoie. Kekraë ie' ttöke Skéköl ta. ³ Ká et tsáli ta diwö de mañat, eta ie' tö isué buä kabsueie tö Skéköl biyöchökwak eköl dewa wé ie' tso' ee ta ichéitö ia: “A Cornelio.” ⁴ Ie' tkinewa ta Skéköl biyöchökwak suéwaitö krereë ta ie' tö iché ia: “A kékë, ¿i kiane be' ki?” Eta Skéköl biyöchökwak tö ie' iüté: “Be' ttöke Skéköl ta ena s'siarëpa kimeke, e' wër buä ie' wa. ⁵ E' kuëki yile patkómi Jope. Eë wëm tso' kié Simón, kié ñies Pedro e' kiök patkó. ⁶ Ie' tso' wëm eköl kié ñies Simón

† 9:39 schó: E' dör alakölpa wëm blëulewa kam serwane ese.

dör iyiwak kkuölit kanéukwak, e' ska', ie' u me'r dayë kkömik.”

⁷ Mik Skëköl biyöchökwak ttè one Cornelio tã e' mía etã Cornelio tö ikanè mésopa kié böi ena iñippökwak kiéitö eköl ñies. Ñippökwak e' tö Skëköl dalöieke tajë. Ie' dör Cornelio kimukwak bua'ie. ⁸ Cornelio tö ì kôs tka ie' tã e' paké ie'pa a. E' ukuöki tã ie'pa patkémiitö dö Jope.

⁹ Bule es diwö de bata a tã Cornelio kanè mésopa dami ñala wa döketke tsinet Jope. E' dalewa Pedro tkaka u bata ki ttök Skëköl tã. ¹⁰ Pedro dué bli wa erë ulirkeia ie' a, e' dalewa isuëitö kabsueie. ¹¹ Ie' tö isuë tö kã jaì kköbunane tã datsi' ukuö bërie suë iklöulewa ibata tkël a, e' bitëwa dö iski. ¹² Datsi' ukuö e' shua iyiwak klöka, e' sköke ibatsi' ki ena dù dör ñá judiowak a esepa tkërki tsakïë. ¹³ Etã ie' tö ttò ttsé tã ichéitö ia: “A Pedro, be' e' kóka. Iyiwak se ttó tã ikató.”

¹⁴ Erë ie' tö iüté: “Au. A Skëköl, iyiwak dör ñá ese kè kataule ye' wa yës.” ¹⁵ Tã ttò e' tö ichéne Pedro a: “Ì batse'wétke Skëköl tö e' kè kiaria ñá.”

¹⁶ E' tka mañatökicha tã datsi' ukuö míkane kã jaì a. ¹⁷ Pedro tso'ia ibikeitsök tajë ì suéyö kabsueie çima e' wà kiane chë? E' wöshäë tã wëpa patké' Cornelio tö, e'pa tö Simón u kué tã iëter Simón ukkö a. ¹⁸ Ie'pa tö ichaké: “çíë wëm kié Simón kiekerakitö ñies Pedro, e' tso'?”

¹⁹ Pedro tso'ia ì suëitö kabsueie e' bikeitsök, etã Wiköl Batse'r tö iché ia: “Ittsó. Wëpa mañal tso' be' yulök. ²⁰ Be' e' ówa tã be' yú ie'pa tã. Kè ibikeitsar bötböt. Ye' tö ie'pa patkébitu be' tsukmi.”

²¹ Etã Pedro e' éwa tã iché ie'pa a:

—Yi yuleke a' tö, e' dör ye'. çì dör iwà?

²² Ie'pa iüté:

—Wëm kiè Cornelio dör Roma ñippökwakpa capitán eköl, e' tō sa' patkè' be' yulök. Ie' dör wëm yēsüs. Skëköl dalöiekeitō tajë. Judiowak ulitane kī ie' kiar tajë. Skëköl biyöchökwak batse'r e' eköl tō iyè' ie' a: “Pedro kió as ie' bitū be' u a. Ì kōs cheke ie' tō be' a, e' ttsó.”

²³ Etā Pedro tō ie'pa kiéwā weshkē. Eē ie'pa kapére. Bule es tā ie' mía ie'pa tā. Ñies s'yamipa serke Jope e'pa welepa mía ie' wapieie. ²⁴ Bökkī es tā idemirak Cesarea. Eē Cornelio tō iyamipa ena pē' suule iwā buaē e'pa ki' e' dapa'ukka Pedro ttō ttsök. E'pa kōs de ie' panuk. ²⁵ Mik ie' de Cornelio u a etā Cornelio dettsā ishke'uk tā ie' e' tkéwā kuchē kī ie' wōshāē idalöioie. ²⁶ Erē ie' tō iké e' duökka tā iché ia:

—Be' e' duōka. Ye' dör s'ditsö ñies wēs be' es.

²⁷ Pedro ttōramiā Cornelio tā etā idewarak weshkē tā ie' isué tō tajë pē' dapanewā. ²⁸ Ie' tō iché ie'pa a:

—A' wā ijcher tō sa' judiowak kē a kawō tā' pē' kē dör judiowak esepa pakök ena shkök pē' esepa tā. Erē Skëköl tō ikkaché ye' a tō kē ye' kawō tā'ia ichök tō yile dör ñá. ²⁹ E' kuekī mik ye' kine, e' bet tā ye' biteā, kē wā ì chakine. Ye' tō a' a ichakè jiók a' tō ye' kié?

³⁰ Cornelio tō iüté:

—Tkali ikëkkē tā ye' tkēr ttök Skëköl tā ye' u a wēs ye' wöblar ká bit ekkē diwö de mañat etā. E' bet tā wëm eköl de dur ye' wörki, e' datsi' dör dalölöë. ³¹ E' tō ye' a iché: 'A Cornelio, be' ttöke Skëköl tā e' ttsé ie' tō. Be' tō s'siarēpa kīmeke e' wër buaē ie' wa. ³² Yile patkómi Jope Simón kiè ñies Pedro, e' kiökbitū. Ie' tso' wëm skà kiè Simón dör iyiwak kkuölit kanéukwak e' u a. E' u me'r dayē kkömik.' ³³ E' bet tā ye' tō be' tsuk patké tā be' debitū er bua' wa. Es sa' ulitane e' dapa'wé íe Skëköl wöā ì chök ie' tō be' ké sa' a e' ttsök.

Pedro tö Skëköl tté buaë paké Cornelio ska'

³⁴ Etä Pedro ttémi ta ichéitö ie'pa a:

—I'ñe ta ye' éna iane tö moki sulitane dör ñies ème Skëköl a. ³⁵ E' kueki ká wa'ñe wépa tö ie' dalöieke ta iserke yësyësë esepa kiar ie' ki. ³⁶ Ie' er buarmine se' ki Jesucristo dör sulitane Këköl e' batamik, e' tté buaë pakane sa' dör Israel aleripa e'pa a. E' jcher a' wa. ³⁷ Ñies ì bak judiowak ké kos a e' jcher buaë a' wa. Juan tö iyë' tö s'kawöta e' wöskuök. E' ukuöki ta Jesús tö s'pattémi Galilea. ³⁸ Ñies a' wa ijcher buaë tö Skëköl tö iWiköl Batse'r patké Jesús Nazaret wak e' ki idiché taië. Ie' shké kekraë pé' ulitane shua iyi buaë kanéuk. Ñies s'we'ikeke bé tö esepa bua'wéneitö Skëköl tso' ie' ta e' kueki. ³⁹ Ì wé ie' tö Jerusalén ena judiowak ká malepa a, e' kos sué sa' tö. E' ukuöki ta ittewarakitö wötëulewa krus mik. ⁴⁰ Erë e' ki ká de mañat ta Skëköl tö ishke'wékane ta ikkachéitö sa' a. ⁴¹ Ie' kè e' kkayëne sulitane a. Sa' è a ie' e' kkaché. Skëköl tö sa' shukitbak as sa' tö Jesús saù sa' wák wöbla wa. Ie' shkenekane e' ukuöki ta sa' chké sa' di'yé ie' ta. ⁴² Ie' tö sa' patké ittè buaë pakök sulitane a ñies ichök iarak tö ie' tkéka Skëköl tö s'ttsë'ka ena s'duulewa, e'pa shulökwakie. ⁴³ Ká iaiaë Skëköl ttekölpa ulitane tö Jesús paka'atbak ta iyë'atrankitö tö yi erblé ie' mik esepa nuì olordaë ie'pa ki ie' batamik.

Pé' kè dör judiowak esepa ki Wiköl Batse'r de

⁴⁴ Pedro tso'ia ipakök ie'pa a ta e' shua Wiköl Batse'r debitu ie'pa kos tso' ie' ttò kittsök, e'pa ki. ⁴⁵⁻⁴⁶ Etä Jesús mik erblökwakpa dör judiowak dë'bitu Pedro ta e'pa tö isué tö wes Wiköl Batse'r debitu pé' kè dör judiowak, esepa ki ñies. Ie'pa tö ittse' tö ittökerak ttò ku'a'ki ku'a'ki wa. Ñies Skëköl kikökka itso'rak. E' tö ie'pa tkiwéwa. ⁴⁷ Etä Pedro tö iché:

—Wiköl Batse'r debitu ie'pa ki wes sa' ki itsá dë'bitu es. E' kueki kè yi a iwöklönuk tö kè ie'pa wöskuar di' a.

⁴⁸ Ie' tö ikérak e' wöskuök Jesucristo ttò wa. E' ukuöki ta ie'pa tö ie' a ikié taië: “Be' e' tsúat sa' ta ká böt mañat.”

11

Pedro tö Cornelio tté paké Jerusalén

¹ Jesús ttekölpa tsá ena s'yamipa malepa tso' Judea, e'pa tö ittsé tö pë' kè dör judiowak, ñies esepa tö Skököl ttè klö'wé. ² Mik Pedro dene Jerusalén, eta Jesús mik erblökwakpa dör judiowak, esepa welepa tö ie' ché suluë. ³ Ie'pa tö ie' a ichaké:

—¿Iók be' dare pë' kè dör judiowak esepa pakök ena chkök ie'pa ta?

⁴ Ie' tö ì kos tka e' paké ie'pa a seraa ta iché ia:

⁵ —Ye' bak Jope ta ye' ttöke Skököl ta, e' shua ye' tö ì sué kabsueie. Ì suéyö e' dör datsi' ukuö bérie sué klöulewa ibata tkël a. E' bitewa ká jai a dò wé ye' tso' ee. ⁶ Eta ye' tö isué bua'iewa isuoie tö ì tso' ishua. Ye' tö iyiwak klöka, iyiwak kañiru, iyiwak e' sköke ibatsi' ki ena dù, esepa sué. ⁷ Eta ye' tö ttò ttsé e' tö iché ye' a: ‘A Pedro, be' e' kóka. Iyiwak se ttó ta ikató.’ ⁸ Ye' iüté: ‘Au. A Skököl, ye' kè wa iyiwak dör ñá ese kataule yës.’ ⁹ Ta ttò datse ká jai a, e' tö ichéne ye' a: ‘Î batse'wétke Skököl tö ese kè kiaria ñá.’ ¹⁰ E' tka mañatökicha ta imíkane sekka ká jai a. ¹¹ E' wöshaë ta, wëpa mañal patküle datse Cesarea ye' yulök, e'pa debitu wé ye' tkër e' wé a. ¹² Wiköl Batse'r tö ye' a iché: ‘Kè ibikeitsar bötböt. Be' yú ie'pa ta. Ñies s'yamipa teröl i' dare ye' ta. Sa' kos dewa Cornelio u a. ¹³ Ie' tö sa' a ipaké tö wes ie' tö Skököl biyöchökwak sué dur eköl ie' u a. E' tö iché ia: ‘Yile patkómi dò Jope ee wëm tso' kiè

Simón, e' kiè ñies Pedro, e' kióbitu. ¹⁴ Ie' tö icheraë be' a wes be' ena be' yamipa kos e'pa tsatkërmi.' ¹⁵ Mik ye' tö Jesús tté pakémi ie'pa a, etä Wiköl Batse'r debitu ie'pa ki wes idë'bitu sa' ki kuaë es. ¹⁶ Etä ì yë' Skëkëpa Jesús tö ye' a, e' ane ye' éna. Ie' tö ye' a iyë': 'Juan tö s'wöskué di' a, erë a' iërdawä Wiköl Batse'r a.' ¹⁷ Iwënewä tö Skëköl tö iWiköl mé ie'pa a wes imenebak se' a kuaë mik se' erblë' Skëkëpa Jesucristo mik etä es. E' kueki çye' dör yi Skëköl wöklö'woie?

¹⁸ Mik ì ché Pedro tö e' ttsé ie'pa tö, etä isiwa'bléwarak ta Skëköl kikëkarakitö. Ie'pa tö iché:

—E' wa se' wä ijcher tö pë' kè dör judiowak, esepa a ñies Skëköl tö imé as ie'pa er mane'ù ie' a senoie michoë.

Skëkëpa Jesús icha eruleë tso' Antioquía e' pakè

¹⁹ Esteban kötwarakitö e' ukuöki ta Jesús mik erblök-wakpa we'ikémitke taië pë' tö. E' yöki ie'pa welepa tkayal. Welepa míyal dò Fenicia. Welepa míyal dò Chipre. Iskà mírak dò Antioquía. Ká ekkëpa a ie'pa tö Jesús tté buaë pakeke judiowak è a. ²⁰ Erë Jesús mik erblökwakpa datse Chipre ena Cirene, ese welepa míyal Antioquía. Ee Skëkëpa Jesús tté buaë pakérakitö pë' kè dör judiowak esepa a. ²¹ Etä Skëkëpa tö ie'pa kimé taië. E' kueki taië ká e' wakpa erblë' Skëkëpa Jesús mik ta ier mane'wërak ie' a.

²² Mik Skëkëpa Jesús icha erule tso' Jerusalén, e'pa tö tté e' ttsé, etä Bernabé patkémirakitö tkörö Antioquía. ²³ Mik ie' demi, etä ie' tö isué wes Skëköl er buaë ché ie'pa a. E' tö ie' ttsë'wé buaë. Ie' tö ie'pa kí patté as ie'pa e' tkòwa darëré kekraë ier kos wa ie'pa erblö' Skëkëpa mik e' a. ²⁴ Ie' dör wëm yësyësë. Ie' a taië Wiköl Batse'r tso'. Ie' tö Jesús bikeitseke bua'iewa. Es taië pë' kí de erblök Skëkëpa mik.

²⁵ E' ukuökḡ tḡ ie' mḡ Tarso Saulo yulök. ²⁶ Mik ikuéitö, etḡ itsémi Antioquía e' tḡ. Eḡ ie' tséarak duas ek. Ie'pa e' dapa'uke Skéképa Jesús icha erule e'pa tḡ. Ká e' wakpa taië wöbla'wekerakitö. Ká e' a Jesús ttökatapa tsá kine Cristo wakpa.

²⁷ E' kéwö ska' tḡ Skököl ttekölpa welepa tso' Jerusalén míyal Antioquía. ²⁸ E'pa shüa eköl kiè Agabo, e' e' duéka tḡ ichéitö Wiköl Batse'r wa tö bli datse ká wa'ñe ki. E' debitu mik Claudio bak Roma wökir kibi e' kéwö ska'. ²⁹ Etḡ Jesús ttökatapa tso' Antioquía e'pa tö iché ñi a: “Mishka inuköl shtök patkè se' yamipa serke Judea, e'pa kimoie kos se' a imer ekkè.” ³⁰ Es ie'pa tö iwé. Etḡ ipatkémirakitö Bernabé ena Saulo ulà a as ie'pa tö imù Skéképa Jesús icha wökir kibipa tso' Judea e'pa ulà a.

12

Pedro wötéwarakitö s'wöto wé a

¹ E' kéwö ska' tḡ blu' kiè Herodes, e' tö Skéképa Jesús icha welepa klö'wéwa we'ikè. ² Ie' tö Santiago dör Juan èl, e' ttökwa patké tabè wa. ³ Mik ie' isué tö e' wër buaë judiowak wa, etḡ ie' tö Pedro klö'ukwa patké. E' wéitö mik judiowak tö Pan Kè Yöule Iwölöwoka Wa e' kéwö tkö'wekerakitö etḡ. ⁴ Mik Pedro klönewa, etḡ Herodes tö iwötéwa s'wöto wé a. Eḡ ñippökwakpa doka dabom eyök ki teröl (16) e'pa tö ikkö'neke tkël tkël. E'pa mane'weke tkël tkël kukur kukur. Herodes tö ibikeitsé tö kawö tkö'wekerakitö, e' ukuökḡ tḡ iyekettsaneyö shulè sulitane wöa. ⁵ E' dalewa Pedro tso' s'wöto wé a. Erè Skéképa Jesús icha erule e'pa tso' ikiök Skököl a darërëe ie' ki kekraë.

Skököl biyöchökwak tö Pedro yéttsa s'wöto wé a

⁶ Herodes tö Pedro yekettsa shulè, e' nañewe Pedro kapötër ñippökwakpa böl shusha moulewa tabechka kichaie bötö wa. Nies ñippökwakpa böl tso' s'wöto wé

ukkö kkö'nuk. ⁷ E' bet Skëköl biyöchökwak de dur ie' ska' ta bö'wö olo buneka dalölöe s'woto wé a. Eta ikéwaitö ichane a as iti'rka ta iché ia: “¡Be' e' kóka bet!” E' bet ta imoulewa tabechka kichaie wa e' wöyërulune. ⁸ Eta Skëköl biyöchökwak tö iché ia: “Be' datsi' ióka, be' klökkuö ióka.” Ta ie' tö iwé es. Skëköl biyöchökwak ikí ché ia: “Be' paio kikküö ióka ta be' shkó ye' itöki.”

⁹ Eta Pedro mía itöki, erë ie' kè éna iane tö ì weke Skëköl biyöchökwak tö e' dör moki. Ie' tö ibikeitsè tö ie' tso' kabsauk. ¹⁰ Eta ie'pa tkami wé ñippökwakpa iëter ukkö kkö'nuk eë. E' ukuöki ta wé ñippökwakpa skà iëter eë itkamirak ñies. Mik ie'pa demi ukkö kibi a yöule tabechka wa ate ñalá kke, eta e' kköbunane er wa. Eta ie'pa deyal u'rki shkémirak ekuölö ta Skëköl biyöchökwak tö iméat eköl.

¹¹ Ekkë ta ie' éna iane tö ì suéitö e' dör moki. Ie' ibikeitsè: “Íñe ta yö isué tö moki Skëköl tö ibiyöchökwak patké ye' tsátkök Herodes ulà a ena ì kos wamblak judiowak éna ye' ki, e' ulà a ñies.”

¹² Mik ie' éna ianewa bua'iewa ta imía María u a. María dör Juan mì. Juan kiè ñies Marcos. Eë ie'pa daparke tajë ttök Skëköl ta. ¹³ Mik Pedro de dur ukkö a ie'pa chakök, eta busi eköl dör kanè méso kiè Rode e' mía iweblök tö yi idir. ¹⁴ Mik ie' ttò ttséwa Rode tö, eta ittse'neka buaë kè deia ukkö ppöök ta itunemine weshke ichök tö Pedro de dur ukkö a. ¹⁵ Ie'pa tö iché ia:

—¡Be' alíneka!

Erë ie' iuté:

—Moki ye' ttöke.

Ie'pa ie' a iché:

—Au, e' kè dör ie'. E' dör Skëköl biyöchökwak patküele ikkö'nuk e'.

¹⁶ E' dalewa Pedro tso'ia ichakök ukkö a. Mik ukkö kköppéerakitö, etä isuérakitö tö ie' e' idir tä itkinewarak taië. ¹⁷ Erë ie' tö ikkaché ulà wa tö a' siwa'bló. E' ukuöki tä ie' tö ipaké ie'pa a tö wes Skëköl tö iyéttsa s'wöto wé a tä ichéitö:

—Ttè e' pakó Santiago a ena s'yamipa malepa a.
E' ukuöki tä ie' e' yéttsa mía bánet.

¹⁸ Mik ká ñine etä s'wöto wé a ñippökwakpa shutineka taië Pedro kè ku' e' kueki. ¹⁹ Herodes tö Pedro yulök patké. Erë mik ie'pa kè wä ikune, etä ie' tö inuí tkéwa ñippökwakpa mik tä ie' tö ie'pa ttökwa patké.

E' ukuöki tä ie' e' yéttsa Judea mía senuk Cesarea.

Herodes du'wa

²⁰ E' kèwö ska' tä blu' Herodes ulurke taië Tiro ena Sidón wakpa ki. E' kueki ie'pa kawö mé ñi a shkowaie ie' ska' ttök ie' tä. Ie'pa tö wëm kiè Blasto e' pablë'bak as ie' mi' ie'pa ttekölie ttök Herodes tä. Ie' kaneblöke Herodes a iu kuebluie. Ie' ttò wa ie'pa tö kawö kié Herodes a tö ie'pa múat bèrë, ie'pa tö chkewö tuëke Herodes ká a e' kueki.

²¹ Ká et tä Herodes tö ie'pa kiéttsa. Mik e' kèwö de, etä ie' tö blu' datsí iéka tä ie' e' tkéka s'shulo kulé tso' iwé a e' ki tä eë ikapaké ie'pa tä. ²² Ie'pa tö Herodes ché aneule i' es: “¡Ittöke i', e' kè dör s'ditsö, e' dör kéköl wele ttöke!” ²³ E' ttsër buaë ie' kukua tä ie' e' kikéka taië, kè wä Skëköl kikaneka. E' kueki e' wöshaë tä Skëköl biyöchökwak eköl tö duè méka iki. Ie' katéwa öña tö tä iduowa.

²⁴ E' dalewa tä Skëköl ttè pakarke ème ká wa'ñe.

²⁵ Mik Bernabé ena Saulo e'pa tö ì uk ie'pa dë' Jerusalén e' wawé one, etä ie'pa míyalne Antioquia. Ie'pa wä Juan kiè ñies Marcos, e' mitsërñak.

13

Wiköl Batse'r tö Bernabé ena Saulo patké Jesús tté buaë pakök

¹ Skëkëpa Jesús icha erule tso' Antioquía, e'pa shua Skëköl ttekölpa ena s'wöbla'ukwakpa tso'rak ee. E'pa dör Bernabé ena Simón (Simón e' kiè ñies Daloriwak), ena Lucio dör Cirene wak, ena Menahem (Menahem e' talane Galilea blú kiè Herodes e' ta ñita), ñies Saulo tso'ñak. ² Ká et ta ie'pa tso' Skëköl dalöiök batsè wa ta e' shua Wiköl Batse'r tö iché ie'pa a: “Kanè kua'ki tso' ye' wa Bernabé ena Saulo a. Ie'pa shushtétkeyö iwakanéwoie e' kueki ie'pa böi yóttsa ye' a kanè e' woie.”

³ Ie'pa batsé ena tté S'yé ta one, ta iulà mékarak ie'pa böi ki e' dalewa ikié S'yé a iki. E' ukuöki ta ipatkémirakitö iwakanéuk.

Bernabé ena Saulo tö Jesús tté paké Chipre wakpa a

⁴ Es Bernabé ena Saulo míyal Seleucia patkéule Wiköl Batse'r wa. Ta ee ie'pa e' iéka kanò a míyal ká kiè Chipre ee. ⁵ Idemirak Chipre wé kanò irirke ee, e' ké kiè Salamina. Mik idemirak ee, eta ie'pa tö Skëköl tté pakémi judiowak a iñi dapa'wo wé kos a. Juan mirwa ie'pa ta ie'pa kimuk. ⁶⁻⁸ Chipre kos a itkarak demirak ká kiè Pafos ee. Ee ie'pa tö judiowak kué eköl kiè Barjesús (e' kiè griegoie Elimas). E' dör ie'pa awá eköl. Ie' e' chò tö ie' dör Skëköl tteköl. Ie' ye'arie kekraë ká e' wökir kiè Sergio Paulo, e' ska'. Sergio Paulo kabikeitsò buaë, ie' ki Skëköl tté kiane ttsè. E' kueki ie' tö Bernabé ena Saulo tsuk patké. Erè awá ñe' kè ki ikiane tö Sergio Paulo tö tté mik se' erblöke e' klö'wè. E' kueki ie' tö Bernabé ena Saulo ma'wé wöklö'wè. ⁹ Eta Saulo, e' kiè ñies Pablo, e' ki Wiköl Batse'r debitu taië. Eta Elimas suéwaitö krereë ¹⁰ ta iché ia:

—Be' kachò. Be' e' wamblò suluë. Be' dör wes bé es. Sene yësyësë kos, e' bolök be' dör. ¿Kos be' tò Skëköl ñalé yësyësë e' shkuli'wëmirö? ¹¹ I' ta Skëköl tò be' we'ikeraë. Be' wöbla kè wawërpaia. Ká tköraë taië be' ki ta be' kè tò diwö olo suepaia.

E' bet ta Elimas wöa ká mia ttsettseë, iwöbla kè wawëneia, e' kuëki yile yulekeitö as tò iulaiö. ¹² Mik ká e' wökir tò e' sué, eta ie' erblé Jesús mik. Ie' wökranewa wes Skëképa ttè dör e' kittsök.

Pablo ena Bernabé tò Jesús tté paké Antioquia qte Pisidia ee

¹³ Pablo ena ishköwapa e' iékarak kanò a Pafos ta imíyal Perge ate Panfilia ee. Eta Juan tò ie'pa méat ee, ta imíane Jerusalén. ¹⁴ E' ukuöki ta imíyal Antioquia ate Pisidia ee. Eta ee judiowak eno diwö ta ie'pa dewa judiowak ñi dapa'wo wé a e' tuléser. ¹⁵ Eta wele tò ì kit Moisés ena Skëköl ttekölpa tò yëkkuö ki, e' arítsé dò ekuölö. E' ukuöki ta ñi dapa'wo wé wökirpa tò ichök patké Pablo ena Bernabé a:

—A yamipa, a' wa ilè tso' sa' pattoie, e' ta sa' pattó.

¹⁶ Eta Pablo e' kéká ta ikkaché ulà wa tò a' siwa'bló ta ichéitö:

—A Israel aleripa ñies ká kuá'ki wakpa tò Skëköl dalöi-eta', a' tò ye' ttò ttsó. ¹⁷ Skëköl dör Israel aleripa e' Këköl, kuaë e' tò se' bak ká iaiaë, e'pa shukitbak iwák a. Ie'pa sene' Egipto wes ká kuá'ki wakpa es. Ee ie' tò ie'pa kimé taië alöne taië. E' ukuöki ta ie' tò ie'pa yéttsa ká e' ki idiché wa. ¹⁸ Ie' tò ie'pa dalë'ttsé ká sir poë wé kè yi serku' e' a döká duas dabom tkëyök (40). ¹⁹ Pë' ditséwöpa döká kul bak senuk Canaán e'pa eö'waitö ká mè se' yépa bak ká iaiaë, e'pa a. ²⁰ E' kos ki duas bak cien tkëyök ki dabom skeyök (450) ekkë.

“E' ukuöki ta Skëköl tö ie'pa shü kékä eköl eköl imalepa wëtsoie dö itteköl Samuel e' kékö ska'. ²¹ E' ukuöki ta ie'pa tö Samuel a blu' kié eköl. Es Skëköl tö Saúl méka ie'pa blúie, e' dör Quis aladulaköl. Ie' dör Benjamín ditséwö. Saúl sené ie'pa blúie dökä duas dabom tkëyök (40). ²² E' ukuöki ta Skëköl tö Saúl uyéttsa ta David mékaitö blu'ie iskéie. David ché Skëköl tö i' es: 'Ye' tö David dör Jesé alà, e' sué. Ie' wër buaë ye' wa, ie' erbikò wes ye' erbikò es. Ì kiane ye' ki wè, e' wakanewëraëitö.' ²³ David aleri eköl dör Jesús, e' patké Skëköl tö se' dör Israel aleripa e'pa tsatkök wes ie' kablè' es. ²⁴ Erë kam Jesús döbitü e' yöki Juan S'wöskuökwak tö se' Israel aleripa ulitane patté tö se' kawöta er mane'uk Skëköl a. Nies se' kawöta e' wöskuöklor di' a. ²⁵ Mik Juan kanè erkewatke ta ie' tö iché: 'Wëm datse eköl e' kinuk a' tso', e' kè dör ye'. Ie' datseia ye' itöki. Ie' dör ye' tsata, e' kuëki ie' klökkuö kicha è kè wötsënanuk ye' siarla e' a.'

²⁶ “A s'yamipa, Abraham aleripa, nies a' wépa kè dör ie' aleripa erë Skëköl dalöieta' esepa, se' ulitane a s'tsatkè tté e' patkënetke. ²⁷ Jerusalén wakpa ena iwökirpa e'pa kè wa ijcher tö Jesús dör S'tsatkökwak. Nies eno diwö bit ta ie'pa tö ie' tté kitule yëkkuö ki Skëköl ttekölpa wa, e' aritseke, erë e' kè wà ane ie'pa éna. Mik ie'pa tö Jesús wöméttsa ttëwä etä e' wa ie'pa tö ie' tté tso' kitule Skëköl yëkkuö ki e' wà tkö'wé. ²⁸ Ie'pa kè wa ì sulu kune iki ittowa erë ikkatéraitö Pilato a as ittökwa patkòitö krus mik. ²⁹ Es Jesús ttëwarakitö. Mik ie'pa tö ì kos kitule Skëköl yëkkuö ki, e' wawé one, etä inú éwarakitö krus mik ta iwötëwarakitö pö a. ³⁰ Erë Skëköl tö ie' shké'wékane. ³¹ E' ukuöki ta ie' e' kkachéne ká tajë wépa manetwa ie' wapie Galilea dö Jerusalén, e'pa a. I'ñe ta e'pa kos dör ie' ttekölpa judiowak ulitane wörki.

³² “Es sa' tso' ttè buaë i' pakök a' a. E' dör ì uk Skököl kablè' sa' yépa bak ká iaiäë e'pa a ³³ e' wà tka sa' dör ie'pa aleripa e' wörki. Itka mik Skököl tö Jesús shke'wékane etä. Itka wes itso' kitule Salmo böt ki es wé ichéitö: ‘Be' dör ye' alà. I'ñe yö ikkachétke tö ye' dör be' yé.’* ³⁴ Nies Jesús yé'at Skököl tö iyëkkuö ki: ‘Wes ye' tö ye' ttè yësyësë batse'r taië e' me' David a tö ye' er buaë chöraë ie' a, es ye' er buaë chöraë be' a.’† E' wà dör tö Skököl tö ie' shke'werane as kè ichkà nurwä. ³⁵ E' kueki nies itso' kitule: ‘Be' kanè méso batse'r, e' kè mepaatbö as ichkà nurwä.’‡ ³⁶ Es David, se' blú bak iaiäë, e' tö imalepa bak e' kèwö ska', e'pa wëttsé wes Skököl tö iyé'ia es. E' ukuöki tã idu'wä tã itöbinewä iyépa pö a tã inunewä. ³⁷ Erë wé shkeo'kane Skököl tö e' chkà kè nune'wä. ³⁸ A yamipa, a' wä ijchenú tö se' nuì olo'yarmi se' ki Jesús batamik, e' ttè pakeke sa' tö a' a. ³⁹ Ttè méat Moisés tö dalöiëno, e' kè a se' nuì olonuk. Erë wépa erblé Jesús mik esepa nuì lordaë ie'pa ki. ⁴⁰ A' tso' erki as a' kè tã itkò wes Skököl ttekölpa tö ikit es wé Skököl tö ichè:

⁴¹ ‘A ye' wayuökwakpa, ye' ttò ttsó.

Ì weraëyö a' kèwö ska' tã, e' dör taië kè klöonuk a' a ekkë. Eré a' a ipakarmi erë kè a' tö iklö'wëpa.

E' kueki a' tkinú. A' enúwa.’”§

⁴² Etä Pablo ena Bernabé e' yélur ñi dapa'wo wé a. Etä pè' tö iché ie'pa a a' kiéne ttè ekkëpa skà pakökne sa' a eno diwö étö wa. ⁴³ Mik ie' dapa'wérak e' one, etä judiowak, nies pè' e' yué judiowakie esepa taië míyal Pablo ena Bernabé tã. Pablo ena Bernabé tö ie'pa patté tö a' e' tkówa darërëë Skököl er buaë chöke se' a e' a.

* 13:33 Salmo 2.7 † 13:34 Isaías 55.3 ‡ 13:35 Salmo 16.10 § 13:41 Habacuc 1.5

⁴⁴ Eno diwö etö wa etä ká e' wakpa iekkë tã idettsarak seraa Skëköl ttë kïttsök. ⁴⁵ Erë mik judiowak tö isuë tö pë' dapane taië Pablo ttö kïttsök, etä ie'pa yöki isulune tã ie' kékarak ichök tö ì cheke ie' tö e' dör kache. Ie'pa tö ie' ché suluë. ⁴⁶ Erë ie' ena Bernabé kè suane tã iché iarak:

—Sa' kawöta a' dör judiowak e'pa pattoie kewe Skëköl ttë wa, erë a' kè wã iklöne. Wësua a' ibikeitseke tö sene michoë kè mène a' ki. E' kueki sa' míyal ipakök pë' kè dör judiowak esepa a. ⁴⁷ Es Skëköl tö sa' patké. Ie' yëkkuö tö ichè:

'Be' tkékayö wes bö'wö wöñar stui a es.

Es ye' tö be' patkeraë ká ulitane wakpa pattök,

Ie'pa tsatkè e' tté pakeraëbö ká wa'ñe dò wé ká i' erkerö ee.*

⁴⁸ Mik pë' kè dör judiowak e'pa tö ttë e' ttsé etä ie'pa ttsenekarak buaë. Ie'pa e' kékarak Skëképa Jesús tté kikökka. Wépa kos suletëneat senuk michoë, esepa erblé Jesús mik. ⁴⁹ Es Skëképa Jesús tté pakane ká e' wa'ñe a. ⁵⁰ Erë alakölpa dalöierťa' taië ká e' ki esepa tö judiowak ttë dalöieke buaë, ñies wëpa dalöierťa' taië ká e' ki, esepa shutiwéka judiowak tö as Pablo ena Bernabé we'ikòrakitö as ie' yòttsarak ká e' ki. ⁵¹ Etä Pablo ena Bernabé tö iklö po ppée ikkachoie ie'pa a tö ie'pa ki inuí ane tã imíyal Iconio. ⁵² Erë Jesús ttökåtapa atë e'pa ttsë'ne buaë ñies ie'pa a Wiköl Batse'r tso' taië.

14

Pablo ena Bernabé tö Jesús tté paké Iconio wakpa a

¹ Mik Pablo ena Bernabé demi Iconio, etä ie'pa dewã judiowak ñi dapa'wö wé a wes ie'pa wöblar es. Ie'pa tö Jesús tté paké buaë. Es judiowak ñies pë' kè dör judiowak,

* 13:47 Isaías 49.6

esepa taië erblé Jesús mik. ² Erë judiowak kè erblène imik, e'pa tö pë' kè dör judiowak, esepa shutiwéka ena iluwéka taië s'yamipa kī as iwe'ikörakitö. ³ Erë Pablo ena Bernabé e' tséat ká taië ee. Ie'pa tö Skëkëpa tté pakeke kè suane. Skëköl tö diché mé ie'pa a ì kè or yi a ese wöie iwà kkachöie tö ie' er buaë chöke siä e' tté dör moki. ⁴ Erë ká e' wakpa ñi blabatsélor, shabötspa wa judiowak tté wër buaë, shabötspa wa Jesús ttekölpa tsá e'pa tté wër buaë. ⁵ Judiowak ena pë' kè dör judiowak, e'pa tö kawö mé ñi a iwökirpa ta Pablo ena Bernabé we'ikoie, tè ák wa ittowaie. ⁶⁻⁷ Erë mik Pablo ena Bernabé, e'pa wa ijchenewa, eta ie'pa tkayalmi dòmi ká kiè Licaonia ee. Ká kiè Listra ena ká kiè Derbe atë ee. Ká e' wa'ñe ie'pa tö Jesús tté buaë paké.

Pablo tène ák wa ittowaie ká kiè Listra ee

⁸⁻⁹ Eta wëm tso' eköl Listra, e' kune' klò bachiulewa. Ie' kè shko. Ie' tkër Pablo ttöke e' ttsök. Pablo tö isuéwa krereë. Ie' wa ijcher tö wë' ierblé Jesús mik as ibuarne. ¹⁰ Eta ie' tö iché ia aneule:

—jBe' e' kóka, be' e' duóka!

Eta wëm e' kéka tuneka tsut ta ishkémi. ¹¹ Mik pë' tö, ì wé Pablo tö e' sué, eta ie'pa tö ichémi aneule ie'pa Licaonia ttò wa:

—jWépa dalöiekesö skëkölíe e'pa dettsa se' shua s'ditsöie!

¹² Pablo kapaké kibiie, e' kueki ie'pa tö ie' klö'wé ie'pa kéköl kiè Hermes e' skéie. Bernabé klö'wérakitö ie'pa kéköl kiè Zeus e' skéie.* ¹³ Zeus wé merka ká e' ñalé ukuö o'mik tsinet. Zeus sacerdote wa baka wë'ñe ena ma'ma

* 14:12 Zeus ena Hermes: E'pa dalöiök griegowak bak skëkölíe ká iaiaë. Ie'pa a Zeus dör skëköl bua'ie imalepa tsata. Ie'pa tö iklö'wé tö Hermes dör Zeus tteköl. Romawak tö Zeus kiè méka Júpiter ena Hermes kiè mékarakitö Mercurio.

wörkua debitu tajë. Ie' ena pë' ulitane éna baka wë'ñe jchak mè Pablo ena Bernabé a idalöioie ikëkölpäie. ¹⁴ Erë mik Bernabé ena Pablo wa ijchënewa, etä ie'pa e' datsi' jchéé ikkachoie tö e' dör suluë ie'pa a. Ta ie'pa mía pë' shuä tä ichérakitö aneule:

¹⁵ —A këkëpa, jì uk a' tso'? Sa' dör s'ditsö wës a' es. Sa' debitu ttë buaë pakök a' a as a' tö íyi ikkë kè wà tä' ese kôs watöttsa tä a' er mane'ù Skëköl chók e' a. Ie' tö ká jaì ena ká i' ena dayë ena ì kôs tso' iki e' yö'at. ¹⁶ Ká iaiaë dò ikkë tä sulitane serke wës iwák kî ikiane es, e' dalë'ttsë'bitu Skëköl tö. ¹⁷ Erë e' dör es, erë ie' dör buaë se' tä kekraë, e' wa ie' tö iwà kkaché siä tö ie' dör Skëköl chók. Ie' tö kalî patkeke a' a. Ie' tö iyiwö weke a' a. Ie' tö chkè meke a' a ñanoie a' ttsë'woie buaë.

¹⁸ Erë ie'pa tö ì kôs ché iarak, erë iekkë tä baka wë'ñe jchérakitö Pablo ena Bernabé dalöioie wës Zeus ena Hermes es.

¹⁹ E' shà tä judiowak wëlepa datse Antioquia ena Iconio, e'pa debitu tä Litra wakpa dakiñérakitö Pablo ttökwa. Iklö'wëwarakitö tä itérakitö taië ák wa. Ibikeitsérakitö tö iduowa, e' kuëki ie'pa tö ikuémi méat tër Litra ké kkò a wi'kie. ²⁰ Erë mik Jesús ttökatapa malepa e' dapa'wëka ipamik, etä ie' e' kékä míane Litra. E' bule es tä ie' mía Bernabé tä dò ká kiè Derbe eë.

²¹ Ie'pa demi Derbe tä Jesús ttë buaë pakérakitö ká e' wakpa a. Taië ie'pa e' yué Jesús ttökataie. E' ukuöki tä ie'pa debitu ena Litra ena Iconio ena Antioquia. ²² Ká ekkë kôs a ie'pa tö Jesús ttökatapa er diché ié ena ipablérakitö as ie' tköwarak darërëë ttë mik se' erblöke e' a. Ie'pa tö iché iarak: “Se' wake' weirdaë ká i' kî dowajie aishkuö tä ì blúie Skëköl tso' e' a.” ²³ Ñies ká kôs e' kî ie'pa tö wëpa shushté kaneblök Skëkëpa Jesús icha erule erule

e'pa wökirpaie. E'pa ki ie'pa ikié S'yé a ena batsé, e' ukuöki ta iméarakitö Skëképa mik ie'pa erblöke e' ulà a.

Pablo ena Bernabé dene Antioquia atë Siria ee

²⁴ E' ukuöki ta Pablo ena Bernabé tkami ká kiè Pisidia demirak Panfilia. ²⁵ Ie'pa tö Jesús tté buaë paké ká kiè Perge e' wakpa a. E' ukuöki ta ie'pa mía ká kiè Atalía ee. ²⁶ Ee ta ie'pa e' iéka kanò a míane Antioquia iyamipa tö ie'pa patkë'mi Jesús tté pakök e'pa ska'. Ee iyamipa tö ie'pa me' Skëköl er buaë chöke se' a e' ulà a à kanéuk ie'pa dare e' woie. ²⁷ Mik ie'pa demine Antioquia, eta Skëképa Jesús icha erule e' dapa'wékarakitö. Ta à kos wé Skëköl tö ie'pa ta, ñies wes ie' tö ikkayë' pë' kè dör judiowak, esepa a tö ie'pa erblömi ie' mik wes judiowak es, e' kos pakéarakitö iyamipa a. ²⁸ Eta ie'pa e' tséat ká taië Jesús ttökatapa tso' Antioquia, e'pa ta.

15

Skëképa Jesús icha e'pa wökir kibipa ñi dapa'wé Jerusalén

¹ E' kéwö ta, wëpa welepa e' yéttsa Judea demi Antioquia. Ie'pa tö s'yamipa wöbla'wémi ttè i' wa: "A' wëpa kos kawöta tottola kkuölit tée tsir wes Moisés ikitat es. E' kè kaneone a' wa, e' ta kè a' tsatkërpa." ² E' kueki Pablo ena Bernabé ñi iutéka darërëë ie'pa ta. E' kueki iyamipa tö Pablo ena Bernabé ena welepa skà, e'pa shushtë as imi'yal Jerusalén ttè ñe' shulök Skëképa Jesús icha wökir kibipa ena Jesús ttekölpä tsá, e'pa ta.

³ Es Skëképa Jesús icha erule tso' Antioquia, e'pa tö Pablo ena imalepa patkëmi Jerusalén. Ie'pa tkami Fenicia ena Samaria. Eta ipakeramirakitö iyamipa a tö wes pë' kè dör judiowak, esepa er mane'wé Skëköl a. Ttè e' tö ie'pa ttsé'wé buaë.

⁴ Mik Pablo ena Bernabé demirak Jerusalén, eta ee Skékëpa Jesús icha eruleë e'pa kos ena iwökirpa ena Jesús ttekölpa tsá, e'pa tö ie'pa kiéwa buaë. Eta ì kos o' Skéköl tö ie'pa wa e' pakéraitö imalepa a. ⁵ Erë Jesús mik erblökwakpa dör fariseowakpa, esepa welepa e' kéka ta ichéitörak:

—S'yamipa kè dör judiowak esepa wëpa kawöta itóttola kkuölit tée tsir. Nies ie'pa a ikawöta chë tö Moisés ttè kitulebak e' dalöiök ie'pa kawöta.

⁶ Eta Skékëpa Jesús icha wökir kibipa ena Jesús ttekölpa tsá, e'pa ñi dapa'wéka ttè e' bikeitsök bua'iewa. ⁷ Ie'pa tö ipaké taië, e' ukuöki ta Pedro e' kéka ta ichéitö:

—A yamipa, a' wa ijcher tö ká iaiä Skéköl tö ye' shuk-itbak a' shua Jesús tté buaë pakök, pë' kè dör judiowak, esepa a as ie'pa erblò imik. ⁸ Ie' wa se' er suule buaë, ie' tö Wiköl Batse'r mé ie'pa a wes se' a ime'itö es. Es ie' tö se' a ikkaché tö ñies ie' tö ie'pa klö'wé ie' ichaie. ⁹ Ie' tö ie'pa er paiklé ie'pa erblé Jesús mik e' wa. Es se' wa ijcher tö ie'pa ena se' dör ñies ème ie' wöa. ¹⁰ A' tö ie'pa ké Moisés ttè darërëë e' dalöiök, erë e' kè dalöiëne' se' a, ñies se' bak ká iaiä e'pa kè a idalöiëne'. I'ñe ta jiók a' tso' Skéköl wöñatkök es? ¹¹ E' kè dör es. Se' tö iklö'wé tö se' tsatkëne Skékëpa Jesús er buaë chöke sia e' è wa. E' suë ie'pa tsatkëne ñies.

¹² E' ukuöki ta ie'pa ulitane siwa' blélur tso' Bernabé ena Pablo e'pa kapaköke e' ttsök. Ie'pa tso' ipakök tö wes ì kè or yi a ese wéraitö Skéköl batamik pë' kè dör judiowak, esepa shua Skéköl diché kkachoie. ¹³ Ie'pa kapaké one eta Santiago tö iché:

—A yamipa, ye' ttò ttsó. ¹⁴ Simón tö se' a ipaké wes Skéköl tö, pë' kè dör judiowak, esepa tsá kimé er bua' wa

as ie'pa welepa dò ie' wák ichaie. ¹⁵ Ñies e' sini'kuë Skëköl ttekölpa bak ká iaiaë e'pa tò. Ie'pa tò iyè':

¹⁶ Skëköl tò ichè: 'Aishkuö ta ye' datsene.

Etá David jchúlipa kerakayö iwák suë.

Ie'pa dörane diché ta' taië wes iaiaë es

¹⁷ as pè' malepa kè dör judiowak dör ye' icha esepa tò ye' yulò.

¹⁸ Es ye' tò ttè i' chétke.

Ká iaiaë ttè i' me'atbakyö a' a.*

¹⁹ “Ttè i' kuëkí ye' ibikeitsè tò, pè' kè dör judiowak er mane'wé Skëköl a, esepa kè tsiriuk s'kàne judiowak ser ese wa. ²⁰⁻²¹ E' kuëkí yëkkuö patkõmisö ie'pa a e' kí ichòsö tò íyí meule íyí diököl tso' dalöie skëkõlie ese a, ese kè kar, ese kè katar. Ñies ie'pa kè kàne trënuK. Iyiwak ttéwa kuli' siuleka ese chkà kè katar ñies ipé kè katar. Ká iaiaë ttè i' pakanemi ká wa' ñe se' ñi dapa'wo wé a eno diwö bit ekkè. E' kuëkí íyí ekkè è shtõmisö ie'pa a.”

Yëkkuö patkëne s'yamipa kè dör judiowak, esepa a

²² Skëképa Jesús icha eruleë e'pa qos ena iwökir kibipa ena Jesús ttekölpa tsá, e'pa wa iwër buaë tò wëpa welepa shushtë ie'pa shua as imi'rak Pablo ena Bernabé ta dòmi Antioquía. Es ie'pa tò Judas kiè ñies Barsabás ena Silas, e'pa shushtë. Wëpa e'pa dalöieke taië s'yamipa ulitane tò. ²³ Etá yëkkuö shtë iwökirpa tò e' mé ie'pa a as iwa imi'rak. Yëkkuö e' tò iché i' es:

“Sa' dör Skëképa Jesús icha eruleë e'pa wökir kibipa ena Jesús ttekölpa tsá, sa' dör a' yamipa. Sa' tso' yëkkuö i' shtëk a' dör sa' yamipa erë kè dör judiowak serke Antioquía ena Siria ena Cilicia e'pa a. A' shke'wëmi sa'

* 15:18 Amós 9.11-12

tö. ²⁴ Sa' wā ijchēnewā tö sa' yamipa welepa e' yē'ttsa sa' shuā, e'pa dē'mi a' ska'. Ie'pa tö a' tsiriō' iwákpa ttè wa. E' tö taië a' wökir tsiriwéka. Kè sa' wā kawō mène ie'pa a' a' wöbla'woie ì wa. ²⁵ E' kueki sa' ulitane wa iwēr buaë wēpa welepa shushtök sa' shuā as imi' a' sauk Bernabé ena Pablo tā. Sa' yami e'pa dalër taië sa' éna. ²⁶ Ie'pa e' me'ttsa weinuk taië. Ie'pa kè suane ttèwa Skékēpa Jesucristo tté kueki. ²⁷ Sa' tö Judas ena Silas patkémi ttök a' tā. Ie'pa tö ipakeraë a' wöshaë yēsyesë wēs yēkkuō i' ki ikitule es. ²⁸⁻²⁹ Buaë idir Wiköl Batse'r a, ñies sa' a, tö a' kè kawōtā judiowak ser e' blök seraa. I' è blök a' ké: Chkè meule íyi diököl tso' dalöiè ese a, e' kè katar. Ñies ipé kè katar ena iyiwak ttéwa kuli' siuleka ese chkà kè katar. Kè a' kàne trēnuk. Íyi ekkè è kawōtā blè a' tö. A' tö iwé es, e' tā e' dör buaë. Skéköl tö a' kimè.”

³⁰ Etā ie'pa e' chéat tā imíyal Antioquía. Mik ie'pa demi eē tā ie'pa iyamipa dapa'wéka, e'pa a' yēkkuō mirdak iwā e' méitö. ³¹ Mik iyamipa tö yēkkuō aritsé, etā e' tö ie'pa er pablé taië, e' kueki ittse'nerak buaë. ³² Judas ena Silas, e'pa dör Skéköl ttekölpa ñies, e' kueki ie'pa tö iyamipa patté taië. E' tö iyamipa er pablé taië, ikimé taië. ³³⁻³⁴ Ie'pa sené eē kukuie. Mik ie'pa mitkene itò wane etā iyamipa tö iché iarak a' shkó wöbla wa. ³⁵ Erë Pablo ena Bernabé e' tséat Antioquía. Ie'pa ena imalepa taië e'pa tso'rak Skékēpa Jesús tté buaë pakök. Ñies ttè e' wa s'wöbla'uk ie'pa tso'.

Pablo ena Bernabé kè kaneblöky'iq ñita

³⁶ Kawō tka taië, e' ukuöki tā Pablo tö iché Bernabé a:
—Mishkane etökichane ká qos ki se' bak Skékēpa Jesús tté pakök e' ane s'yamipa sauk tö is ie'pa tso'.

³⁷ Bernabé k_i Juan kiane tsèmi ie'pa ta. Juan e' kiè ñies Marcos. ³⁸ Erë Marcos tö ie'pa me'at ká kiè Panfilia ee. Ie' kè kaneblèneia ie'pa ta. E' kuëki Pablo kè éna ie' tsakmi ie'pa ta. ³⁹ Iñi iutérak darërëë erë kè ishuline. E' kuëki ie'pa ñi blabatsélor. Bernabé wá Marcos mítser e' ta ta ie'pa míyal kanò k_i dò Chipre. ⁴⁰ Pablo tö wëm kiè Silas e' kiémi e' wapie. Iyamipa tö ie'pa méat Skëköl er buaë chò sia e' ulá a. Eta ie'pa e' yéttsa ee ⁴¹ tkamirak Siria ena Cilicia. Ie'pa tso' Skëképa Jesús icha erule erule tso' ká e' k_i e'pa diché k_i iök Jesús ttè wa.

16

Timoteo míq Pablo ena Silas wapie

¹ E' ukuök_i ta Pablo ena Silas demi Derbe ta imíyal Listra. Eë wëm kiè Timoteo e' serke, ie' dör Jesús ttökata. Ie' mì dör judiowak e' dör Jesús ttökata ñies. Erë iyé dör griegowak. ² S'yamipa serke Listra ena Iconio, e'pa tö icheke tö Timoteo dör pë' buaë. ³ Pablo k_i ie' kiane tsèmi e' wapie. Erë judiowak serke ká e' k_i e'pa ulitane wá ijcher tö Timoteo yé e' dör griegowak. E' kuëki Pablo tö ie' ké itóttola kkuölit tök tsir as judiowak kè ulurka iki. ⁴ Ká kôs wé ie'pa dami ee ì uk patkë' Skëképa icha erule tso' Jerusalén e'pa wökirpa ena Jesús ttekölpa tsá e'pa tö, e' wá paké ie'pa tö s'yamipa ulitane a. ⁵ Es Skëképa Jesús icha erule erule e'pa kôs diché k_i iëne Jesús tté a. Ñies pë' k_i iërke taië kekraë.

Pablo tö wëm dör Macedonia wak e' sué kabsueie

⁶ Eta Wiköl Batse'r kè wá kawö mène ie'pa a Jesús tté buaë pakök ká kiè Asia ee. E' kuëki ie'pa tkami ká kiè Frigia ena Galacia ⁷ demi ká kiè Misia e' kköröwá ee. Eta ie'pa tö ima'wé shkökwá ká kiè Bitinia e' a, erë Jesús Wiköl kè wá

kawö mène ie'pa a. ⁸ E' kueki ie'pa tkami yësyësë Misia kker demi ká kiè Tróade dayë kkò a wé kanò irirke ee. ⁹ Eta nañewe Pablo tö ì sué kabsueie. Ie' tö wëm sué eköl, e' dör ká kiè Macedonia e' wak. E' dur shkë'ka ta ikköché ia: “Be' shkótkö Macedonia sa' kimuk.” ¹⁰ Pablo tö e' sué one ta bet sa' dali iémi mitke Macedonia. Sa' wa ijcher buaë tö Skéköl ki ikiane tö sa' tö Jesús tté buaë pakè ká e' ki.

Alaköl kiè Lidia e' erblé Jesús mik

¹¹ Eta sa' e' iéka kanò a Tróade, míyal yësyësë ká kiè Samotracia ee. Bule es ta sa' demi ká kiè Neápolis ee. ¹² Ee ta sa' míyal klò ki dò ká kiè Filipos ee. Ká e' a romawak tso' taië. E' dör ká bua' bua' atë Macedonia. Ee sa' sené ká tkël ká skel ulatök. ¹³ Judiowak eno diwö ta sa' e' yélur míyal di' kkömik wé sa' tö ibikeitsè isalema judiowak wa ká tso' ttoie Skéköl ta ee. Mik sa' tö ikué, eta ee sa' e' tuléser Jesús tté buaë pakök alakölpá ñi dapa' wéka e'pa a. ¹⁴ Ie'pa eköl kiè Lidia, e' dör ká kiè Tiatira e' wak. Ie' dör datsi' bua' bua' daloshdalosh ese wataukwak. Ie' tö Skéköl dalöieke taië. Skéképa tö ie' er ñi' wé as Pablo ttöke kos e' klö'uitö mokië. ¹⁵ Eta ie' e' wöskué iyamipa tso' ie' u a e'pa ta. E' ukuöki ta ie' tö sa' a iché kröröë:

—A' ibikeitsè tö mokië ye' dör Jesús mik erblökwak, e' ta a' klönúia ye' ska'.

Es ie' tö sa' ké klönukia ie' ska'.

Pablo ena Silas wötënewa s'wöto wé a Filipos

¹⁶ Ká et ta sa' mirwane wé s'ttöke S'yé ta ee. Sa' mirwaia ta pë' busi kuéwa sa' tö eköl, e' a wimblu sulusi tso' eköl, e' wa íyi tötkekeitö. Wëpa wëlepa tö ie' to'ttsa ie'pa a kanëblök íyi tötökök, e' ské klö'wëke ie'pa tö taië e' a. ¹⁷ Busi e' shkëmi Pablo ena sa' itöki. Ie' ardatse:

—Wëpa ikképa dör Skéköl íyi ulitane tsata e' kanè mésopa. Ie'pa tö s'tsatkè ñalé e' tté pakeke a' a.

¹⁸ E' wambléitö ká taië, bata ekkë tã Pablo ulunekã taië. Ie' e' wötréene tã ichéitö wimblu sulusi tso' busi a e' a:

—Jesucristo ttò wa ye' tó be' a ichè be' e' yóttsa ie' a.

E' wöshaë tã wimblu sulusi e' yéttsa ia.

¹⁹ Mik busi wökirpa tó isuë tó inuköl kè dë'ia ie'pa ulã a busi batamik, etã ie'pa tó Pablo ena Silas klö'wéwã tsémirak wé ttè shulökwakpa tso' eë. ²⁰ Ie'pa tó ikkatérak ttè shulökwakpa a tã ichérakitö:

—Wëpa ikképa dör judiowak. Taië ie'pa tso' sa' shutiuk.

²¹ Sa' dör romawak, e' kueki kè sa' a kawö mène ie'pa tó s'wöbla'weke sene wa e' klö'uk ena e' wã uk.

²² Etã ká e' wakpa bitëshka Pablo ena Silas ki. Etã ishulökwakpa tó idatsi' yöktsã ké iki tã ippök ké darërë kal wa. ²³ Ibunerak siarë wötéwarakitö s'wöto wé a. Tã ichérakitö s'wöto wé wökir a tó ikk'ónú bua'iewã as kè itköyal. ²⁴ Mik ie' a kawö e' mène, etã ie' tó Pablo ena Silas wötéwã iwé wötëulewã bua'iewã, ese a. Ie' tó ie'pa klö tiéwã kaltak wöbiule s'klö wötowã ese a. Es iméarakitö.

²⁵ Ká de ká shaböts etã Pablo ena Silas tso' ttök Skököl tã ena ittseitstök. Imalepa tso' ittstök. ²⁶ E' wöshã tã í tka darërë. S'wöto wé wöppéitö darërë. E' wöshaë tã ukkö ulitane kköburolone. Ì kos wa ie'pa tso' moulewã, e' wötsërolone. ²⁷ S'wöto wé wökir tã'neka. Mik ie' isuë tó ukkö kos tso' áie tã ibikeitséitö s'tso' wötëule e' kos tkayal. E' kueki itabë kuéttsaitö e' ttowãie. ²⁸ Erë Pablo anekã:

—jKè be' e' ttökwa! Sa' tso'ia ulitane.

²⁹ Etã s'wöto wé wökir tó bö'wö kié tã itunewã Pablo ena Silas ska'. Eë ie' e' tkéwã kuchë ki ie'pa wöã painékã suane taië. ³⁰ Etã ie' tó ie'pa yéttsã u'rki tã ie'pa a ichaké:

—A kékëpa, ÿi uk ye' kawöta e' tsatkoie?

³¹ Ie'pa ie' iüté:

—Skëkëpa Jesús mik be' erbló etá be' tsatkërdaë ñies be' yamipa tsatkërmi es.

³² Etá ie'pa tö Skëkëpa tté paké ie' a ena iyamipa kos tso' iu a, e'pa a. ³³ Etá e' nañewe ulatök s'wöto wé wökir tö ie'pa tsémi e' ta. Ie'pa shka'ule taië e' kapeyéitö. Etá ie' ena iyamipa kos e' wöskuélor. ³⁴ E' ukuöki ta ie' tö itsémirak iu a ta itiérakitö. Ie' ena iyamipa e'pa erblé Skëköl mik, e' kuëki ie'pa kos ttsé'ne buaë.

³⁵ Ká ñine ta ishulökwakpa tö ishkëkipa patkëmi ichök s'wöto wé wökir a tö Pablo ena Silas ómine. ³⁶ S'wöto wé wökir tö iché Pablo a:

—Sa' shulökwakpa tö ye' a kawö mé a' ökmine. E' kuëki a' yúne bèrë.

³⁷ Erë Pablo tö iché ia:

—Sa' dör romawak* Ie'pa tö sa' buk sulitane wöshaë kam sa' shulir e' yöki. Sa' wötë'waitö s'wöto wé a. I'ñe ta ie'pa ki sa' kiane èmine akir. Ie'pa kè a kawö ta' iwoie es. As ie'pa wákpa bitu sa' ökmine.

³⁸ Etá shkëkipa tö tté e' chéne ishulökwakpa a. Mik ie'pa ittse tö Pablo ena Silas dör romawak, etá taië ie'pa suane.

³⁹ Etá ie'pa míyal Pablo ena Silas ska' ta ichérakitö:

—Ì sulu wamblé sa' tö a' ki e' olo'yó sa' ki.

Etá iémine ta ikköchéraak ia: “A' e' yölor sa' ká ki.”

⁴⁰ Etá Pablo ena Silas yënettsa s'wöto wé a míyal Lidia u a iyamipa weblök. Ie'pa pablérakitö etá imíyal.

17

Tesalónica wakpa tsirineka Jesús tté kuëki

¹ Pablo ena Silas tkami ká kiè Anfípolis ena ká kiè Apolonia demirak ká kiè Tesalónica wé judiowak wa ñi

* ^{16:37} Romawak: Pablo ditséwö dör judiowak erë ie' yami bak e' wele e' yö romawakie, e' kuëki ñies ie' dör romawak.

dapa'wɔ wé tso' ee. ² Etá Pablo dewá e' wé a eno diwö wa wes ie' wöblar es. Ee ie' kapaké ie'pa tá Skéköl yékkuö wa eno diwö mañat. ³ Ie' tö ikkaché ie'pa a tö itso' kitule Skéköl yékkuö kí tö wé pairine'bitu idi' wa s'blúie e' tterawá tá ishkerdakane. Ie' tö iché ie'pa a:

—Jesús pakök ye' tso' a' a, e' wák dör wé pairine'bitu idi' wa s'blúie e'.

⁴ Judiowak welepa erblé Jesús mik, tá ie'pa de Pablo ena Silas kíe. Nies griegowak tö Skéköl dalöieke wes judiowak es, esepa taië erblé Jesús mik ena alakölpá dalöiërta' esepa taië erblé imik ñies. ⁵ Erë e' tö judiowak malepa uluwéka taië. Etá wépa sulusipa tso' éme ñalá kí, esepa kíerakitö pé' dapa'uk taië, e'pa kí uluwérakitö tá imíyal kësik wa pé' malepa uluukka. Etá itkawarak kësik wa Jasón u a Pablo ena Silas yulök yëttsá mè imalepa ulurke taië e'pa ulá a. ⁶ Erë kè iwá ikunerak ee. E' kueki Jasón ena iyamipa welepa e'pa kuémirakitö ká e' wökirpa wöá tá ichéitörak aneule:

—Wépa ikképa tö ká ulitane wakpa tsirio', e'pa de íe ñies. ⁷ Jasón tö ie'pa kiéwá iu a. Ie'pa ulitane tso' ichök tö se' blú kibi dör kuá'ki, e' kiè Jesús. Ie'pa tö sa' blú kibi e' ttè dalösewéwá.

⁸ Mik pé' ulitane ena iwökirpa tö ttè e' ttsé, etá ie'pa shutineka taië. ⁹ Erë Jasón ena iyamipa kërakitö inuköl mukat iwá kkachoie tö ie'pa datskene ishulök tá iéminderakitö.

Pablo ena Silas tö Jesús tté paké Berea wakpa a

¹⁰ Ká tuinetke etá bet iyamipa tso' Tesalónica e'pa tö Pablo ena Silas patkemi ká kiè Berea ee. Ie'pa demi Berea etá imíyal judiowak ñi dapa'wɔ wé a. ¹¹ Judiowak e'pa er dör buaë judiowak tso' Tesalónica e'pa tsata. Ie'pa tö Jesús tté kí ttsé er bua' wa. Kekraë ie'pa tö Skéköl yékkuö

suekewā bua'iewā isuojie tō ì ché Pablo tō e' yēne ö kè iyēne. ¹² Es tajē ie'pa erblé Jesús mik. Nies tajē griegowak erblé imik alakōlpa dalöiērtā' ena wēpa ñies. ¹³ Erē mik judiowak serke Tesalónica e'pa wā ijchenewā tō Pablo tso' ñies Berea Skököl ttē pakök, etā imiyal ee. Ie'pa tō Berea wakpa dapa'wēmi shutiwēmi Pablo kī. ¹⁴ Erē s'yamipa tso' Berea, e'pa tō Pablo ké e' yöktsā tā ipatkémi dayē kkömik. Erē Silas ena Timoteo e' tséat Berea. ¹⁵ Wēpa wā Pablo mirwā, e'pa wā imí dò ká kiè Atenas ee. E' ukuökī tā ie'pa biteyalne. Pablo tō ie'pa ka' ichök Silas ena Timoteo a tō “a' kié bet.”

Pablo tō Jesús tté paké Atenas wakpa a

¹⁶ Pablo tso' Silas ena Timoteo kinuk Atenas, e' dalewa ie' tō isué tō ká e' wakpa wā íyi diököl tso' dalöiè, ese tso' taiè. E' tō ie' tsiriwékā taiè. ¹⁷ E' kuekī judiowak ñi dapa'wō wé a ie' kapaköke judiowak tā ena pè' kè dör judiowak erē Skököl dalöieta' esepa tā. Nies ie' kapaköke kekraë Atenas wakpa tā wé ie'pa döke taiè íyi tauk ee. ¹⁸ Nies ie'pa wöbla'ukwakpa welepa kiekerakitö epicúreo wakpa* ena estoico wakpa†, e'pa ñi iutémi Pablo tā. Ie'pa welepa tō ie' cheke i' es:

—¿Ì kabeweke s'ñeñe dió tō?

Ie'pa welepa skà tō icheke:

—Ttseskua e' dör kékōlpa tsakiè dalöieke ká bár wakpa tō e'pa tté pakökwa.

Pablo tso' Jesús kōtewā shkenekane e' tté buaè pakök e' kuekī ie'pa tō ie' ché es. ¹⁹ E' kuekī ie' tsémirakitö wé

* 17:18 epicúreo wakpa: E' wakpa tō iklö'wé tō s'ser e' wā bua'ie dör ttsé'ne buaè. Ttè e' wa s'wöbla'weke ie'pa tō. † 17:18 estoico wakpa: E' wakpa tō iklö'wé tō s'ser e' wā bua'ie dör se' e' kkö'nù ì sulu qos e' yöki. Ttè e' wa s'wöbla'weke ie'pa tō.

ie'pa e' dapa'uke ttè tsäkië pakarke ese ttsök ee. Kä e' kiè Areópago. Tä ichakérakitö:

—Ttè pa'alí pakeke be' tö, ¿e' pakèmibö sa' a? ²⁰ Ttè pakeke be' tö, e' kè ttsëule sa' wa, e' kueki e' kiane jchenukwä sa' ki jima e' wà dör?

²¹ Atenas wakpa kos ena ká kuä'ki wakpa serke Atenas, e'pa ulitane tö ttè pa'alí ttseke ese è pakeke ñi a kekraë.

²² Etä Pablo e' duéka ie'pa shua Areópago wé a ta ichéitö:

“A Atenas wakpa, i kos suéyö, e' wa ye' wa ijcher tö a' tö kékölpa tsäkië dalöieke. ²³ Mik ye' tkami a' ká shua, etä wé a' tö kékölpa ñe' dalöieke ese ké suéyö taië. E' shua ye' tö ka' tso' idalöioie ese kué et e' ki itso' kitule i' es: ‘Skököl eköl kè jcher se' wä tö yi idir, e' dalöioie’. Ie' dalöieke a' tö, erë a' kè wä ijcher tö yi idir. Skököl e' pakeke ye' tö a' a.

²⁴ “Ie' tö ká ulitane ena íyi ulitane tso' iki e' yö'at. Ie' dör kájai ena ká i' e' kos wák. Ie' kè serku' Skököl wé yöule s'ditsö wa ese a. ²⁵ Sulitane serke ie' mik. Ñies íyi ulitane kiane se' ki senoie, e' mekeitö se' a kekraë. E' kueki ie' kè ki ikiar tö se' ie' kimè i wa.

²⁶ “Wëm eköl è wa ie' tö se' ditsöwö ulitane alöwé. Ie' tö se' ké senuk ká wa'ñe. Mik ie' tö ká i' yö', etä ie' tö se' katatë'atbak tö mik se' sermi, wé se' sermi ditséwö wa ditséwö wa. ²⁷ Ie' tö se' katatë'at es as se' tö ima'ù yulè isalema sö ikuëmi. Erë moki ie' kè ku' kamië se' yöki. ²⁸ E' dör wes yile tö iché es, e' tö iché: ‘Skököl mik se' serke se' shköke, ie' wa se' tso'.’ Ñies e' dör wes a' wákpa ttsököl eköl tö iyë'at es, e' tö iché: ‘Sulitane dör Skököl aleripa.’ ²⁹ Se' dör Skököl ditséwö, e' kueki kè se' kàne ibikeitsök tö ie' dör wes íyi diököl yöule se' wä orochka wa ö inukölchka wa ö ákchka wa es. E' kos yuésö wes se' ibikeitsè es wes se'

wákpa a iyör es. Erë Skëköl kè dör es. ³⁰ Iaiäe ta kè se' wa ijcher tö wes ie' dör, e' kuëki e' nuí tköo'atbak ie' tö ie'pa ki. Erë i'ñe ta ie' tso' ichök ká ulitane wakpa a tö a' kawöta er mane'uk. ³¹ Skëköl tö idiwö me'atbak wekkë alè ta ie' tö sulitane shuleraë yësyësë wëm eköl tkë'kaitö e' wa. Wëm e' kötewä erë ishkeo'kane Skëköl tö, e' wa ie' tö iwà kkaché sulitane a tö mokië wëm ñe' tkë'kaitö.”

³² Erë mik Atenas wakpa tö ittse tö Pablo tö s'du'wa shkenekane e' ché, eta ie'pa welepa tö ie' wayué, erë welepa skà tö iché:

—Ì pakeke be' tö, e' skà ttsëmi sa' tö iëtökichane.

³³ Eta Pablo mía. ³⁴ Erë wëpa welepa míyal Pablo ta, ta e'pa erblé Jesús mik. Ie'pa e' shua Dionisio tso'ñak, e' dör Areópago wökirpa eköl. Ñies alaköl eköl kiè Dámaris ena pë' skà tso'ñak ishua.

18

Pablo mía Corinto

¹ E' ukuöki ta Pablo e' yëttsa Atenas mía Corinto. ² Eë wëm kuëwaitö eköl dör judiowak kiè Áquila, e' dör ká kiè Pontö e' wak. Ie' alaköl kiè Priscila. Ie'pa bak senuk Roma atë Italia eë. Ie'pa dë'bitu erpa Corinto. Ká tso' tseë romawak ttè dikia e' wökir kibi kiè Claudio, ie' tö judiowak qos serke Roma e' yökulur patké. E' kuëki Áquila ena ilaköl e' yë'lur Roma demi Corinto. Pablo mía ie'pa pakök. ³ Ie' kanè dör ie'pa kanè ese è, e' kuëki ie' e' tséat ie'pa ta kaneblök. Kanè e' dör iyiwak kkuölit yueke üe tsëmi ese kané. ⁴ Eno diwö bit ekkë Pablo mi'ke judiowak ñi dapa'wo wé a. Eë ie' tö Jesús tté pakeke ie'pa ulitane a. Ie' tö judiowak ena pë' kè dör judiowak e'pa ulitane pableke as ie'pa erblö Jesús mik.

⁵ Mik Silas ena Timoteo tso' Macedonia, e'pa demirak Corinto, etā Pablo kè kaneblēneia Áquila ta. E' skéie ie' e' mé Jesús tté buaē e' è pakök kekraē. Nies ie' tö judiowak pablé kekraē tö Jesús dör wé pairine'bitu idi' wa s'blúie e'. ⁶ Erē ie'pa wötkémi Pablo ta ta iché suluē. E' kueki ie' datsi' wöppée iwà kkachöie tö ie' kè ki inuí ku' ta iché iarak:

—A' weirdaē siarē, e' wiie a' wákpa iane. E' kè wēneia ye' wöki. I'tami ye' mía pē' kè dör judiowak esepa pattök.

⁷ Etā Pablo e' yéttsa judiowak ñi dapa'wo wé a mía wēm kiè Ticio Justo, e' u a senuk. Wēm e' tö Skököl dalöieke taiē. Ie' serke judiowak ñi dapa'wo wé o'mik. ⁸ Wēm kiè Crispo, e' dör judiowak ñi dapa'wo wé, e' wökir. Ie' erblé Sköképa Jesús mik iyamipa kos e' ta. Es ñies taiē Corinto wakpa tö Jesús tté ttsé ta ierblérak imik ta ie' wöskuélor. ⁹ Ká et nañewe Sköképa Jesús tö Pablo a iché kabsueie: “Kè be' suanuk. Ye' tté kí pakó kekraē. Kè be' siwa'blök. ¹⁰ Ye' tso' be' ta. Kè yi a ì sulu wamblénuk be' ki yēs. Ye' wa pē' tso' taiē ká i' ki.” ¹¹ Es Pablo atē duas ek ki shāböts Corinto ie'pa wöbla'uk Skököl ttè wa.

¹² Mik Galión bak Acaya wökirie, etā judiowak serke Corinto e'pa ñi dapa'wéka Pablo naméie ie' tsémi ttè shulo wé a. ¹³ Ie'pa tö Pablo kkaté Galión a ta iché ia:

—Wēm i' tso' sa' pablök tö Skököl dalöió sa' tö, erē kè dör wes ttè dalöiēno meneat sa' a e' tö iché es.

¹⁴ Pablo ttémitke ta Galión tö iché judiowak a:

—Moki ì sulu wamblópaitö, e'ma ye' tö a' ttò ttsèmi. ¹⁵ Erē a' tso' ñi wöñatkök ttè ki ena wēpa wēlepa kiè ki, ena a' wákpa ttè dalöiēno e' ki, e' kueki e' shuló a' wákpa tö. Ye' kè tö ttè ese shulè.

¹⁶ Etā Galión tö ie'pa uyéttsa ttè shulo wé a. ¹⁷ Etā pē' tso' taiē e'pa tö wēm kiè Sóstenes dör judiowak ñi dapa'wo

wé wökir, e' klö'wéwa ppérakitö ttè shulo wé wöshaë. Erë e' kî Galión kè tkine yës.

Pablo dene Antioquía

¹⁸ Pablo e' tséatía taië Corinto. E' ukuöki ta ie' e' chéat iyamipa a ta imía ká kiè Cencreas wé kanò irirke ee. Eta ee ie' e' iéka kanò mi'ke Siria ese a. Áquila ena Priscila mitke ie' ta ñies. Kam ie' e' iöká kanò a, eta ie' tsà téé manene. E' wéitö ittè me'itö Skököl a e' blóie wes iyé'itö es. ¹⁹⁻²¹ Mik ie'pa demi ká kiè Éfeso ee, eta Pablo mía judiowak ñi dapa'wo wé a Jesús tté buaë pakök judiowak ñi dapa'uke ee, e'pa a. Ie'pa tö iché ia taië: “Be' e' tsúatía sa' ta.” Erë kè ie' e' tsakat. Ie' e' chéat ie'pa a ta ichéitö: “Skököl kî ikiane, e'ma ye' skà dörane a' pakök.” Áquila ena Priscila e' tséat senuk Éfeso.

E' ukuöki ta Pablo e' iéka kanò a ta imía. ²² Mik idemi Cesarea ta imía Jerusalén Skökëpa Jesús icha erule e'pa shke'uk. E' ukuöki ta imía Antioquía. ²³ Ee ie' sené ekuölö. E' ukuöki ta iskà miáne Galacia ena Frigia, ká e' kos a Jesús ttökatapa er diché kî iök.

Apolo tö Jesús tté paké Éfeso wakpa a

²⁴ E' kéwö ska' ta wëm eköl kiè Apolo dör judiowak, e' de Éfeso. Ie' datse ká kiè Alejandría ee. Ie' dör wëm ttò buaë ese. Ie' wa Skököl yëkkuö suule buaë. ²⁵ Ie' yöule buaë Skököl ñalé tté wa. Ie' tö s'wöbla'weke kaneë yësyesé Jesús tté wa. Erë ie' kè wa Jesús tté jcher seraä. Ie' wa Juan S'wöskuökwak, e' ttè è suule. ²⁶ Ie' ttémi judiowak ñi dapa'wo wé a, kè suane. Eta mik Priscila ena Áquila tö ie' kapaköke e' ttsé, eta ikiémirakitö iu a. Ta ee ie'pa tö ie' kî wöbla'wé buaë Skököl ñalé tté wa. ²⁷⁻²⁸ E' ukuöki ta ie' shkak ká kiè Acaya ee. E' kuëki iyamipa serke Éfeso, e'pa tö ie' kímé. Yëkkuö shtérakitö Jesús ttökatapa tso'

Acaya, e'pa a ʔs ie'pa tö ie' kiòwə buaë. Mik ie' demi Acaya ta wépa erblé'bak Jesús mik Skéköl er buaë ché ie'pa a e' kueki, esepa kimé taië ie' tö. Ie' e' alöke judiowak ki ie' ttè wa sulitane wörki. Ie' tö ie'pa siwa'blöweke. Ie' tö ikkacheke yësyësë Skéköl yëkkuö wa tö moki Jesús dör wé pairine'bitü idi' wa s'blúie e'. Es ie' tö iyamipa kimé.

19

Pablo tö Jesús tté buaë paké Éfeso wakpa a

¹ Apolo tso'ia Corinto e' dalewa Pablo tkami kabata wa demi Éfeso. Eë ie' tö Jesús ttökatapa welepa kué. ² Ie' tö ie'pa a ichaké:

Mik a' erblé' Jesús mik etə ¿Wiköl Batse'r dë' a' ki?
Ie'pa tö iüté:

—Kè sa' wə ittseüle tö Wiköl Batse'r tso'.

³ Pablo tö ie'pa a ichaké:

—Etə ¿wöskuè wése wa a' wösune?

Ie'pa iüté:

—Juan s'wöskuè e' wa.

⁴ Ie' tö iché iarak:

—Wépa er mane'wé Skéköl a, esepa wösuk Juan tö. Erë ie' tö iyë' ie'pa a tö wëm datse ie' itöki e' mik ie'pa ké erblök.

⁵ Ttè e' ttsérakitö ta iwöskuélor Skéképa Jesús ttò wa.

⁶ Pablo ulà méka ie'pa ki ta Wiköl Batse'r debitu ie'pa ki ta ie'pa ttémi ttò kua'ki kua'ki wa. Nies i mé Skéköl tö ie'pa a ché, e' ché ie'pa tö. ⁷ Seraa ie'pa dökə dabom eyök ki bül (12) wépa.

⁸ Si' mañat Pablo shkére judiowak ñi dapa'wo wé a, eë Jesús tté pakéitö kè suane. Ie' tö ie'pa pableke taië as ie'pa e' tiüwə i blúie Skéköl tso' e' tté dikia. ⁹ Erë ie'pa welepa wökir darërëë, e' kueki ie'pa kè wə ttè e' klöne. Ie'pa tö

Jesús dör se' ñala e' tté ché suluë silitane kukua. Etā Pablo e' skéttsa ie'pa yöki. Wépa detke Jesús ttökatapaie e'pa tsémi e' ta dö wé wém kiè Tirano e' wa u tso' s'wöbla'woie ee. Ee Jesús tté pakeke Pablo tö kekraë. ¹⁰ Es iwéitö dö duas bök. Sulitane serke Asia, judiowak ena pè' kè dör judiowak, e'pa tö Skëképa Jesús tté ttsé. ¹¹⁻¹² ì kè or yi a ese wé Skëköl tö kibiie Pablo wa tkòka imalepa tsata dö tsamo ena datsi' döne ie' mik ese mi'kerak iwā wépa kirirke esepa ska' ta ibuanene ta wimblupa sulusi e' yélur ie'pa a.

¹³ Erë judiowak wélepa shkörami ñala ki wimblupa sulusi yökulur pè' a. E'pa tö iché 'ima'üsö Skëképa Jesús ttò wa.' Ie'pa ichémi wimblupa sulusi a i' es: "¡A' e' yólur Jesús pakeke Pablo tö, e' ttò wa!"

¹⁴ Es wém kiè Esceva e' ala'r dökā kul e'pa tö ima'wémi ñies. Esceva dör judiowak sacerdotepa wökirpa e' eköl. ¹⁵ Erë etökicha ta wimblu sulusi tö ie'pa iuté: "Yi dör Jesús e' jcher ye' wa. Ñies yi dör Pablo e' jcher ye' wa. Erë ¿a' dör yi?"

¹⁶ E' wöshaë wém a wimblu sulusi tso', e' unekā ie'pa ki. Ie' e' alékā ie'pa ki idiché taië wa. Ie'pa ppéitö siarë. Ie'pa e' yélur tkayal sume shkā'ule taië. ¹⁷ Éfeso wakpa kos, judiowak ena kè judiowak, e'pa wā ijchenewa. Taië ie'pa suane. Es Skëképa Jesús tté kí bunekā taië.

¹⁸ Taië pè' erblé Jesús mik esepa debitu ì kos wamblë'rakitö suluë e' chökkā silitane kukua. ¹⁹ E'pa shūā taië ie'pa awāpa tso'ñak. E'pa kos wā iyëkkuö tso'rak iwā wakanewè, ese debitu ta iña'wéwa silitane wöshaë. Ie'pa tö iyéttsa kos yëkkuö e' ské dör ta idettsa inuköl taië. E' dör ie'pa inuköl dökā 50.000 ekkë. ²⁰ Es Skëképa Jesús tté kí bunekā taië. Sulitane tö isuë tö ttè e' diché ta' taië.

²¹ E' ukuöki tã Pablo ibikeitsé: “Ye' mi'ke kã kiè Macedonia ena Acaya e' wakpa pakök. E' ukuöki tã ye' michoë dò Jerusalén. Eë tã ye' kawöta shkök dò Roma ñies.”

²² E' ukuöki tã ie' kímukwakpa bö, Timoteo ena Erasto, e'pa patkémii to dò Macedonia, e' dalewa ie' atëia Asia ekuölö.

Éfeso wakpa shutineka taië

²³ E' kèwö ska' Éfeso wakpa shutineka taië Jesús dör Se' ñalã e' tté kuëki. ²⁴ Wëm tso' eköl kiè Demetrio e' dör íyi diököl yuök inukölchka wa e' sté. E' tó Éfeso wakpa Këköl kiè Artemisa wak dör alakölie, e' wé diököl yueke inukölchka wa. Kanè e' wa ie' ena ikanè mésopa inuköl klö'uke taië. ²⁵ Ikanè mésopa dapa'wékaitö imalepa kanëblöke kanè ese è a e'pa tã, tã ichéitö: “A këkëpa, a' wã ijcher tó kanè i' wa se' inuköl klö'uke. ²⁶ Erë a' isué, a' ittse tó Pablo e' tso' ichök tó íyi diököl yuekesö dalöie skëkölie, e' kè dör skëköl moki. Taië pë' tó tté e' klö'wétke íe Éfeso ñies Asia kos e' a. ²⁷ E' dör suluë. E' tó se' kanè sulu'wëmiwã. Ñies Artemisa, se' këköl taië, e' wé dalösewëwamiitö. Se' këköl taië dalöiërta' taië Asia ena kã wa'ñe, e' dalösewëwaraitö.”

²⁸ Mik tté e' ttsérakitö, etã ilunekarak taië. Etã ianekarak: “Artemisa dör Éfeso wakpa këköl, e' dör këköl taië.”

²⁹ Etã Éfeso wakpa kos aláneka taië. Wëpa datse bö Macedonia. Eköl kiè Gayo iëköl kiè Aristarco, e'pa dör Pablo wapiepa, e'pa tso'ñak eë. Éfeso wakpa tó ie'pa bö klö'wëwã kuëmi dò wé ie'pa ñi dapa'uke e' wé a. ³⁰ Etã Pablo shkakwã eë ttök ie'pa tã, erë Jesús ttökatapa malepa kè wã ianemi. ³¹ Ñies Asia wökirpa welepa éna Pablo dalër taië, e'pa tó tté patké Pablo a: “Kè be' minukwã eë.” ³² E' dalewa Éfeso wakpa daparke e'pa shutineka

taië. Ie'pa arkekarak taië. Ikibiiepa kè éna iwà ane iók ie' dapa'wérak. E' kuëki eköltépa arke ku'a'ki, iëköltépa arke ku'a'ki. ³³ Etä judiowak tö wëm kiè Alejandro e' tsémi patkéule duéser sulitane wörki, e' kuëki pé' welepa tö ibikeitsé tö ie' wöki iwërke. Etä ie' tö ikkaché ulà wa tö “A' siwa'bló. Ye' ttöke judiowak tsatkoie.” ³⁴ Erë mik ie'pa wa ijchenewa tö ie' dör judiowak, etä ie'pa skà e' kékane anuk: “Artemisa dör Éfeso kéköl. E' dör kéköl taië.” Es ie'pa arkerak dò hora böt.

³⁵ E' ukuöki ta ká wökirpa yëkuö shtökwak, e' tö pé' ké siwa'blökwa. Ie' tö iché ie'pa a: “A Éfeso wakpa, ká ulitane wakpa wa ijcher tö se' dör Éfeso wakpa e'pa dör se' kéköl taië Artemisa e' wé kkö'nukwakpa, ñies ie' diököl anebitu ká jai a, e' kkö'nukwakpa. ³⁶ Kè yi a iyërpa tö kè idör es. E' kuëki a' siwa'blólur. Kè ì wamblar kè bikeitsule buaë. ³⁷ Wëpa i' debitu a' wa, e'pa kè wa ì blëulewa se' kéköl wé a. Ie'pa kè wa se' kéköl yëule suluë. ³⁸ E' kuëki Demetrio ena ikanè mésopa, ie'pa éna yile kkatok, e' ta as imi'arak ikkatök ttè shulökwakpa a ena s'wökirpa a. E'pa tso' kaneblok ttè shulo wé a. Ee ie' tsatkömirak ñi wöshaë. ³⁹ Erë ì skà kianeia a' ki yënoie, e' ta e' choie a' kawöta mik se' daparke wes ikanewekesö es etä. ⁴⁰ Ì tka ierö ì ñe, e' ki s'wökirpa tö se' kkatèmi. Kè iwà ta' mokië, e' kuëki ie'pa tö se' kkaté iki, e' ta kè se' a e' tsatkënik iyöki.” ⁴¹ Ie' tté one ta ichéitö ie'pa a, “A' yúshka.”

20

Pablo míä Macedonia ena Grecia

¹ Éfeso wakpa shutineka, e' olone ta Pablo tö Jesús ttökatapa kiéttsa pattè. E' ukuöki ta ie' e' chéat ie'pa a ta imía Macedonia. ² Ie' tkami ká e' wa'ñe iyamipa pattök, e' tö ie'pa er kuwé taië. E' ukuöki ta ie' míä Grecia.

³ Eë ie' sené si' mañat. Ie' tso'tke kanò klò'uk shkomi dò Siria, e' shua ta ie' wa ijchenewa tò judiowak ileritsétke ie' ttowa. E' kuëki ie' míane klò wa tkamine Macedonia. ⁴ Ie' wapiepa dör kul. Eköl kiè Sópatro, e' dör Berea wak, iyé kiè Pirro. Iëköl kiè Aristarco. Iëköl kiè Segundo, e' dör Tesalónica wak. Iëköl kiè Gayo, e' dör Derbe wak. Iëköl kiè Timoteo. Nies wëpa böi dör Asia wakpa, e'pa kiè Tíquico ena Trófimo. ⁵ Wëpa ekkëpa mía kewe sa' yöki sa' kinuk ká kiè Tróade eë. ⁶ Pan Kè Yöule Iwölöwoka Wa e' këwö tka, e'ta sa' e' yélur Filipos mía kanò ki' dò Tróade. Ká skel ukuöki ta sa' demi Tróade, e'ta ie'pa kué sa' tö eë. Eë sa' e' tséat ká kul.

Pablo tò tte bata paké Skëkëpa Jesús icha erule tso' Tróade, e'pa a

⁷ Eno diwö tuinetke ta sa' e' dapa'wéka ñita Jesús kötëwa e' këwö tkò'uk. Pablo tso' iyamipa ta kapakök. Ie' kawöta e' yöktsa bule es, e' kuëki ie' kapaké dò ká shaböts. ⁸ Sa' dapanëka u kakkë e' a. Taië bö'wö tso' wötskiuleka eë. ⁹ Duladula tkër eköl ukkò tsitsir ki, e' kiè Eutico. Pablo tso' kapakök taië e' dalewa Eutico shtrinewatke kapakwatke. Bata ekkë ta ikapowa ta ibrutanemi döttsa iski. E'ta ikéka ie'pa tò erë iduowaie. ¹⁰ E'ta Pablo dur kákke, e' e' éwa ta ie' e' méka duladula bata ki, ipaklö'wëwaitö ta ichéitö:

—Kè a' tkinukia. Itso' ttsë'ka.

¹¹ E' ukuöki ta Pablo tkakane kákke ta Jesús kötëwa e' këwö tkö'wëitö ie'pa ta. E'ta ie' kapakéia dò ká ñine ekkë ta imía. ¹² E'ta duladula tsémirakitö ttsë'ka iu a. E' tö ie'pa ulitane kí ttsë'wéka buaë.

Pablo e' yéttsa Tróade mía Mileto

¹³ Sa' míyal kewe Pablo yöki kanò ki' dò ká kiè Aso eë. Pablo wák shkak klò wa dò eë, e' kuëki sa' kawö me'attke

ie' t̄a ñi k̄inuk ee. ¹⁴ Mik sa' t̄o ie' kué, et̄a ie' e' iéka sa' t̄a kanò k̄i t̄a sa' míyal k̄á kiè Mitilene ee. ¹⁵ T̄a sa' michoë. Bule es t̄a sa' tkami k̄á kiè Quío, e' wöshaë. E' bule es t̄a sa' demí wé kanò irirke kiè Samos ee. E' bule es t̄a sa' mía Mileto. ¹⁶ Pablo shkakmi bet dò Jerusalén Pentecostés k̄éwö tkö'uk, e' kuek̄i sa' mineyal es. Pablo kè e' wöklö'wak taië Asia, e' kuek̄i ie' kè dè' Éfeso.

Pablo kapaké Skékëpa Jesús icha erule tso' Éfeso e' wökirpa t̄a

¹⁷ Pablo tso' Mileto e' t̄o Skékëpa Jesús icha erule tso' Éfeso e' wökirpa tsuk patké ñi dapa'uk ie' t̄a. ¹⁸ Mik idebiturak, et̄a Pablo t̄o iché iarak:

—Wes ye' sené a' shua ye' tsá dè'bitu Asia e'tami, e' jcher buaë a' w̄a. ¹⁹ Eré judiowak ileritseke ye' tsaiök e' ye' rreweke taië, eré kekraë ye' e' wöawa diöshet t̄a Skékëpa Jesús kanè uk ye' bak a' shua ië wa ì wa. ²⁰ Nies a' w̄a ijcher t̄o ttè buaë a' kimioie, ese kè blënewa ye' w̄a yës a' yöki. Ese wa ye' bak a' wöbla'uk sulitane wörki, ñies u a u a. ²¹ Ye' bak ichök wö yësyësë wa judiowak a ena pë' kè dör judiowak esepa a: 'A' ké er mane'uk Skököl a. A' ké erblök Skékëpa Jesús mik mokië.' ²² I'ñe ye' mitke Jerusalén. Ye' ittse t̄o es Wiköl Batse'r k̄i ikiane. Kè ye' w̄a ijcher wes ye' wëmirakitö ee. ²³ Ká wa'ñe wé ye' dè'ule ee Wiköl Batse'r t̄o ye' a icheke: 'be' wötërdaë, be' weirdaë siarë,' e' è jcher ye' w̄a. ²⁴ Ye' a t̄a ye' ttèw̄a ö ye' tso' ttsë'ka, kè e' k̄i ye' tkine. Kanè me' ye' a Skékëpa Jesús t̄o, e' è ewakwa ye' éna er bua' wa. Kanè e' dör Skököl er buaë chöke siä, e' tté buaë pakök.

²⁵ Ì blúie Skököl tso' e' tté pakéyö a' a. I'ñe ye' w̄a ijcher buaë t̄o a' ulitane kè t̄o ye' suepaiane. ²⁶ E' kuek̄i i'ñe t̄a yö ichè a' a mokië t̄o a' wépa kè tsatkëne, e' t̄a kè ye' iane

iwiie. ²⁷ Ì kiane kanewè Skèköl k_i, e' tté pakéyö a' a se. Kè ye' wà ttè wéne blénewa yès a' yök_i. ²⁸ E' kuèk_i a' e' kkö'nú. Nies Wiköl Batse'r tö a' tkè'ka Skèköl ichapa erule e'pa wökirpaie ikkö'nukrak, e' kuèk_i ie'pa kkö'nú buaë a' tö. Ie'pa to'ttsa Skèköl tö iwák pé wa. ²⁹ Ye' wà ijcher tö mik ye' míá e' ukuök_i ta pé' dóraë s'yamipa eukwa wés chichi sulusi tö iyiwak ewèwa es. ³⁰ Nies a' shua welepa e' kóraka s'wöbla'uk kache tté wa as s'yamipa erblé Jesús mik e'pa mi' ie'pa è itök_i. ³¹ A' tso' erk_i. A' éna íanú tö duas mañal, ñiwe nañewe, kekraë ye' bak a' ulitane pattök eköl eköl iè wa ì wa.

³² Es ye' tö a' méat Skèköl ulà a. Nies a' méatyö Skèköl er buaë chöke se' a e' ttè a. Ie' wà diché ta' a' er diché k_i ioie. Nies ie' wà diché ta' ì kos buaë moie a' a wés ikablè' imuk ie' icha batse'r esepa a es. ³³ Kè ye' wà yi inuköl ena yi datsi' kkeyëule yès. ³⁴ Erè a' wà ijcher buaë tö ye' kè bak senuk yi ulà mik. E' skéie ye' kanèblè' ye' wák ulà i' wa e' kkö'noie. Nies e' wa ye' tö ye' wapiepa kimé. ³⁵ Es ye' bak a' wöbla'uk kekraë tö s'kawötá kanèblök darèrèé wépa kè a kanèblèr, esepa kimoie. Kè se' éna ichökwa tö Skèképa Jesús wák tö iyè': “Se' tö ikakmè e' dör ibua'ie se' a, kè dör ikaktsè.”

³⁶ Mik Pablo tté one, etá ie' e' tkéwá kuchè k_i ta itté Skèköl ta' ie'pa ulitane ta. ³⁷ Ie'pa ulitane tso' e' chökät Pablo a iuke taiè ta' ie'pa tö ipaklö'wémi iwöalattsémi. ³⁸ Pablo tö ichétke ie'pa a: “A' kè tö ye' suepaiane.” E' tö ie'pa eríawé taiè. E' ukuök_i ta' ie'pa míá iñalè muk dò wé kanò irirke eè.

21

Pablo míá Jerusalén

¹ Mik sa' tō sa' yamipa méat, etā sa' e' iéka kanò a. Sa' míyal yēsýēsé ká kiè Cos ee. E' bule es tā sa' míyal ká kiè Rodas ee tā sa' míyal ká kiè Pátara ee. ² Etā sa' tō kanò kué Pátara mi'ke ká kiè Fenicia, e' a sa' e' iéka tā sa' míyal. ³ Sa' tkami tā sa' tō ká kiè Chipre e' sué, e' atē ulà bakli'kka. Etā sa' mir dò Siria. Dalì mir kanò a e' mekeat Tiro, e' kueki sa' demi ee. ⁴ Etā Jesús mik erblökwakpa serke ee, e' pa yulé sa' tō tā ikué sa' tō. Sa' sené ká kul ie'pa ska'. Ie'pa tō iché Pablo a Skököl Wiköl wa: “Be' mú kè mi' Jerusalén.” ⁵ Erè ká kul tka sa' ki etā sa' e' yéttsane. Ie'pa kos, ilakölpa ena ila'r, e' yéttsa ie'pa ká a míyal sa' ñalemuk dòmi dayè kkömik. Ee sa' e' tuléwa kuchè ki ttök Skököl tā. ⁶ E' ukuöki tā sa' e' chéat ie'pa a tā sa' e' iéka kanò a. Etā ie'pa míyalne iu a.

⁷ Sa' e' yéttsa Tiro demi ká kiè Tolemaida ee. Sa' tō s'yamipa serke ee e'pa shke'wé. Sa' e' tséat ie'pa ska' ká et. ⁸ E' bule es tā sa' e' yéttsane demi klò wa Cesarea. Ee sa' mí Felipe dör Jesús tté buaé pakökwak e' u a. Ie' dör wēpa kul shukitulebak Jesús ttekölpa tsá e'pa kimuk, e' eköl. Ie' ska' sa' e' tséat. ⁹ Ie' ala'r busipa döka tkél kam iserdak wēpa tā. Ie'pa kos dör Skököl ttekölpa. ¹⁰ Sa' sené ie' ska' elkeé etā wēm debitū eköl datse Judea, e' kiè Agabo. Ie' dör Skököl tteköl. ¹¹ Ie' dewa sa' o'mik tā Pablo kipamo klò'wéwaitö. Tā e' wa ie' e' muéwa iklö a ena iulà a tā ichéitö:

—Wiköl Batse'r tō ichè: “I' es judiowak tō kipamo i' wák, e' muerawa Jerusalén. Tā imerattsa ie'pa tō pè' kè dör judiowak, esepa ulà a.”

¹² Mik sa' tō ttè e' ttsé, etā sa' ena Cesarea wakpa tso'ñak sa' tā, e'pa ulitane kköché taië Pablo a: “Kè be' minuk Jerusalén.” ¹³ Erè Pablo tō iüté:

—¿Ì kueki a' iúke? E' tso' ye' eriauk taië. Ye' e' méttstake monukwa, ñies ttèwa Skökëpa Jesús tté kueki

Jerusalén.

¹⁴ Ie' kè wà sa' ttò iütène, e' kuëki kè sa' wà ì kí yène ia. Sa' iché:

—As Skëképa tó iù wës ie' kî ikiane es.

¹⁵ E' ukuöki tã sa' dalì ié míyal Jerusalén. ¹⁶ Jesús ttökatapa tso' Cesarea, e'pa welepa míyal sa' tã. Ie'pa wã sa' mítser wëm kiè Mnasón, e' u a kapökrö. Wëm e' datse kã kiè Chipre ee. Ie' dör wépa tsá erblè' Jesús mik esepa eköl.

Pablo míã Santiago pakök

¹⁷ Mik sa' deka Jerusalén, eta s'yamipa tso' ee, e'pa tó sa' kiéwã buaë, ittse'nerak buaë. ¹⁸ E' bule es tã Pablo míã sa' tã Santiago pakök. Nies Skëképa Jesús icha e'pa wökir kibipa tso'ñak Santiago ska' seraã. ¹⁹ Ie' tó ie'pa shke'wé tã ì kos wéitö Skëköl batamik, pé' kè dör judiowak, esepa shua, e' pakéitö ie'pa a yësyësë. ²⁰ Mik e' tse' ie'pa tó, eta Skëköl kikékarakitö taië. Ie'pa tó iché ia:

—A yami Pablo, be' isuë buaë tó ie' judiowak döka miles e'pa erblétke Jesús mik. Ie'pa ulitane e' mettsã da'a Moisés ttè dalöiëno e' tsatkök. ²¹ Ie'pa a iyëno tó be' tó judiowak tso' kã kuã'kî kuã'kî kî, esepa wöbla'weke tó ttè e' olo'yó. Nies ichekerakitö tó be' tó icheke tó ila'r kurke wépa, esepa tottola kkuölit kè tar. Nies ichekerakitö tó be' tó s'wöbla'weke tó se' judiowak ser e' kè dalöiaria. ²² Ie'pa ulitane wã ijcherdawa tó be' dé'bitu. E' kuëki ðì wëmi be' tó ie'pa siwã'blöwowa? ²³ Ì cheke sa' tó be' a e' ú. Íe sa' shua wépa tso' tkël kawö me'bak Skëköl a, e' orketke. ²⁴ E'pa tsúmi e' tã, tã be' e' batse'ú ie'pa tã. Kos e' patuë e' pataúbö as ie'pa tsã tòttsã manene iwà kkachoie tó kawö me' ie'pa tó Skëköl a e' one. Be' tó iwé es, e' tã judiowak ulitane isueraë tó ì kos kî pé' tso' be' chök suluë e' dör kache. Ie'pa tó isuëmi tó Moisés ttè dalöiëno e' dalöieta'

be' tō ñies. ²⁵ Erë s'yamipa kè dör judiowak, esepa a ì bikeitsé sa' tō e' kitmibak sa' tō yëkkuö ki. E' ki sa' tō ie'pa a iyë' tō ie'pa kè kàne chkè meule íyi diököl tso' dalöie ese a ese katök. Iyiwak pé kè katar. Iyiwak ttéwā kuli' siuleka ese chkà kè katar. Ñies ie'pa kè kàne trënuak.

Pablo klö'wëwarakitö Skëköl wé pamik

²⁶ Es Pablo e' yëttsa wëpa tkël, e'pa ta. E' bule es ta ie' e' batse'wé ie'pa ta. E' ukuöki ta ie'pa tkawā Skëköl wé a. Eë Pablo tō ibiyó ché tō mik ta ie'pa batse'ne e' diwö ene ta ie'pa íyi meke Skëköl a iwakpa bil ekkë.

²⁷ Kawö kul shuā ie'pa tso' batse'ne e' erkewatke etā judiowak wëlepa datse Asia, e'pa tō Pablo sué Skëköl wé a. Ie'pa tō imalepa shutiwéka ta imishkarak Pablo ki iklö'wëwarakitö. ²⁸ Ie'pa anekarak: “A yamipa, sa' kimú. Wëm i' shköke ká wa'ñe s'wöbla'uk tō se' judiowak ser, e' kè dör buaë. Ie' icherami tō Moisés ttè dalöiëno ena Skëköl wé i' kè dör buaë. I'ñe ta pé' kè dör judiowak esepa wëlepa debitu ie' wa' ie Skëköl wé a. E' tō ká i' dör batse'r e' ia'wéka.”

²⁹ Wëm kiè Trófimo e' su' ie'pa tō Jerusalén ie' dör Éfeso wak. Ie'pa tō ibikeitsé tō Pablo wā imí Skëköl wé a, e' kueki ie'pa tō iché es.

³⁰ Ká e' wakpa kos shutineka debitu tuneule. Ta Pablo klö'wëwarakitö kuémi u'rki. E' bet Skëköl wé wëkkö ulitane wötëwarakitö. ³¹ Ie'pa tō ittekewatke etā ttè de Roma ñippökwakpa eruleë e' comandante a tō Jerusalén wakpa ulitane shutineka taië. ³² Etā ie' tō ñippökwakpa dapa'wé ikayuapa ta, etā itunemirak wé pé' daparke eë. Mik pé' tō ñippökwakpa ena icomandante sué, etā ie'pa tō Pablo méat, kè ippèia. ³³ Etā comandante debitu, e' tō Pablo klö'wëwā ta imaukwā ké tabechka kichaie bötö wa. E' ukuöki ta ie'pa a ichakéitö: “¿I' dör yi? ¿ì wambléitö?”

³⁴ Erë welepa tö iché kuá'kí aneule, iëltëpa iché kuá'kí aneule. Taië ie'pa arkerak kuá'kí kuá'kí, e' wa kè ishulir, e' kueki ie' tö itsukmi ké ñippökwakpa wé a. ³⁵ Pë' éna ie' klö'wakwá kësik wa, e' kueki mik idemirak ñippökwakpa wé klékata kí, etá ñippökwakpa tö Pablo batsékami. ³⁶ Pë' qos arke Pablo itöki: “¡Ittówá!”

Pablo e' tsatké judiowak wörki

³⁷ Mik Pablo dökewatke ñippökwakpa wé a etá ie' tö comandante a iché:

—Kawö mú ña ttök be' ta.

Etá comandante tö iüté:

—Ye' kè wá ijcher tö be' ttò griegoie. ³⁸ E'ma be' kè dör Egipto wak dë'bitu eköl e' ka'ka ñippök sa' ta e'. Ie' mía ká wé kè yi ku' eë s'ttökwá wakpa ta döka mil tkëyök (4000).

³⁹ Etá ie' tö iché ia:

—Au, ye' dör judiowak kune Tarso, ká e' dör ká kibi ate Cilicia. Kawö mú ye' a ttoie ie'pa ta.

⁴⁰ Etá comandante tö kawö mé ia. Etá ie' dur shkë'ka ñippökwakpa wé klékata kí ta iulà kkaché pë' tso' taië, e'pa a tö a' siwá'blólur. Mik isiwá'bléwarak, etá ie' tté ie'pa ta hebreoie. Ta ichéitö iarak:

22

¹ “A yamipa, a kékëpa, ye' e' tsatköke, e' ttsó.”

² Mik ie'pa tö ittsé tö Pablo ttöke ie'pa ta iwákpa ttò wa, etá ie'pa kí siwá'blélur. Ie' tö iché:

³ “Ye' dör ñies judiowak wës a' es. Ye' kune' Tarso ate Cilicia eë. Erë ye' talane íe Jerusalén. Gamaliel tö ye' yö' yësyësë wës se' tté dalöiëno kiteat iaiaë e' tö ichè es. Këkraë ye' tso'ie Skëköl dalöiök ye' er qos wa qos a' ulitane tö idalöieke i'ñe ekkë. ⁴ Mik se' wépa tö Jesús dör Se' ñala e' tté klö'wé, etá esepa tötiuk ye' bak ttèwá, klö'wèwá,

wõtèwà s'wòto wé a. Kè ye' tkine tò wëm idir ö alaköl idir.
⁵ Ñies sacerdote kibi ena s'kueblupa ulitane, e'pa tò a' a
 ichèmi tò e' dör mokië. Ie'pa tò ye' a yèkkuö me' tsèmi
 s'yamipa tso' Damasco e'pa a. Yèkkuö e' tò kawö me' ye' a
 Jesús mik erblökwakpa esepa tsobitu dò Jerusalén we'ikè.

⁶ “Erë ye' miria ñala ki. Diwö de bata a ta ye' dökemitke
 Damasco tsinet, e' bet ta ì bitëshka ká jài a bö'wöie e' olo
 bune taië ye' pamik. ⁷ Ee ye' anere iski. Eta ittò ttséyö tò
 iché ña: ‘A Saulo, a Saulo ¿iók be' tò ye' we'ikeke?’ ⁸ Eta
 ichakéyö: ‘A Skékëpa, ¿be' dör yi?’ Eta ie' tò iüté: ‘Ye' dör
 Jesús Nazaret wak, e' we'ikeke be' tö.’ ⁹ Itso'rak ye' ta, e'pa
 tò bö'wö sué, erë ì yëne ye' a, e' wà kè ane ie'pa éna. ¹⁰ Eta
 ye' tò ie' a ichaké: ‘A Skékëpa Jesús, ¿ì wèmiyö?’ Ta ie' tò
 iché ye' a: ‘Be' e' kóka. Be' yú Damasco. Ee ì kos wèmi be'
 tö, e' yërdaë be' a.’ ¹¹ Bö'wö olo tò ye' wöbla batuwéwa, e'
 kueki ye' wapiepa tò ye' ulà iémirak dò Damasco.

¹² “Ee wëm tso' eköl kiè Ananías, e' tò Skéköl dalöieke
 taië. Moisés ttè dalöiëno kitule e' dalöiekeitö yësyësë.
 Judiowak kos serke Damasco e'pa tò icheke tò ie' dör wëm
 buaë. ¹³ Ie' debitu ye' ska' ta ye' a iché: ‘A yami Saulo, be'
 wöbla buanú.’ E' wöshäë ta ye' wöbla buanene iwawënene
 Ananías suéyö iwa. ¹⁴ E' ukuöki ta ie' tò ye' a iché: ‘Skéköl
 dalöiök se' yépa bak ká iaiaë, e' tò be' shukitabak as ì
 kiane wè ie' ki e' jcher be' wa. Ñies be' shukititö as yi dör
 Yësyësë e' saübö ena ie' wák ttò ttsöbö. ¹⁵ Be' döraë ie'
 ttkölie. ì kos su' be' tö, ì kos ttsé' be' tö, e' cheraëbö
 sulitane a. ¹⁶ I' ta kè bö ipanukia. Be' e' kóka. Be'
 e' wöskuó. Skéköl a ikió as ì sulu kos wamblébö e' nu'
 olo'yòitö be' ki.’

¹⁷ “Mik ye' dene Jerusalén eta, ye' mia ttök Skéköl ta iwé
 a, ee ye' tò ì sué kabsueie. ¹⁸ Skékëpa Jesús suéyö ta ichéitö

ña: 'Be' tö ye' tté pakèmi judiowak a, e' kè klö'wepa ie'pa tö. E' kuëki be' e' yóttsa bet Jerusalén.' ¹⁹ Etä ye' iché ia: 'A Skëkëpa, ie'pa wákpa wä ijcher tö ye' bak ie'pa ñi dapa'wo wé kos a, be' mik erblökwakpa, esepa yulök ppè, wötèwä s'wöto wé a. ²⁰ Mik Esteban dör be' kanè méso bak be' tté pakök, e' kötwä ie'pa tö, etä ye' tso' ee. E' wëne buaë ye' wa. E' dalewa ye' tso' ie'pa datsi' kkö'nuk.' ²¹ Erë ie' tö ye' a iché: 'Be' shkómitke ñala ki. Ye' be' patkeke kamië pè kè dör judiowak esepa a.' ”

Pablo aṭe comandante ulà a

²² Pablo ttöke e' ttsök ie'pa tso' buaë, erë mik pè' kè dör judiowak e' aritséitö, etä ie'pa ñi kékä anuk darërë: “¡Wëm ese kè kawöta senukia! ¡Ittöwasö!” ²³ Ie'pa arkekarak taië, ta idatsi' wöti'wekerakitö kashuk a, ñies ká po uyekerakitö kashuk a kësik wa. ²⁴ E' kuëki comandante tö Pablo tsukmi ké weshkë ñippökwakpa wé a ta ippök ké as itö ichökä i kuëki pè' wönarke ie' ki taië. ²⁵ Erë mik ie'pa tö Pablo muéwatke ppè tsa'bata daloie wa, etä ie' tö capitán dur ee, e' a ichaké:

—¿A' a kawö mène wépa dör romawak esepa ppök kam ishulir e' yöki?

²⁶ Mik e' ttsé capitán dur ee e' tö, etä imía icomandante a ibiyó chök ta iché ia:

—¿Wes be' iwèmi? Wëm e' dör romawak.

²⁷ Etä comandante debitu Pablo ska' ta ie' tö ie' a ichaké:

—¿Moki be' dör romawak?

Pablo iiuté:

—Tó, es idir.

²⁸ Etä comandante tö iché:

—Ñies ye' dör romawak, e' patö'yö inuköl taië wa.

Ta Pablo iiuté:

—Erë ye' dör romawak ye' kune' es e' kuëki.

²⁹ Mik ittserakitö, etä ippökwakpa tö Pablo méat bèrë. Mik comandante wä ijchenewä tö Pablo dör romawak, etä ie' suane tö iók ie' tö imaukwä patké'.

Pablo e' tsatké judiowak wökirpa wörki

³⁰ Comandante k_i ikiane jchenowä mokië tö ì k_i Pablo kcateke judiowak tö. E' kuëki bule es tä ie' tö sacerdotepa wökirpa ena judiowak wökir malepa ké e' dapa'ukka. E' ukuöki tä ie' tö Pablo wötsöök patké tä iyéttsaitö tsémi duéser ie'pa wörki.

23

¹ Etä Pablo tö ie'pa suéwä krereë iwö k_i tä iché iarak:

—A yamipa, ikké ye' senére, etä ye' er kë wä ye' kkatëne ì k_i Skëköl wöä.

² Etä sacerdote kibi kië Ananías, e' tö, itso'rak Pablo o'mik, e'pa ké Pablo ppök ikkö k_i. ³ Erë Pablo tö iüté:

—jBe' dör e' ökwak, e' pperaë Skëköl tö! Së be' tkër ye' shulök Moisés ttë dalöiëno e' wa. Erë j iók ye' ppök këbö? E' wa ttë ñe' dalösewéwä be' tö.

⁴ Itso'rak ee, e'pa tö iché Pablo a:

—jBe' tso' Skëköl sacerdote kibi e' chök suluë!

⁵ Pablo tö iché:

—A yamipa, ye' kë wä ijcher tö ie' dör sacerdote kibi. Skëköl yëkkuö tö iché: 'Yi tso' s'wökirie, ese kë char suluë.'

⁶ Mik Pablo wä ijchenewä tö iwökirpa shabötspa dör saduceowakpa, shabötspa dör fariseowakpa, etä ie' tö ie'pa a iché aneule:

—A yamipa, ye' dör fariseowak. Ñies ye' yépa kos dör fariseowakpa. S'duowä shkerkane, e' wä panekeyö kröröë, e' k_i a' tso' ye' kkatök.

⁷ Mik Pablo tö ttè e' ché, etá fariseowakpa ena saduceowakpa e'pa wöñanemi ñi ki. Etá ie'pa ñi blabatsélor. ⁸ Saduceowakpa tö icheke tö s'duowá kè shkertá'kane. Ñies ichekerakitö tö Skéköl biyöchökwakpa kè tá', wimblupa sulusi kè tá'. Erë fariseowakpa tö íyi ekkè kos klö'wé tö itso'. E' kuëki ie'pa ñi blabatsélor. ⁹ Ie'pa ulitane arkerak taië. Fariseowakpa dör s'wöbla'uk ttè dalöiëno wa wakpa welepa e' kéka tá ichérakitö:

—Wëm i' kè wá ì sulu wamblëne. Isalema wimblu ö Skéköl biyöchökwak wele utule ie' tá.

¹⁰ Erë ie'pa kí shutirkeka taië kësik wa, e' kuëki comandante suane dö' Pablo ttèwarakitö. E' kuëki ñippökwakpa tsuk patkéitö Pablo yottsá ee tsëmi ñippökwakpa wé á.

¹¹ E' nañewe tá Skékëpa Jesús debitu e' tö Pablo á iché: “Be' er kuí. Wës be' tö ye' tté paké íe Jerusalén es ñies be' kawötá ipakök Roma.”

Judiowak kawö mé ñi á Pablo ttökwá

¹² E' bule es tá judiowak welepa tö kawö mé ñi á Pablo ttökwá. Ie'pa tö ittè mé Skéköl á ttè i' wa: “Kè sa' chköpa, kè sa' di' yöpa dò mik Pablo ttèwá sa' tö etá.” ¹³ Wëpa tö ittè mé es, e'pa döka dabom tkëyök (40). ¹⁴ Etá ie'pa míyal sacerdotepa wökirpa ena judiowak kuëblupa, e'pa ska' tá iché iarak:

—Sa' tö ttè me' Skéköl á tö kè sa' chköpa, Pablo kam ttöwá sa' tö e' yöki. E' kè wá one sa' wá, e' tá as Skéköl tö sa' we'ikò. ¹⁵ E' kuëki a' ena s'wökirpa malepa, a' ichó comandante á tö Pablo tsúbitu bule. A' e' ó tö a' ki ie' kiane chakè bua'iewá ishuloie. E' dalewa sa' tso'tke ikínuk ñala ki ttèwá kam idò a' ska' e' yöki.

¹⁶ Erë Pablo nauyö wä ijchenewä tä imía ñippökwakpa wé a tä ibiyó méitö Pablo a. ¹⁷ Etä Pablo tö capitán kié eköl tä iché ia:

—Duladula i' tsúmi comandante ska'. Ie' wä ilè tso' yënoie ie' a.

¹⁸ Etä capitán e' tö itsémi comandante ska' tä iché ia:

—Pablo tso' wötëule, e' tö ye' kié tä ikköché ye' a tö duladula i' tsúmi be' ska'. Ie' wä ilè tso' yënoie be' a.

¹⁹ Etä comandante tö iklö'wéwä iulà a tä itsémi bánet. Eë ie' a ichakéitö:

—¿Ì cheke be' tö ye' a?

²⁰ Ie' tö iché ia:

—Juduiwak kawö métke ñi a be' a ichök tö bulepa Pablo tsúmi wé juduiwak wökirpa e' dapa'uke eë. Ie'pa e' öke tö Pablo ttè kiane shulè bua'ie ie'pa ki. ²¹ Erë ie'pa ttè kè klö'war. Juduiwak wëpa dökä dabom tkëyök (40) kīta, e'pa tso' blëule Pablo panuk. Ie'pa kablë' Skëköl a ttè i' wa: “Kè sa' chköpa, kè sa' di' yöpa dò mik sa' tö Pablo ttëwä etä.” Ie'pa tso'tke, ima be' icheke, e' è panuk.

²² Etä comandante tö ipatkémine tä iché ia: “Kè yi a ichar tö e' ché be' tö ye' a.”

Pablo patkëmi Judea wökir kié Félix e' ska'

²³ Etä comandante tö ikimukwakpa kié böl tä ichéitö ie'pa a: “Ñippökwakpa mi'ke klò wa esepa klò'ú dökä cien böyök (200). Ñies ñippökwakpa mi'ke kabaio ki esepa shtó dökä dabom kuryök (70). Ñies ñippökwakpa wä kët mi'ke esepa klò'ú dökä cien böyök (200). Katuine de sulitu (9:00 pm) etä e'pa kos dapa'ú as imi'rak Cesarea.” ²⁴ Ñies ichéitö: “Kabaio yuló Pablo tsomi. Itsúmi kk'ónú buaë dòmi s'wökir Félix ska'.” ²⁵ Ie'pa tä comandante tö yëkkuö patkëmi mè Félix a. Ikitule yëkkuö ki e' tö iché i' es:

²⁶ “A Félix, s'wökir kibi. Ye' dör Claudio Lisias. Yëkkuö i' shtéyö be' a. Be' shke'wéyö. ²⁷ Judiowak wökirpa tö wëm i' klöo'wä iminerak ittökwa. Erë mik ye' wä ijchenewä tö ie' dör romawak, etä ye' mía ye' ñippökwakpa tä tä itsatkée sa' tö. ²⁸ Ye' kī ikiane jchenukwä tö ì kī ie'pa tö ikkateke. E' kuekī itsémiyö judiowak wökirpa wörkī. ²⁹ Ie'pa tö ikkaté ie'pa ttë dalöiëno kitule, ese kī. Erë kè ye' wä ì sulu kune ie' kī ittowaie ö iwötoie s'wöto wé a. ³⁰ Erë ye' wä ijchenewä tö judiowak welepa kawö mé ñi a ittowaie, e' kuekī ye' tö ipatkébitu be' a. Ñies ye' tö ichétke ikkatökwakpa a tö ì kī ie'pa éna ikkatak, e' chó be' wöshaë.”

³¹ Etä ñippökwakpa wä Pablo mítser nañewe wes ie'pa a ikéwö mène es. Ie'pa demi ká kiè Antípatris eë. ³² Bule es tä ñippökwakpa dami klö wa, e' eltëpa biteane ñippökwakpa wé a. Etä ieltëpa dami kabaio kī, e'pa wä Pablo mítser. ³³ Mik ie'pa demirak Cesarea eë, etä ie'pa tö yëkkuö mé iwökir kibi a. Ñies Pablo méitörak ia. ³⁴ Iwökir kibi tö yëkkuö sué one etä ie' tö Pablo a ichaké: “¿Wé be' datse?” Mik ie' wä ijchenewä tö idatse Cilicia, ³⁵ etä iché ia:

—Mik be' kkatökwakpa debitu etä be' ttë ttseraëyö.

Etä ie' tö Pablo wötökwa patké s'wöto wé tso' u bérie yö' blu' Herodes tö ká e' wökirpa a e' a. Eë iwötéwarakitö.

24

Pablo e' tsatké Félix wörki

¹ Ká de skel etä sacerdote kibi kiè Ananías, e' demi Cesarea judiowak kueblupa welepa tä Pablo kkatök. Ñies wëm eköl kiè Tértulo, e' de ie'pa wä ie'pa ttekölie Pablo kkatök Félix a. ² Mik Pablo debitu etä Tértulo tö ikkatémi. Ie' tö Félix a iché:

A kékëpa s'wökir kibi, be' ttè dikia ká taië sa' serke bèrè ñita. Be' erbikò buaë, e' wa be' tò sa' wakpa kímé taië. E' kuëki sa' tò wëstela chë be' a. ³ A Félix, kékëpa taië, be' tò sa' kimeke taië, e' kuëki kekraë ká ulitane kî sa' tò wëstela chë taië be' a. ⁴ Kè ye' éna be' kawö chöwak taië, erë be' we'ikèyö, sa' ttò ttsó bërber è er bua' wa. ⁵ Sa' wä ijchenewä tö wëm i' dör pë' suluë. Ie' shköke ká wa'ñe judiowak shutiuk ñi kî as iñi blabatsòlor. Ie' dör Jesús Nazaret wak e' klépa eruleë e' wökir eköl. ⁶⁻⁷ Ñies ie' éna Skëköl wé ia'wakka ñáie. E' kuëki sa' tò iklö'wéwa.* ⁸ Be' wák a ie' chakirmi, es be' wä ijchermi tö ì kî sa' tò ikkateke, e' dör mokië.

⁹ Judiowak tso' ee, e'pa ulitane tö Pablo kkateke ñittsëe.

¹⁰ Eta Félix tö ie' a kawö mé ttoie ta ie' tò iché:

—Ye' wä ijcher tö ká iaiaë be' dör ká i' wakpa ttè shulökwak. E' kuëki ye' ttsé'ne buaë e' tsatkök be' wörki. ¹¹ Be' wák wä ijchermi tö ye' dé'rökä Jerusalén Skëköl dalöiök, e' kî ká detke dabom eyök kî böt (12). ¹² Ie'pa kè wä ye' kune yi ta ñi chök. Ie'pa kè wä ye' sune pë' shutiukka Skëköl wé a, ñies judiowak ñi dapa'wo wé malepa a, ñies Jerusalén kos a. ¹³ Ì kos kî ie'pa tö ye' kkateke, e' kè yërpa ie'pa a yësyësë be' a. ¹⁴ Erë ye' tö be' a ichè tö Jesús dör ñalä chökke, e' tté wa ye' tso' sa' yépa bak ká iaiaë e'pa Këköl dalöiök. Ie'pa tö ichè tö ttè e' kè dör buaë. Erë ñies ì kos kitatbak yëkkuö kî Moisés ena Skëköl ttekölpa tö, e' klö'wé ye' tö. ¹⁵ Ñies ye' erblöke Skëköl mik wës ie'pa es tö se' yësyësë ena se' suluë duowa

* 24:6-7 Yëkkuö kitule ká iaiaë welepa tö ttè i' kî méka ttè i' wa: Sa' kî ikiane shulè wës sa' ttè dalöiëno tö ichè es. 7 Erë shkëkipa wökir kibi kië Lisias, e' debitu ta iyétsa sa' ulä a kësik wa. 8 Ie' tö sa' a iché tö Pablo kkatökwapka kawöta ikkatök be' wörki.

e' shkerdakane. ¹⁶ E' kuëki këkraë ye' e' chöke senuk buaë Skëköl wöa ena sulitane wöa as kë ye' er tö ye' kkatò ì ki.

¹⁷ “Ye' mîne sené duas taië kë dë'ia íe, e' ukuöki ta ye' dene íe ye' wakpa shua inuköl kakmuk s'siarëpa a. Nies ye' dene íyi muk Skëköl a idalöioie. ¹⁸ E' kanéuk ye' tso' Skëköl wé a e' dalewa ye' sué ie'pa tö. Ye' e' batse'wétke wes sa' ttè kitule tö ichè es. Ee pë' kë ku' taië. Kè yi shutineka. ¹⁹ Erë judiowak welepa datse Asia, e'pa tso' ee. E'pa éna ye' kkatok ilè ki, e' ta warma ie'pa kawöta shkëkrö íe ye' kkatök. ²⁰ Ie'pa kë shkëkrö, e' ta as íe itso'rak e'pa tö ichò tö ì sulu kué ie'pa tö ye' ki mik ye' dë' e' tsatök judiowak wökirpa wörki eta. ²¹ Erë mik ye' bak ie'pa wörki, eta ttè i' è yë' ye' tö aneule: ‘S'duowa e' shkerkane e' klö'wéyo, e' ki a' tso' ye' kkatök i'ñe.’ ”

²² Jesús dör ñala chökle e' ttè jchertke buaë Félix wa. E' kuëki mik ì ché Pablo tö, e' ttséitö ta ie' kë ki ttè i' kianeia ttsè. Ie' iché ie'pa a:

—Mik comandante kiè Lisias, e' de, e' wa ye' tö a' ttè shulè.

²³ Eta Félix tö capitán eköl ké Pablo wötökwane s'wöto wé a, erë ichéitö ia:

—Ikkö'nú er bua' wa wes kë s'wötëule es. Kawö mú ie' a as iyamipa bitu ikané uk.

²⁴ Bökki es ta Félix debitune ilaköl kiè Drusila e' ta. E' dör judiowak. Félix tö Pablo tsuk patké. Pablo tö s'kawöta erblök Jesucristo è mik e' wà paké Félix a. E' ttsök ie' tso'. ²⁵ Erë mik Pablo tö sene yësyësë ena e' kkö'nè sene sulu yöki ena s'shulir aishkuö ta e' wà paké, eta e' tö Félix tkiwéwa. Ie' tö iché Pablo a:

—Be' yúne. Mik ye' kawö kune e' wa ye' tö be' kiène.

²⁶ Nies Félix tö ipaneke tö Pablo mú tö inuköl watkè ia iomine bër, e' kuëki ie' tö Pablo kiekerö këkraë ttök

ie' tã. ²⁷ Es itka dõ duas bök. E' ukuõki tã Félix kè kanebloia s'wökirie. Ie' skéie wëm kiè Porcio Festo, e' de s'wökirie. Félix atak buaë judiowak tã, e' kueki Pablo méatitõ wõtëule s'wõto wé a.

25

Pablo e' tsatké Festo wörki

¹ Festo demi Cesarea kaneblok s'wökirie e' ki ká de mañat tã imía Jerusalén. ² Ee tã sacerdotepa wökirpa ena judiowak wëpa kibipa, e'pa tã Pablo kkaté Festo a. ³ Ie'pa tã ikié ie' a: “Sa' kimú er bua' wa. Kawõ mú Pablo tsobitu íe Jerusalén.” E' dör Pablo ttowã ñalã ki. ⁴ Erë Festo tã iüté:

—Pablo tso' Cesarea wõtëulewã s'wõto wé a. Ee ye' mi'ke kukuie. ⁵ Ì sulu wamblé ie' tã, e' tã as a' wökirpa mi' ye' tã Cesarea ie' kkatök ee.

⁶ Festo sené Jerusalén ká pãkõl (8) ká dabom (10) e' ulatök tã imíane Cesarea. E' bule es tã ie' e' tkéka ikula' ki ttè shulo wé a. Etã Pablo tsuk patkëitõ shulè. ⁷ Mik Pablo dewã, etã judiowak datse Festo tã Jerusalén, e'pa dewã ie' o'mik tã ikkaté íyi suluë tajè ese ki. Erë ie'pa kè a iwöklönuk yës tã e' dör moki. ⁸ E' ukuõki tã Pablo tté e' tsatkoie. Ie' tã iché ia:

—Ye' kè wã ì sulu wamblëne yës judiowak ttè dalöiëno ki, ñies Skëkõl wé ki, ñies Roma wökir kibi e' tã. Ekkëpa kè yëule ye' wã suluë.

⁹ Erë Festo atak buaë judiowak tã, e' kueki ie' tã Pablo a ichaké:

—¿Be' shkak Jerusalén as ye' tã be' shulõ ee?

¹⁰ Ie' tã iüté:

—Au. Ye' tso'tke Roma wökir kibi e' ttè shulo wé a. Íe a' kawõtã ye' shulök. Be' wã ijcher buaë tã ye' kè wã ì sulu wamblëule judiowak tã. ¹¹ Erë ilè sulu wambléyö, ese

kué a' tö, e' ki ye' kawöta ttèwa, e' ta ye' ttówa. Erë ì kos ki ie'pa tö ye' kcateke, e' kè yène, e' ta kè yi kawöta ye' muktsa ie'pa ulà a. E' kuëki ye' tö ikié tö Roma wökir kibi as e' wák tö ye' shulò*

¹² Età Festo tté ipattökwakpa ta età ichéitö Pablo a:

—Buaë be' ikiétke tö Roma wökir kibi tö be' shulò. E' kuëki ye' tö be' patkekemi Roma as ie' be' shulò.

Festo tö Pablo tté paké blu' Agripa a

¹³ Ká tka wekké alè e' ukuöki ta blu' kiè Agripa e' demi Cesarea ikutà kiè Berenice e' ta Festo tkëneká ká wökirie e' kéwö tkö'uk. ¹⁴ Ie'pa e' tséat ká tajë. E' dalewa Festo tö ì tköke Pablo ta e' paké blu' Agripa a: Ie' tö iché ia:

—Íe wëm tso' eköl méat Félix tö wötëule s'wöto wé a. ¹⁵ Mik ye' bak Jerusalén, età sacerdotepa wökirpa ena judiowak kuëblupa, e'pa debitu wëm e' kkatök ye' a. Ye' a ikiérakitö as ye' iwömüttsa ttèwa. ¹⁶ Ye' tö ie'pa iüté tö romawak wökirpa kè yi ttetá'wa, kam ie' tsatkö ikkatökwakpa ta ñi wöshaë e' yöki. ¹⁷ E' kuëki mik ie'pa debitu íe, età kè ye' kawö chöone. E' bule es ta ye' e' tkéka ye' kula' ki ttè shulo wé a ta wëm e' tsuk patkéyö. ¹⁸ Erë mik ikkatökwakpa debitu, età ie'pa kè wä ikkatëne íyi sulu ki wes ye' ibikeits es. ¹⁹ Ie'pa tö ikkaté wes ie'pa Skëköl dalöieke ese ki. Ñies wëm kötëwä kiè Jesús, e' ché Pablo tö tö itso' ttsë'ka, ese è ki ie'pa tö ikkaté. ²⁰ Ye' kè wä ijcher wes yö ttè e' wè, e' kuëki ye' tö Pablo a ichaké: “¿Be' shkak Jerusalén as eë be' shulir ttè i' ki?” ²¹ Erë ie' ikié tö as se' wökir kibi tö ishulò. E' kuëki ye' tö ikéwö mé tö as itkër wötëule dò mik ye' tö ipatkekemi età.

²² Età Agripa tö iché Festo a:

* ^{25:11} Pablo döromawak e' kuëki ie' a kawö ta' ikiök Roma wökir kibi a tö e' tö ishulò. Roma wökirpa tsitsir kè a iwöklönuk.

—Ye' éna wëm e' ttò ttsak ñies.

Ta Festo tö iüté:

—Bule bö ittseräë.

²³ Bule es ta Agripa ena Berenice, e'pa debitu, tkawa u a shkörami wes këkë tajë es. Ñippökwakpa wökirpa ena ká e' këkëpa dalöiërta' tajë, esepa debitu ie'pa ta ñies. Eta Festo tö Pablo tsuk patké ²⁴ ta ichéitö:

—A blu' Agripa ena këkëpa ulitane tso' íe se' ta, íe wëm dur eköl kiè Pablo. Judiowak kos tö ie' kcateke ye' a Jerusalén ñies íe Cesarea. Ie'pa kè shtrirta'wa ye' a ikiök aneule tö ikéwö múttsa ttèwa. ²⁵ Erë ye' a ta ie' kè wa ì wamblène ì kî yö ittökwa ipatkèmi. Erë ie' wák tö ikié as Roma wökir kibi tö ishulò. E' kueki ye' tö ibikeitsbak patkèmi ee. ²⁶ Erë kè ì kune ye' wa shtëmi yëkkuö kî mèmi s'wökir kibi a ikkatoie. A Agripa, e' kueki ye' wa idebitu a' wörki, bua'ie be' wörki, as be' ichakò. Ima be' ichè, e' ukuöki ta iyëkkuö shtëmiyö. ²⁷ ¿Wes ye' tö yi patkemimi shulè kè wayëule tö ì kî ikkatërke?

26

Pablo e' tsatké blu' Agripa wörki

¹ E' ukuöki ta Agripa tö Pablo a iché:

—Be' ttó e' tsatkoie.

Eta Pablo ulá kéka ta ittémítke i' es: ²⁻³ “A blu' tajë Agripa. Se' judiowak ser, e' jcher buaë be' wa. Ñies ttè i' kî sa' ñi chöke, e' jcher buaë be' wa. E' kueki i'ñe ta ye' ttsë'ne buaë e' tsatkök be' wörki ì kos kî judiowak tö ye' kcateke, e' yöki. Es ikiéyö be' a tö ye' ttò ttsó enaë.

⁴ “Se' wakpa kos wa ijcher buaë tö wes ye' ser ye' kaska' ena Jerusalén mik ye' bak duladula eta. ⁵ Ñies ie'pa wa ijcher buaë tö këkraë ye' dör fariseowak. Ese wakpa e' tiuke Skéköl ttè dikia yësyësë se' wakpa malepa

tsata. Ie'pa ki ikiane, e' ta ie'pa tö ichèmi tö moki ye' dör fariseowak. ⁶ Skëköl kablë' se' yépa bak ká iaiäe' e'pa a tö s'duowa e' shkerdakane, e' wà panekeyö moki, e' ki ie'pa tso' ye' kkatök i'ñe ta. ⁷ Se' dör Israel aleripa e' ditséwöpa döka dabom eyök ki bö (12), e'pa tö iwà paneke ñies er moki wa. E' kuëki ie'pa tö Skëköl dalöie e' wakanewekerakitö ñië nañeë kekraë. A blu' Agripa, s'duowa shkerdakane, e' panekeyö wes se' wakpa malepa es, e' ta ¿i ki ie'pa tso' ye' kkatök? ⁸ ¿i kuëki a' ibikeitseke tö s'duowa e' kè shkenukkane Skëköl a?

⁹ “Ye' wák bak ibikeitsök tö ye' kawöta ì kos or ye' a e' uk Jesús Nazaret wak e' tté wöklö'woie. ¹⁰ Es ye' tö iwamblë' Jerusalén. Sacerdotepa wökirpa tö ye' a kawö me' iwambloie. S'batse'rpa taië wötë'wa ye' tö s'wöto wé a. Kè dör e' è, ñies mik ie'pa ttekerakitö, eta ye' a ta e' dör buaë. ¹¹ Taië ie'pa we'ikyö se' ñi dapa'wo wé ulitane a ie'pa koie ie'pa erblö Jesús mik e' olo'yök. Ye' kësik blë' ie'pa ki taië. Ye' tö ie'pa töte'rö tkörö ká bár ki we'ikè.

¹² “Sacerdotepa wökirpa tö ye' a kawö me' ena ye' patkë' ese wamblök Damasco, e' wakanéuk ye' mirwa. ¹³ Erë, a blu', ñala ki dibata a ta ká jai a ye' tö ì sué bö'wöie e' tkòka diwö olo tsata. Bö'wö e' olo bune ye' pamik ena imirwarak ye' ta e'pa pamik ñies. ¹⁴ Sa' kos anere iski ta ittò ttséyö e' tö iché ña hebreoie: ‘A Saulo, a Saulo, ¿jók be' ye' we'ikeke? Ì sulu wamblekebö ye' ki e' wa be' wák e' mukettsa we'ikè wes iyiwak kè shkak ppèsö kal wa es.’ ¹⁵ Ye' tö ie' a ichaké: ‘A Skëköpa, ¿be' dör yi?’ Ie' ye' iüté: ‘Ye' dör Jesús, e' we'ikekebö. ¹⁶ Erë be' e' duóka. Ye' e' kkaché be' a be' patkoie kanablök ye' a. Ì kos suébö i'ñe ena ì kos kkacheraëyö be' a, e' pakerabö sulitane a. ¹⁷ Ye' tö be' patkeraë be' yamipa a ena pë' kè dör judiowak esepa

a. Ye' tō be' tsatkeraë ie'pa ulà a. ¹⁸ Ye' tō be' patkeraë ie'pa wōā ká ñi'uk as ishkōrak Skëköl ta ká ñi a, kè ku'ia klöulewā stui a Satanás ulà a; ñies as inuì olo'yardak iki as idōrak Skëköl icha batse'r e'pa kíie ierblérak ye' mik e' wa.'

¹⁹ “A blu' Agripa, ì yēne ña ká jaì a e' wawéyō. ²⁰ Jesús tté buaë tsá pakéyō Damasco wakpa a, e' ukuökì ta yō ipaké Jerusalén wakpa a ñies ká malè tso' Judea e' kos wakpa a. Ñies ipakéyō pè' kè dör judiowak esepa a. Ye' tō ie'pa kos patté: “A' er mane'ú Skëköl a. A' senú buaë yēsýēsë ikkachoie tō mokì a' er mane'wétke ie' a.” ²¹ E' kuëkì se' yamipa judiowak e'pa tō ye' klöo'wā Skëköl wé a ttèwā. ²² Erë dō ikkè ta Skëköl tō ye' kímé, e' kuëkì ye' tso'ia ie' tté pakök sulitane a, s'dalöiërta' taië esepa a, ñies se' èsepa a. Ì yè'atbak Skëköl ttekölpa ena Moisés, e'pa tō tō itkōraë, e' è pakekeyō. Kè ye' wā ttè ku'a'kì pakane. ²³ Ie'pa tō iyè'at tō wé pairine'bitu idi' wa s'blúie e' kawōtä ttèwā. E' ukuökì ta ie' shkerdakane keweie sulitane yökì, ta s'tsatko tté pakeraëitō judiowak a ena ká ulitane wakpa a. Ttè e' dör wes bö'wō es se' er ñi'woie.”

Pablo tō Agripa shkeñé erblök Jesús mik

²⁴ Es Pablo e' tsatköke e' shuā Festo tō iché ie' a aneule: —¡A Pablo, be' alíneka! Be' e' yué yëkkuō wa taië, e' tō be' aliwéka.

²⁵ Erë ie' iüté:

—A kékëpa Festo. Ye' kè alíneka. Ì chéyō e' kè dör alípa ttè, e' dör ttè mokì. ²⁶ Se blu' Agripa tkër. Ie' wā ttè ikkè suule buaë. E' kuëkì kè ye' tkine ttök ie' wörki. Íyi ikkè kos kè wamblène blëulewā. E' kuëkì ye' wā ijcher tō ie' wā íyi ikkè jcher buaë. ²⁷ A blu' taië Agripa, ye' wā ijcher buaë tō be' tō ì yè'atbak Skëköl ttekölpa tō, e' klö'wé.

²⁸ Agripa tō iüté:

—Kè be' ibikeitsök tö be' ye' kèmi e' mane'uk Cristo kléie i' ta.

²⁹ Pablo tö iché:

—I' ta ö i' ukuöki ta, erë Skököl mú ki iklar tö be' ena a' kos tso' i'ñe ye' ttò ttsök, e'pa mú dör wes ye' es, erë kè moulewā tabechka kicha wa wes ye' es.

³⁰⁻³¹ Etā blu' ena s'wökir kibi ena Berenice ena kos itulur ee, e'pa ulitane e' kéka míyal bánet ttök ñita Pablo tté ki. Ie'pa tö iché ñi a:

—Wëm i' kè wā ì sulu wamblène ì ki ittèwasö, warma kè ie' kawöta wötèwā.

³² Etā Agripa tö iché Festo a:

—Wëm i' kè tö ichópa: 'ye' patkómi Roma wökir kibi a shulè', e'ma sö ièmimi.

27

Pablo patkémirakitö Roma

¹ Mik ie'pa tö ibikeitsétke tö sa' patkekemi Italia, etā Pablo ena pè' skà tso' wötèule, e'pa méraakitö wëm eköl kiè Julio e' ulā a. Wëm e' dör ñippökwaqpa eruleë kiè Emperador Icha, e' capitán. ² Etā sa' e' iéka kanò a. Kanò e' datse ká kiè Adramitio ee michoë Asia wé kanò irirke dayë kkömik ese a. Wëm kiè Aristarco, e' tso'ñak sa' ta ñies. Ie' datse Tesalónica ate Macedonia ee. ³ Bule es ta sa' demi Sidón. Julio tö Pablo sué er bua' wa. Ie' tö iémi s'yamipa serke ee, e'pa pakök as ì kiane ie' ki e' mù ie'pa tö ie' a. ⁴ Sa' e' yéttsa Sidón mir wówí, erë siwā bitsirke darërëë woiá. E' kueki sa' míyal dayë nane kiè Chipre e' kke wé siwā kè bitsirku' taië e' éka. ⁵ Sa' tkami Cilicia ena Panfilia demi Mira ate Licia ee.

⁶ Etā ee capitán tö kanò datse Alejandría, e' kué etö. E' mi'ke Italia. Ee sa' e' mane'wé kanò e' étö a ta sa' míyal.

⁷ Siwā kueki sa' mirwā kanò ki enaë, kanè taië wa. Ká böt

ö ká mañat alè etá sa' demi ká kiè Cnido wöshäë. Siwa' bitsirkeia sa' kke, e' kuëki sa' tkami Salmona wöshäë ta sa' tkami dayë nane kiè Creta e' wishet. ⁸ Sa' mí kanò k_i dayë kkò è wa kanè taië wa. Etá sa' demi ká kiè Buenos Puertos (kiè e' wà kiane chè wé kanò irirke buaë), e' atë tsinet ká kiè Lasea eë.

⁹ Sa' k_i kawö chó taië ta yuëdiö dewatke. E' késka' ta kè se' a shkanukia dayë k_i dö' ì sulu tkò s'ta. E' kuëki Pablo tö ipattérak:

¹⁰ —A kékëpa, yö isué tö se' mirwa i' etá ì sulu tkömi. Kanò i' ena dali i', e' weirwami, ñies dö' se' wákpa duòlur.

¹¹ Erë capitán kè wá Pablo ttò iütëne. Ie' tö kanò wák ena kanò ñakökwakpa wökir, e'pa ttò iüté. ¹² Wé ie'pa kanò irine e' kè dör buaë yuëdiö tkö'woie. E' kuëki kanò wakpa kibiiepa tö ibikeitseke tö se' mú dömi Fenice yuëdiö tkö'uk eë, e' dör bua'ie. Ká e' atë dayë nane kiè Creta eë. Eë dayë atë noroeste ena sudoeste.

Siwa' bitsirke taië dayë k_i

¹³ Etá siwa' datse sur kke, e' bitsinemitke bërëbërë. Ie'pa tö ibikeitsè tö se' tkömimi, e' kuëki ie'pa e' yéttsa míyal Creta dayë kkò è mik kanò k_i. ¹⁴ E' ukuök_i bet ta sèrkè bitsineka taië datse nordeste kke, e' tërke kanò mik. ¹⁵ E' tö kanò uyémi. Sa' kè a kanò wöklöneia siwa' kke. E' kuëki sa' tö iémi as siwa' wá imítser sa' ta. ¹⁶ Sa' tkami dayë nane tsitsir kiè Cauda, e' tsikka, wé kè siwa' bitsirku' darërë shütë eë. Sa' kaneblé darërëë, e' wa sa' tö kanóla tso' s'tsatkoie e' muéwa buaë as kè imi'a dayë a. ¹⁷ E' ukuök_i ta ie'pa tö kanò kibi ètö k_i payuéwa buaë tsa' wa. Ie'pa suane dö' kanò tkërka tsa'wö tso' taië kiè Sirte, e' k_i. E' kuëki ie'pa tö datsi' ukuö tso' kanò shköwoie, e' iéwa dayë a kanò wöklö'woie as imi' enaë. Ta ie'pa tö

iémi as siwá' wá imi'. ¹⁸ Bule es tã siwá' bitsirkeiã taië, e' kueki ie'pa tã dalì damirak iwã kanò a, e' tuléttsami dayë a. ¹⁹ Böiki es tã ie'pa tã ýi taië tso' kanò shkõwoie, e' kibiie tuléttsã dayë a iwákpa ulà wa. ²⁰ Ká tka taië etã diwõ kè wëneiã bëkwõ kè wëneiã. Sërkë taië tërkeiã sa' kî. E' kueki sa' tã ibikeitsé tã sa' duõlurdaë, kè sa' tsatkërpaia.

²¹ Sa' tka ká taië kè chkaule. E' kueki Pablo e' kékã ie'pa tso' kôs e' shuã tã ichéitõ:

—A kékëpa, a' tã ye' ttõ ttsõpa, e' ma kè se' e' yënettsa Creta ena ì sulu tka se' tã, e' kè bak se' tã. Nies kè se' ýi weinewa. ²² Erë ì ñe tã a' er kuú. Kè yi duõpawã. Erë kanò è weirwami. ²³ Eniã nañewe Skëköl dör ye' blú dalõieke ye' tã, e' tã ibiyõchõkwak patké ye' ska', ²⁴ e' tã ye' a' iché: 'A Pablo, kè be' suanukia. Be' kawõtã shkõkrõ Roma wõkir kibi e' ska'. Skëköl er buaë ché be' a. E' kueki pè' kôs tso' be' tã kanò a, e'pa tsatkeraëitõ.' ²⁵ A kékëpa, e' kueki a' er kuú. Ye' erblõke Skëköl mik. Ye' wã ijcher buaë tã ì kôs tkõraë wes Skëköl biyõchõkwak tã ye' a' iché es. ²⁶ Erë siwã' tã se' patkeraë dõ ká wele dayë kkõmik.

²⁷ Dayë kiè Adriático e' kî sa' dami siwã' wã wî'kè iõ'kè. E' kî ká de domingo bõtõ e' nañewe ká shãbõts etã kanò ñakõkwakpa éna ìane tã sa' dõketke ká sí kî. ²⁸ Ie'pa tã dayë shu ma'wé tã wekkè idir dõttsã iski tã ide metro dõkã dabom mañayõk kî terõl (36). E' ukuõkî tã wî'kie iskã ma'wënerakitõ tã ide metro dabom böyõk kî kul (27). ²⁹ Ie'pa suane dõ' ák tso' blubluë ese mik kanò tã, e' kueki tabechka tso' kanò wõklõ'woie e' émirakitõ tkël kanò ñakka dayë shuã. Tã ikiérakitõ Skëköl a' tã sa' kimú ká ñirke e' dalewa. ³⁰ Erë kanò ñakõkwakpa tã ibikeitsé: se' tkõyalmi as se' e' tsatkõ. E' kueki ie'pa tã kanõla éwami dayë a. Ie'pa e' é tã ie'pa mí tabechka tso' kanò wõklõ'woie, e' õkmi kanò wõkka dayë shuã. ³¹ Erë ì weke

ie'pa tö e' biyó ché Pablo tö ñippökwakpa a ena capitán a. Ie' tö iché:

—Ie'pa tkayal, e' ta a' kè tsatkërpa.

³² Etá ñippökwakpa tö kanóla e' ttsé télor ta iémirak dayë a.

³³ Ká ñirketke etá Pablo tö ie'pa ulitane a iché:

—Ilè ñú. A' tso' ipanuk tö ì tkòmi, e' kì domingo de bötö e' dalewa kè ì ñane a' wa yës. ³⁴ A' kényö ilè ñuk. A' e' tsatkak, e' ta a' kawötá ilè ñuk. Kè a' weirpa yës. ³⁵ Pablo tté one, etá pan klö'wéitö et, ta wéstela chéitö Skéköl a. Sulitane wörki iblatéitö ta ie' wák tö itsá ñé. ³⁶ Etá e' tö imalepa erkiöwé ta ichkérak ñies. ³⁷ Sa' döká cien böyök kì dabom kuryök kì teröl (276) seraa. ³⁸ Ie'pa chké one kos ie'pa kì kiane ekké ta dali éyök atë e' tuléttsarakitö dayë a as kanò at öböbla. Dali e' dör trigowö.

Kanò jchënanane

³⁹ Ká ñine ta kanò ñakökwakpa kè wa dayë kkò suule. Erë ie'pa tö isué tö tsa'wö buaë ulat tär kanò ikloká. E' kuekì ie'pa tö ibikeitsétke tö kanò ma'üsö klèkà ee. ⁴⁰ Etá íyi tso' kanò wöklö'woie, e' ttsé télor ie'pa tö émi dayë a. Etá kaltak tso' kanò ñakoie, e' wöttsélor ie'pa tö. E' ukuökì ta datsi'kuö skékarakitö kanò wökka ta idökemitke dayë kkömik. ⁴¹ Erë tsa'wö tkërka dayë dikia, e' kì kanò tkëne kuj. Ta kanò wökka bunewa tsa'wö a, kè yënettsaia. E' dalewa dayë tärke kanò ñakka e' tö kanò tskélor taië.

⁴² Wépa mir klöulewa e'pa kiane ñippökwakpa kì ttélur as kè itköyal ùkule. ⁴³ Erë capitán éna Pablo tsatkak, e' kuekì ie' kè wa ikéwö mène ittökulur. Ie' tö iché: “Wépa ukuo, e'pa e' ppólur kewe dayë a as e'pa döttsa ká sí kì. ⁴⁴ As imalepa mi' kanò tak kì.” Es sa' ulitane dettsa ká sí kì buaë.

28

Pablo sené si' mañat ká kiè Malta ee

¹ Mik sa' dettsa età sa' wà ijchenewa tò ká e' kiè Malta.
² Ká e' wakpa tò sa' kiéwa buaë seraá. Kase suluë ena kalì yërke, e' kuëki bö' batsékarakitö tajë tã sa' kiérakitö bö' baiklök. ³ Etã Pabło tò bö' ulatska shtë, e' tuleke bö' a. E' wöshaë tã tkabè sulusi e' yéttsã bö'ba yöki, e' tò Pabło kuéwa iulà kkue a, kè èwa. ⁴ Mik ká e' wakpa tò isuë tò tkabè moar Pabło ulà mik, etã ichérakitö ñi a: “Wëm i' wã s'kötulewã alè. Eré dayë a itsatkëne, erë s'shulökwak tso' ká jaì a e' kè wã kawö mène ia as iser.”

⁵ Erë Pabło ulà wöppé tã tkabè anewa bö' a. Kè wës Pabło dë'. ⁶ Wekkë Pabło iërkeka ö wekkë Pabło duömiwã etkëme, e' panuk ie'pa tso' seraá. Erë ie'pa tò ipané taië. Mik ie'pa tò isuë tò kè ì bak ie' tã, etã ie'pa ibikeitséne kuã'ki. Ie'pa tò ichémi tò Pabło dör kéköl wele.

⁷ Eë tsjnet ká tso', e' dör Malta wökir kibi kiè Publio, e' icha. Ie' tò sa' kiéwa ena sa' suë buaë dò ká mañat. ⁸ Tã Publio yé, e' duöke duè dalölö wã ena ishütërke tajë. E' ie' teme'r. Etã Pabło míã iweblök tã ie' tò ikié S'yé a tã iulà méka iki tã ibua'wéneitö. ⁹ E' ukuöki tã imalepa kirirke tso' ká e' a, e'pa kos debitü tã ibuanerak ñies. ¹⁰ E' kuëki ká e' wakpa tò íyi kakmé sa' a tajë. Mik sa' mitkene kanò ki tã ì kos kiane sa' ki shkoie, e' kakmé ie'pa tò sa' a.

Pablo demi Roma

¹¹ Sa' sené ká e' a si' mañat tã sa' e' iéne kanò iëtö a. Eë kanò e' tò yuëdiö tkö'. E' datse Alejandría. Kanò e' kiè ie'pa kékölpa dalöiekerakitö dör klò e'pa kiè wa. ¹² Sa' míyal kanò e' ki ká kiè Siracusa ee. Eë sa' sené ká mañat. ¹³ E' ukuöki tã sa' míyal ká kiè Regio ee. E' bule es tã sa' e' yélur Regio a. Siwã' bitsirke buaë datse sur kke, e' wa

ká böt tã sa' demi Pozzuoli wé kanò irirke ee. ¹⁴ Ee sa' tō s'yamipa wēlepa kué. Ie'pa tō sa' ké e' tsukat ie'pa tã domingo etō. Bata ekkē tã sa' demi Roma. ¹⁵ S'yamipa tso' Roma, e'pa wã ijchertke tō sa' datse. E' kueki ie'pa de sa' ñaletsuk dò wé dalì wé tso' tajē kiekerakitō Apio ee. Ñies ie'pa skà de sa' ñaletsuk ká kiè S'kaporō Wé Mañat ee. Mik Pablo tō ie'pa sué tã wéstela chéitō Skéköl a tã ittse'neka buaë. ¹⁶ Mik sa' demi Roma, etã Roma wōkirpa tō ie' ké senuk u etkue a ekōrla, erë ishkēki méarakitō ekōl Pablo kkō'nuk.

Pablo tō Jesús tté paké Roma

¹⁷ Pablo demi Roma, e' ki ká de mañat, etã ie' tō judiowak wōkirpa tso' Roma, e'pa kiök patkè. Mik ie'pa e' dapa'wéka ie' ska' tã ie' tō iché iarak:

—A yamipa judiowak, kè ye' wã ì sulu wamblène se' wakpa ki. Ñies kè ye' wã ì sulu wamblène se' yépa bak ká iaiaë e'pa sene e' ki. Erë ye' tso' Jerusalén e' me'ttsarakitō Roma wakpa ulà a. ¹⁸ Roma wakpa tō ye' ichaké iskië, erë kè ie'pa wã ì sulu kune ye' ki ye' ttowaie. E' kueki ie'pa éna ye' akmi. ¹⁹ Erë judiowak kè ki ikiane tō ye' èmi ie'pa tō. E' kueki ye' kawōtã ikiök tō ye' patkó Roma wōkir kibi a as ie' tō ye' shulò. Erë ye' kè wã ì tã' se' judiowak kkatoie. ²⁰ Ì paneke se' dör Israel aleripa e'pa tō, e' kueki ye' tkër íe moule. Ñies e' kueki ye' tō a' kiök patké a' suoie ena ttoie a' tã.

²¹ Ie'pa tō iché ia:

—Judea wakpa kè wã yëkkuō patkëule sa' a be' choie yës. Ñies sa' yamipa datse Judea, e'pa kè wã ì sulu yëule sa' a be' ki. ²² Sa' wã ijcher tō ttè pa'ali i' pakè be' tō e' cheke suluë sulitane tō ká wa'ñe. E' kueki sa' ki ikiane ttsè tō jima be' tō ibikeitseke?

²³ Ie'pa tö kawö skà mé ñì a kapakoie. Mik e' kēwö de, etä ie'pa dapanekä taië Pablo ska'. Ie' tö ì blúie Skëköl tso' e' tté paké bla'mi dö tsáli. Ì kit Moisés ena Skëköl ttekölpa tö yëkkuö kī e' wa ie' tö ie'pa pablé taië as ie'pa tö iklö'ù tö Jesús dör wé pairine'bitu idi' wa s'blúie e'. ²⁴ Ie'pa welepa tö tté paké Pablo tö, e' klö'wé. Erë welepa kè wä iklöone. ²⁵ Ie'pa kè wä ibikeitse ñikkëë, e' kuëkī imítkerak erë Pablo tö tté i' bata ché iarak:

—Ì yé' Wiköl Batse'r tö a' yépa bak iaiaë, e'pa a, itteköl bak kië Isaías e' wa, e' dör moki. Skëköl tö iché ia:

²⁶ 'Be' yú tã ichó ká i' wakpa a.

A' tö ittseraë je', erë kè a' éna iwà anak.

A' tö iwebleraë je', erë kè a' tö isuepa.

²⁷ Es ie'pa dör, ie'pa wökir suluë, e' kuëkī.

Ie'pa tö ikukuò wötéwä as kè iwattsër.

Ie'pa tö iwöbla tsimiwéwä as kè iwawër.

Ie'pa kè éna iwà anak.

Ie'pa kè shkakne ye' ska' as ye' tö ibua'ùne.*

Es Isaías tö iyé'at. ²⁸⁻²⁹ A' wä ijchenú tö i' ukuökī tã Skëköl tö s'tsàtkè e' tté tso'tke pakè pè' kè dör judiowak esepa a. Ie'pa e' tö iklö'weraë.

³⁰ Pablo e' tséat duas bök wa'ñe wé u patuekeitö ee. Sulitane mi'ke ie' weblök tã ee ie' tö ikiéwä. ³¹ Ie' tso'ie ì blúie Skëköl tso' e' tté pakök ena s'wöbla'uk Skëképa Jesucristo tté wa. Kè yi wä ie' wöklöone. Kè yi wä ie' tsirione yës.

* ^{28:27} Isaías 6.9-10

Tte Pa'ali Me' Skököl tö Se' a
 New Testament and Shorter Old Testament in Bribri (CS:bzd:Bribri)
 copyright © 2010 Wycliffe Bible Translators, Inc.

Language: Bribri

Translation by: Wycliffe Bible Translators, Inc.

Bribri

bzd

Costa Rica

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament and Shorter Old Testament

in Bribri

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective

copyright owners.

2014-04-22

PDF generated using Haiola and XeLaTeX on 12 Mar 2019 from source files dated 5 Mar 2019

70b70297-578d-5d61-9b6f-3119201e28ca